

**NATIONAL ASSEMBLY OF
SEYCHELLES**

Tuesday 13th September, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bon, pou en nouvo lazournen en nouvo lasemenn. Bonzour tou Manm Onorab, bonzour nou staff ki pe asiste nou e bonzour nou piblik ki a lekout e ki swiv nou fidelman. Byenveni zot tou pou travay Lasanble sa semenn.

Mon ti a kontan komans partaz en mesaz lo lapar Lasanble an loner larenn Elizabeth II, Larenn e Sef Deta Langleter e latet nou Commonwealth;

The passing away of a Majesty Queen Elizabeth the II, has brought a wide reflection and appraisal of a life and service in a various roles, as Head of States of the United Kingdom, and Head of the Commonwealth to which our country belongs.

In the latter institution, she has also been the patron of the

Commonwealth Parliamentary Association, where she has represented and champion the causes of democracy, peace and human rights.

Queen Elizabeth was a tireless traveller throughout her life and reign. And place special effort to be in contact with people all across the world. Despite her august title and position, she was known to be a person of simplicity who reached out across her rank, class and nationality.

It is with deep respect that on behalf of our National Assembly, I pay homage to the roll she has played and I render a tribute to her service and the values she has represented. I express our condolences in echo of the sentiments of our people to the Royal Family, the Parliament and the people of the United Kingdom.

In the same spirit, I express our respect to the new Head of State of The United Kingdom His Majesty King Charles III with the confidence that he will continue the tradition of promoting the values that we hold as a parliamentary institution.

I join other Parliaments of the Commonwealth in wishing king Charles success in the duties and responsibilities he is

taking up. On behalf of the National Assembly. Thank you.

Mon ti a kontan prezan envit bann Dirizan Lasanble pou azout en mo. Mon a pas laparol Onorab Georges premye.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab e tou dimoun ki pe swiv nou deliberasyon bomaten.

Mr Speaker mersi pou donn mwan sa loportinite pou dir enn de mo lo Larenn Elizabeth II, ki'n kit nou e aksesyon son garson Lerwa Charles III lo tronn Langleter. An mezir ki nou pe mazin depar Larenn Mr Speaker, mon ti a kontan avek ou permisyon profit sa lokazyon pou osi mazin bann Seselwa ki'n kit nou pandan recess.

E mon mazin an partikilye bann ki'n mor dan en fason trazik. Demen mon konpran i annan lanterman 2 dimoun, 2 ser ki'n perdi zot lavi ansanm pa tro lontan pase, e donk an mezir ki nou pe mazin pep Angle *Grande Bretagne*, annou osi nou bann dimoun isi Sesel ki'n perdi zot lavi.

Mr Speaker an sa ki konsern Larenn Elizabeth II, mon ti a kontan dan mon

refleksyon bomaten ki nou pa bliye ki Larenn Elizabeth II, ti Larenn Sesel ziska nou Lendependans an 1976. E donk i ti annan en koneksyon byen direk avek nou. E lo mon kote ziska ki legliz Anglikann in divorce an 1973 avek *Church of England*, i ti osi Sef mon legliz.

Alor nou annan en koneksyon ase partikilye avek sa Mazeste e parey ou'n fer resorti se dan konteks *Commonwealth* apard sa 2 koneksyon direk, ki nou pou mazin son gran kontribisyon ki in fer dan lemonn. Ou'n koz Mr Speaker lo *Commonwealth Parliamentary Association (CPA)* ki sa Lasanble i form parti.

Semenn pase mon ti annan loner pou mwan asiste en lot lenstitisyon *Commonwealth - Commonwealth Magistrates and Judges Association* ki ti fer *Ghana* e kot Larenn ti'n anvoy zis 2 zour avan son depar, avan son lanmor, en mesaz pou siport sa Lenstitisyon *Commonwealth* osi.

E se dan sa konteks ki nou remersye li pou son gran kontribisyon, ki in fer pandan son 70an. Nou mazin ki in menm pran letan pou vin pas letan avek ou an 1972 isi Sesel. Nou regrete ki i pa'n kapab retourn ankor, me nou *value*

son kontribisyon ki in fer avek *Commonwealth*.

In conclusion Mr Speaker, allow me on behalf of my Caucus this morning, to recognize the great contribution that her Majesty Queen Elizabeth the II, the late Queen of England, the great Queen of Great Britain, has made throughout the world and especially in the Commonwealth of which she was patron.

We value and cherish the contribution that she has made. It is an indelible part of her memory so far as this Assembly and this country are concerned.

I wish to take this opportunity while remembering the contribution of her Majesty Queen Elizabeth II, to also acknowledge that King Charles III, who has now taken over her mantle, has pledged to continue her work. And in that context on behalf of my Caucus I wish His Majesty King Charles the III all the very best as he assumes the responsibilities that his mother has left him. I thank you Mr Speaker.

MR SPEAKER

Mersi Onorab Georges. Mon ti a kontan aprezan envit Leader Lopozisyon pou son refleksyon. Onorab Pillay.

HON SEBASTIEN PILLAY

Mersi Mr Speaker. Bonzour tou koleg Onorab e bonzour tou dimoun ki a lekout.

Mr Speaker dan la mazorite mon lavi - annefe pou bokou nou ler nou'n koz lo Langleter nou'n toultan mazin Larenn Langleter, akoz tou dimoun ti servi bann tenm parey *God save the Queen*, ki ti si oule montre lenportans ki Larenn in annan pou pep Angle, me osi la kantite letan ki in deservi avek bokou dinyite son pep.

So Mr Speaker it was with deep sadness as we wrote in our party newspaper, that we learnt of the passing on her Majesty Queen Elizabeth II. For the 70 past of years that she has dedicated herself to the service of the people and Commonwealth, we have seen through her actions, how a successful Leader can be, can act and how she was able to steer her country through many difficult times and ensure that her people continue to benefit from what a country provided. And also ensure that the unity that existed between a country, persisted.

Our thoughts go with the family of the Queen and the new King. But our thoughts also go with the representatives of the

Queen in our small islands. My thoughts especially go to the British High Commissioner who I know has been also saddened by the news and of the passing of the Queen.

And to the many Seychellois who live in England for many who consider themselves as subjects of the Queen, as well as being Seychellois, my thoughts also go with you.

So, Mr Speaker on behalf of the United Seychelles Caucus and as was expressed by Dr Patrick Herminie in an Article now on newspaper, we extend our heartfelt condolences to the people of Great Britain and to the family of the Queen. Thank you.

MR SPEAKER

Mersi Onorab Pillay pour en siny omaz, mon ti a envit Lasanble pou nou obzerv en moman silans silvouple.

(A moment of silence was observed for the passing of her Majesty Queen Elizabeth II)

MR SPEAKER

Pour komans nou biznes regilye, nou annan prezantasyon dokiman, en Rapor SADC *Parliamentary Forum Standing Committee in*

preparation for the 51st SADC PF Plenary Assembly.

Madanm Clerk i dan ou non sa oubyen dan non Onorab Esparon sa rapor? Onorab Esparon? Onorab Esparon mon ava envit ou pou prezant ou rapor silvouple.

HON REGINA ESPARON

Mersi Mr Speaker. Bonzour tou dimoun a lekout. Mr Speaker mon annan loner pou prezant rapor, rapor rankont Komite SADC PF ki ti ganny fer Sidafrik an preparasyon pou 51tyenm plenyer, Lasanble plenyer ki ti fer Lilongwe Malawi.

Sa rapor i kontyen rapor sorti kot tou manm bann Komite, ki mon pou lir enn par enn. Nou annan nou Komite ki ansarz programm spesyal pou bann Sevlopman Imen e Devlopman Sosyal ki ganny reprezante par Onorab Rosie Bistoquet e i osi koman son *Chairman* ki ti ganny elekte dan sa *workshop* e son Vis-Chairman ti sorti *La Tanzanie*.

Lo Komite *Trade Lendistri*, Finans e Lenfrastriktir i sa Komite ki get *trade*, lenportasyon e bann transportman marsandiz lo bann *borders*, devlopman endistriyel e son kote lenfrastriktir lo nivo bann pei

SADC ki ganny reprezante par Onorab Audrey Vidot.

Komite Alimanter, Lagrikiltir e Resours Natirel i sa enn Komite ki get Zesyon Lagrikiltir, Sekirite Alimanter, Resours Natirel ki enkli resours mineral e lezot ki ganny reprezante par Onorab Rocky Uranie.

Komite Demokratizasyon, bonn gouvrenans e Drwa Imen, i get bann prosedir demokratik ki enkli sirveyans eleksyon dan bann pei *SADC*, e sirvey sa laspe vyolans e Drwa Imen e koripsyon e bon Gouvernman e sa i ganny reprezante par Onorab Richard Labrosse.

Komite Lazenés e Egalite *Gendre*, i ganny reprezante par Onorab Kelly Samynadin. E Komite ki regroup bann Madanm Parlamanter dan sa 14 pei *SADC* i ganny reprezante par mwan menm ki ti ganny reprezante koman son *Chairperson* e son *Vis-Chairperson* i sorti *Madagascar*.

Mr Speaker fodre note ki sa miting ti ganny fer an preparasyon pou 51yenm plenyè, ki ti fer an Zilyet Lilongwe Malawi. Kot nou ti osi diskite lo Lalwa model pou finansman (*PFM*) ki ti osi ganny aprouve par 51yenm plenyè. E ti annan eleksyon pou bann Komite.

Mr Speaker mon annan plezir prezant avek Lasanble en kopi sa rapor lo non mon delegasyon. Mersi.

MR SPEAKER

Mersi Onorab Esparon. Madanm raporter i a kolekte sa rapor. E mersi bann manm diferan Komite pou zot travay dan sa lorganizasyon, kot Sesel in en menm tre aktiv. Deputy Speaker Onorab Henrie ou annan en rapor lo lapar partisipasyon dan *CPA*.

HON GERVAIS HENRIE

Mersi Mr Speaker. Bonzour tou bann dimoun ki pe swiv Lasanble Nasyonal ozordi bomaten.

Mr Speaker mon annan plezir prezant en rapor lo 65yenm konferans *Commonwealth Parliamentary Conference (CPC)* ki ti fer ant le 20 a le 26 Out *Halifax Nova Scotia Canada*. E sa i en konferans ki fer tou le an ki reini tou bann brans *CPA* atraver tou bann pei Manm *Commonwealth*.

E nou ti annan en delegasyon 4 dimoun, ki ti ale ki ti enkli mwan menm; Manm Elekte pou distrik Baie Ste Anne Onorab Churchill Gill. Manm Elekte pou distrik Au Cap Onorab Kelly Samynadin e

Madam Clerk Tania Isaac dan delegasyon.

Sa rapor i donn en revyi tou bann levennman ki'n deroule kot sa konferans. Sa i enkli bann sesyon plenyer, bann *workshops* e bann lezot levennman ki fer ki sa rapor i ava ganny garde dan nou *library* isi, ki ava permet bann delegasyon pli tar ki pe al 66yenm *CPC* ki pou fer *Ghana* lannen prosen, e menm 67enm *CPC* ki pou fer *New South West Australie 2024*, pou kapab swiv bann diferan rekomandasyon e bann size ki'n ganny diskite. Alor mon ti ava kontan prezant sa rapor avek Lasanble Mr Speaker. Mersi.

MR SPEAKER

Mersi Onorab Henrie. E mersi egalman pou bann mam delegasyon *CPA* pou zot travay. Madam Clerk mon war ankor en item Prezantasyon Dokiman, ou ti a kontan fer sa? Wi Onorab Pillay.

HON SEBASTIEN PILLAY

Mr Speaker zis mon ti oule, mon pa konnen si Deputy Speaker pe al fer, mon a les li fer en pti kou.

MR SPEAKER

Wi Deputy Speaker.

HON GERVAIS HENRIE

Mersi Mr Speaker. Mon prezant mon leskiz mon'n mank en mo dan mon lapriyer, aköz mon annan gran loner pou anonse e mon ti ava kontan si ou ti ava donn li en pti mo - Onorab Churchill Gill ki'n ganny elekte koman *Vis-Chairman Small Branch, CPA*, e i en pozisyon tre onore pou Sesel. Donk mon ti ava apresye si ou ti ava kapab donn li en sans pou dir en pti parol bomaten. Mersi.

(APPLAUSE)

MR SPEAKER

Felisitasyon Onorab Gill e mon swet ou bon sikse dan ou nouvo travay. Ou ti a kontan dir 2 mo?

HON CHURCHILL GILL

Mersi Mr Speaker. E mersi tou koleg pou sa laklamasyon. Mr Speaker mon oule zis enform Lasanble nou lenstitisyon, ki sa apwentman i pou dan lavantaz Sesel dan plizyer *forum* ki a ganny fer. E mwan mon don mon langazman pou mwan fer sir mon servi sa *forum to the maximum*, pou benefis nou lenstitisyon e lezot Komite.

Deza i annan bann travay ki'n komans ganny fer, kot nou'n ganny sipor *CPA* avek 5mil Liv ki en travay ki Madam

Clerk pe fer. E an menm tan nou'n rod, mon'n rod bann posibilite ki tou nou bann Komite i kapab ganny bann serten sipor e sa CPA in fini anvoy nou en *benchmark*.

E i reste pou nou kapab zwenn, apre partaz avek bann *Chairman* diferan Komite, pou rod posibilite pou kapab develop Manm Lasanble bokou plis ankor. Mersi bokou Mr Speaker.

MR SPEAKER

Mersi Onorab Gill. Mon krwar sa bann lanons i temwanny partisipasyon aktiv, ki nou Lasanble i annan dan sa bann lenstriksyon. Me osi lefe ki letan nou sa bann lorganizasyon lavwa Sesel i mont for, e nou kontribisyon i ganny rekonnèt. E se pour sa ki nou ganny plis louvraz. Mersi pou zot kontribisyon zot tou. Madanm Clerk?

MADAM CLERK

Mersi Mr Speaker. Bonzour Mr Speaker. Bonzour tou bann manm. Tou bann *staff* Sekretarya e tou dimoun ki a lekout. Bann papye ki'n komans ganny prezante la bomaten e lezot osi i;

*Report of SADC
Parliamentary Forum Standing
Committee Meeting in*

*Preparation for the 51st SADC PF
Plenary Assembly, held on 22nd
April to 30th May, 2022
Radisson Blue, Sandton South
Africa.*

*Report of 65th
Commonwealth Parliamentary
Conference Held from the 20th to
26th of August, 2022 in Halifax,
Canada. And Mid-Year
Economic and Fiscal Outlook –
Financial Year 2022 and 2023
Outlook.* Mersi Mr Speaker.

MR SPEAKER

Mersi Madanm Clerk. Bon nou a kapab prezan prosede avek *Private Notice Question*, mon a demann madanm raporter pou apel Minis ek son delegasyon ki pe atann nou. Mersi.

Wi antretan nou annan en pe *Bills* pou *First reading* madam Clerk ou a fer *First Reading* silvouple.

MADAM CLERK

Mersi Mr Speaker.

*This Act may be cited as the
Conservation and Climate
Adaptation Trust of Seychelles
(Amendment) Act, 2022 and
shall well and construed as one
with Conservation and Climate
Adaptation Act Trust of*

Seychelles Act 2020, 15 which is hereinafter referred to as the principal Act.

This Act may be cited as The Construction Professionals (Registration and Regulation) Act, 2022. Mersi Mr Speaker. a.

MR SPEAKER

Mersi Madanm Clerk. Bonzour e byenveni Minis Sylvestre Radegonde - Minis pou Zafer Etranzer e Tourizm e osi bonzour e byenveni Mrs Sherin Francis PS pou Tourism e Ms Jenifer Sinon, Direkter Zeneral pou *Human Resources* ek *Administration* dan sa Departman.

Mersi pou zot partisipasyon pou *Private Notice Question*. Mon ava apel *Leader* Lopozisyon pou prezant son kestyon silvouple.

HON SEBASTIEN PILLAY

Mersi Mr Speaker. Bonzour e bonzour tou dimoun ki a lekout. Bonzour Minis ek ou delegasyon. Bonzour tou koleg Onorab. Mon kestyon i lir koumsa;

An vi ki in annan plizyer reaksyon e konsern an relasyon avek desizyon Gouvernman lo sa nouvo *logo* ki sipoze pe fer

marketing pou Sesel, dan lentere latransparans e avek bi gard Lepep Seselwa enformen lo bann desizyon Gouvernman, eski Lasanble i kapab ganny en leksplikasyon konkret e kler lo:

Ki prosedir ki'n ganny swiv pou swazir sa lakonpanyen ki'n fer sa nouvo *logo* e eski *Cabinet* ti aprouv sa? Konbyen sa nouvo *logo* in reelman koute?

E 3enm, akoz ki Departman Tourizm pa ti donn sans bann artis Seselwa partisip dan *design* sa nouvo *logo*? Mersi Mr Speaker.

MR SPEAKER

Mersi Onorab Pillay. Minis mon apel ou pou larepons.

MINISTER SYLVESTRE RADEGONDE

Bonzour Mr Speaker. Onorab leader Lopozisyon. Onorab Zafer Gouvernman. Mersi Onorab pou ou kestyon. Mon'n not langouman, lentere ki'n annan dan sa zafer *logo*.

Tou dimoun i annan en lopinyon e mon kontan sa loportinite ki a donn mwan la atraver ou kestyon Onorab pou mwan anmenn serten klarifikasyon. Ki prosedir ki'n ganny swiv pou swazir sa konpanyen ki'n fer sa nouvo *logo* eski *Cabinet* ti aprouv sa?

Lakonpanyen *Union* ki son propriyeter i en Seselwa, ti ganny kontra an 2006 pou *re brand* pou fer *rebranding* Sesel e anmenn tan prodwir en nouvo *logo* pou sa letan *Seychelles Tourism Board*, ler si zot a rapel nou ti pe sorti dan sa bann kanpany *black and white* avek *logo* sa letan ti pa ‘*Treasure Every Moment*’ ti ‘*As Pure As It Gets.*’ Donk sa konpanyen Seselwa ti ganny sa letan pou *re brand* prodwir en nouvo *logo* e se sa ki ti arive an 2006.

15an apre bann dimoun ki travay avek sa *logo*, i war bann *challenge* ki annan, bann mankman ki annan an mezir ki sirtou nou pe *move* dan *digital marketing*, e i war bann *challenge* ki ou war ler pou ou reprodwir sa *logo* lo bann materyo *marketing*.

Ofet mon konpran sa bann diskisyon pou revwar sa *logo*, diskisyon in komanse depi avan mon ti vini, depi 2019, me apre *COVID* in vini e tou zafer in ganny arete. Alor diskisyon sa letan i eski nou sanz konpletman sa *logo*, ouswa nou *tweak* li pou li *meet requirement*, adres bann kontrent ki annan ozordi lo bann materyo *marketing*.

Desizyon ki ti ganny pran - e mwan mon swiv konsey

bann eksper parske mon pa konn naryen dan *logo* avek *re branding*, mon annan mon lopinyon lo kouler, lo sa size, lake si i tro long si i tro kourt. Eski i pwentir i ron, mon annan en lopinyon be mon ekout konsey *expert*.

E *expert* ti dir nou a *tweak* li – olye sanz net, nou a *tweak* li, revwar son bann kouler osi fer li pli prononse, aptisi li parske la avek sa gran lake i tro larz, e i donn problemm ler ou pe detrwa partner ki ou pe met lo en prodwir *marketing*. Alor nou fer li koumsa, alor i ava pli vit, i a kout mwen ser.

Se avek sa lide ki nou ti al kot *Procurement* e vi ki ti annan sa konpanyen ki ti'n deza travay l sa *logo* inisyalman, ki ti annan tou bann materyo *template* si oule avan, ki konn byen sa letan ki nou ti pe sey *achieve* dan sa nouvo *logo*, dan sa nouvo *brand*.

Nou ti demann *Procurement* pou aksepte ki nou fer en *direct bidding* olye *contract out – tender-out* (pardon) e sa ti ganny aksepte - *direct bidding*. E se sa ki nou ti fer e byensir nou ti gard *Union* sa menm lakonpanyen pou fer sa travay.

Eski *Cabinet* ti aprouv sa? *Cabinet* napa naryen pou aprouve, akoz i pa ti en

sanzman *logo*, i pa naryen sanze i zis *tweak* en *logo*. Donk nou pa'n vwar nesesite retourn kot *Cabinet* pou *tweak logo*. Konbyen sa *logo* in reelman koute? Sa *logo* in reelman koute R279mil 539. Mon a eksplike.

O depar, ler nou ti son diskisyon avek *Union*, sa letan zot ti pe propoz £34mil 600. Negosyasyon ki ti annan ant mon lekip avek zot, zot ti donn en rediksyon 13poursan. E apre swivan lezot rediksyon apepre 50poursan e sa in desann e apre ki mon'n *find out* ti annan serten depans R27,900 lokal ki nou ti'n depanse dan travay pou sa preparasyon sa *logo*, e mon'n azout tou sa.

Alor sa rediksyon lo preparasyon *logo* li menm sa R27,900 ki'n depanse lokalman i fer R279, 539.

Akoz ki Departman Tourizm pa ti donn sans bann artis Seselwa partisip dan *design* sa *logo*? Mr Speaker sa kestyon li menm par mannyer in ganny *phrase*, i poz mwan en problenm e mon regrete. Nou'n dir plizyer fwa e mon repete, konpanni *Union* i ganny dirize par en Seselwa.

Alor sa kestyon i pe konmsi enplike ki i annan detrwa kategori Seselwa dapre kote ou ete. E mon pa konfortab

avek sa. Mon annan 3 garson mwan ki'n grandir Lerop. Ozordi zot pe fer zot lavi Lerop, eski mon 3 garson pa Seselwa?

Zot dan Lasanble isi, nou bann Lepep ki deor petet nou tou sakenn de nou i annan en fanmir dan en pei kelkonk, ki'n ariv dan en pei ou en rezon ou en lot, me si i fer dan dimoun mwen Seselwa ki en lot? Minister Zafer Etranzer nou pe fer tou pou nou kapab retir sa zafer 2 kategori plizyer kategori Seselwa dapre kote ou ete, alor so ou vin deor ou menm Seselwa ki isi.

Nou pe sey fer mannyer anmenn tou dimoun ansanm. E se sa, sa Seksyon *Diaspora* ki nou pe fer, pou nou travay ansanm pou nou fer Seselwa partou kot zot ete santi zot parti sa pei, ki zot kapab partisip e zot kapab donn nide, zot kapab investir partisip dan devlopman pei.

Donk, mon'n eksplike aköz nou ti al kot sa konpanni, si ou annan en lakaz si ou annan en kontrakter ki'n fer lakaz le ou'n antre dan lakaz apre en serten letan ou war i komans fele, ou war tiyotri komans annan problenm avek, ou war elektrisite pa bon, ou premye refleks se retourn kot sanmenm sa kontrakter, dir li vin ed ou rezourd sa bann

problemm. Me ou a kapab osi dir li be mon al kot en lot.

Nou, nou'n deside pou sa ka letan ki ou ti annan al kot sa menm konpanyen e vwala rezon ki nou'n al kot *Union*. E mon oule dir ou petet dimoun par sa bann komantr ki mon'n tande deor, konmsi ou a krwar nou pe neglize, nou pous bann Seselwa kote, Mr Speaker sa i pa leka ditou.

Mwan personnelman nou tou nou annan respe. Nou valoriz tou sa bann dimoun ki pe travay dan nenport ki sekter dan sa pei. E bann *graphic artist* e nou annan mizisyen nou bann artizan e tou lezot menm zafer.

E kot i posib nou servi zot, nou servi zot toultan. E zis pou mwan donn zot en sif pandan 2019, Departman Touris in depan R1milyon par bann kontra ki zot in *outsource* avek bann diferan dimoun fan diferan sekter, ki sa swa *videographer*, mizisyen, fotografer ensidswit.

An 2020 R600mil. An 2021 ti R462mil, pardon, '21 ti R1.3milyon e sa lannen ziska la ki mon pe koze nou'n *contract out* avek bann diferan dimoun deor R462mil valer bann travay ki nou'n donner.

Donk napa okenn siny ki nou pe meprize ouswa neglize

ouswa pa donn zot manze ouswa tir manze dan zot labous i pa leka ditou nou kontinyen fer li. E nou pou kontinyen ankor fer li nou valer.

Mon oule fer en pwen osi en kantite sa bann travay ozordi ki nou appel *traffic design* ek lezot, *tourism* pandan plizyer lannen menm avan zot in arive zot in *build* en lekip, i an en lekip bann zenn dan Departman Tourizm ozordi solid. Alor en kantite sa bann travay ki nou fer, en kantite pe ganny fer enteryerman.

Ou *outsource* ler nou pa kapab fer ouswa ler napa letan pou fer nou *outsource* i prensipalman i ou *out source* avek dimoun ki Sesel. A mon avi, me PS i a kapab kontradwir mwan, sel gran kontra se sa R200ekek mil - mon konsider li en gran kontra i sel ki *involve graphic work* - i sel Kontra ki nou'n donn avek en konpani ki baze deor, me parey mon dir dirize par en Seselwa.

Pou terminen Mr Speaker mon oule fer enn de pti komantr. Pou mwan dir ki nou Lendistri Touris ozordi e nou pei i fer fas avek en kantite defi. Dan sa Lendistri Touris ozordi, konpetisyon deor i feros, i feros. Lemonn pe ouver tou dimoun i oule en parti - i oule en bout sa gato ki apel touris. Sakenn pe

fer tou sa ki i posib pou li atir plis kantite dimoun kot li.

Konteks enternasyonal ozordi pa selman avek lager *La Russie* avek *Ukraine*, konteks enternasyonal ozordi an rann parti i difisil. I annan lensertitid. Eski bann touris ki nou pe gannnen ozordi, i pou kontinyen vin demen sorti dan sa menm sours ki nou pe gannnen ozordi?

Donk gro travay ki nou pe fer, gro travay ki mon e lekip mon lekip avek mwan nou pe fer, se kontinyen nou zefor pou nou diversifye sa marse, pou asire ki touris i pa selman sorti Lerop me i sorti dan lezot pei e manner ki si ou annan problem dan en kwen lemonn ou kapab kontinyen annan en sours viziter ki vini.

Nou pe kontinyen travay pou nou negosye avek bann laliny aeryen, pou zot swa ogmant zot vol ouswa bann ki'n arete parey *Air France*, *British Airways* pou zot rekomanse. Mon espere ki byento lannen prosenn i ava annan en avyon direk ki ava sorti *Saudia Arabia*.

I neser travay ki nou pe fer kontinyen diversifye prodwi ki nou pe donnen isi lokalman, e sa mon pas an partikilye sa *cultural tourism* pou nou ankouraz touris sorti lo lans, sorti dan lanmer al dan

kominote - pa selman koman en leksperyans pou zot, me osi don sa loportinite nou dimoun dan nou kominote benefisye direktman avek en lendistri ki tre enportan pou sa pei.

En gro travay osi en *challenge* ki nou annan, se asire ki bann touris ozordi ki pe antre Sesel ziska lafen sa semenn - semenn ki'n fek fini, mon krwar nou'n ganny apepre 225mil touris ki'n antre Sesel. E nou a fini Septanm avek en reveni petet \$300milyon. Nou *challenge* ozordi - e sa kantite bann pti lotel bann pti letablisman pou dir ou, *challenge* ki zot annan ozordi se ki pa tou ki pe fer osi byen, pa tou ki pe ganny en morso sa gato.

Nou travay nou, se pour kontinyen fer ki sa lendistri, sa bann touris ki vini i distribye. Nou pa kapab fors touris al dan en landrwa al dan en lot, nou pa promot en lotel nou. Me sa ki neser ki nou fer se ki avek sa bann pri lotel kontinyen travay ki nou'n fer komanse avek zot.

Fer sir ki zot vizib, ed zot avek zot *marketing*, ed zot avek lev zot standar. I annan en kantite sa bann lotel mon'n vizit 200 lotel sa bann pri letablisman depi ler mon Minis - 200. E mon war kantite potansyel ki annan pou zot si

zis zot aranz enn de pti keksoz en pti *tweak*. Zot kapab osi revwar zot pri, fer zot vin pli vit pou ed zot.

Donk *challenge* ki nou annan ozordi fer sir ki bann pti lotel partou atraver nou zil, bann lotel ki *grant* par Seselwa, *owned by* Seselwa, i osi kapab benefisye plis. Kontinyen travay mon'n dir pou elev nivo nou bann etablisman touristik.

Challenge osi i asire ki bann viziter ki vini i ganny valer pou zot larzan, apre zot pa pe ganny vole zot pa pe ganny *overcharged*. *Challenge* ki nou annan ozordi se fer sir ki nou ban viziter i vini i pa ganny morde avek lisyen, i pa ganny *harass* lo lans, i pa ganny vole dan son lotel. Vwala Mr Speaker en pe bann *challenge*.

E dernyen asire ki nou kontinyatir dan lendistri nou bann zenn. Pou zot rantre dan lendistri me fer sir nou travay lo kondisyon pou fer sir ki zot reste dan sa lendistri, ki enportan pou nou. So mon ti oule termin avek sa pou fer konpran kote nou *focus* ozordi i ete.

Wi i annan zafer, mon pa pe minimiz *at all* sa zafer *logo*. I en diskisyon ki nou bezwen gannyen kler me i an osi bann lezot *challenge* ki a mon avek ozordi kot mon asiz sa i pli gro

challenge ki mon bezwen *focus* lo la, e fer sir ki nou adrese si nou oule ki nou lendistri i sirviv a lonterm. Mon remersye ou.

MR SPEAKER

Mersi Minis. Mon pou eskize, mon annan detrwa kestyon mon pou pran serten kestyon ban Manm, me selman nou pou bezwen gard en limit letan, mon a pran premye, Onorab Vidot. Annou met bann kestyon bref silvouple.

HON AUDREY VIDOT

Mr Speaker avan mon demann mon kestyon mon ti va swete si petet Minister i reponn zot pou zis nou kestyon osi, akoz i permet lezot manm demande akoz si i fer pli long i pa reponn zis i perdi sans pou manm demande.

Mon premye kestyon Mr Speaker, Minis ou Gouvernman pe pres Sesel pou tou son zanfan. So, si zot pe pres Sesel pou tou son zanfan kwa ki pe anpes Departman Touris, oubyen ki'n anpes zot pres li pou par donn artis lokal sa loportinite parey ou dir - pe enport kot zot ete avek zot talan ki annan in montre poudir zot annan pou zot partisip dan sa *bidding*? Sa i enn.

Dezyenmman Minis, lefe ki zofisye ou Departman enkli ou menm ou'n konfirman poudir ti en *direct bidding*, eski Prezidan Larepublik in *mislead* Lepep Seselwa ler in dir i ti *selective bidding*?

E dernyerman Minis ler ou'n dir sa *cost* pou sa *logo*, mon mazine i annan osi bann lezot kou ki Departman Touris pou depanse, an term lavertisman pou servi sa *logo*. Kantite larzan Sesel pou depanse parey pou fer *video*, portre, zot si zot annan en nide zot kapab don nou pou konpar li avek premye *logo*. Mersi.

MR SPEAKER

Mersi. Minis. I annan serten kestyon la ki mon krwar ki Minis in fini adrese. Minis silvouple ou a repas lo an kestyon e annou al en pe vit silvouple.

MINISTER SYLVESTRE RADEGONDE

Mersi Mr Speaker. Onorab mersi mon not ou pwen wi mo al en pri pe long, me ti annan nesesite pou mwan fer sorti serten pwen. Lo zafer artis Seselwa, mon'n koz lo la mon'n dir koz pou sa enn nou'n al fer parey nou'n fer avek *direct bidding*.

Eski Prezidan Larepublik in dir en lot keksoz ki nou pa dir, garde. Ler ou pe koze dan enn son, *direct bidding*, *selective bidding* ensidswit i posib ki dimoun i fer fot, mon pa la pou mwan pas en zizman, me mon krwar mon Prezidan ti oule dir mon *assume* i ti oule dir *direct bidding* e se sa ki nou'n fer.

Lezot kou mon a demann PS i a koz lo lezot kou ki pou annan konsernan sa nouvo, *rebranded logo*.

MR SPEAKER

Mersi. PS ou adres sa silvouple.

PS SHERIN FRANCIS

Parey Minis in mansyonnen kou ki'n al anver sa *brand tweaking exercice* i sa kou ki nou'n mansyonnen la, e nou annan en *content network* ki enkli *videographer*, fotografer *copywriters* e nou pe travay ek zot pou ou aplik sa *brand* atraver nou bann kanpanny.

Nou annan bann diferan lakonpannyen lokal ki form parti sa *content network* ki nou pe travay avek. E parey mon'n dir pou le moman la i annan R462mil ki ou'n depanse e petet an tou aköz i annan bann kont ki pe antre la ki nou pa ankor fini negosye, i kapab petet ariv an tou R1.5 a 2milyon. Pou

bann diferan *content* ki nou bezwen fer.

MR SPEAKER

Mersi *PS*. Mon kapab kontinyen. Onorab Cosgrow ou kestyon?

HON WALLACE COSGROW

Mersi Mr Speaker. Bonzour Mr Speaker. Bonzour Minis avek ou tim, Minis mon note dabor ki *Livrea Seychelles* ti ganny *design* par en zenn Seselwa isi sel lokal, ki demontre talan nou bann Seselwa lokal.

An dizan sa Minis mon osi ekout ou atantivman ler ou'n donn zistifikasyon, akoz ki en konpanyen Seselwa ki aletranze ki'n ganny sa kontra. Dabor ti ava ed nou pou napa sa bann kestyon ozordi, si ti annan en *tender* kot en konpanyen Seselwa pe enport kot i été, ti kapab ganny en loportinite pou fer sa travay.

Now, Minis ou'n dir nou i kout R200ekek mil pou fer sa *logo*, me dan en lartik lo Nasyon in dir ki sa *logo* in kout £30mil. Dan *interview* lo televizyon i dir sa *logo* in kout apepre R450mil. E lo televizyon Prezidan in dir en lot pri.

Be lekel Minis ki pri normal? Lekel finalman ki laverite dan sa bann pri ki nou pe tande parey kote? Dir pep

Seselwa silvouple lekel ki ti devret *price* ki'n ganny peye avek sa lakonpanyen? Mersi Mr Speaker.

MR SPEAKER

Mersi. Minis mon a les ou adrese.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. Onorab in Minis pandan plizyer lannen. Mon difisil krwar ozordi ki Minis pa'n zanmen trouv li dan en sityasyon ki ant sa 3 posibilite donn kontra, *direct bidding* pa'n zanmen pas devan son laport parey *selected bidding*. Si sa lenpresyon ki Onorab i oule donner.

Ki pri egzakt in koute pou sa *log*? Onorab mon a repet sa ki mon'n dir pri egzakt ki'n koupe pou *logo* i R279mil 539 - R279mil 539. Mon'n dir o komansman ler *Union* ti propoz - ler nou to apros *Union* pou fer sa travay i ti propoz £34mil 600. Negosyasyon ki mon ti fer avek, i ti redwir par 13poursan ki ti ariv £30mil.

Plis negosyasyon ki'n ganny fer apre Prezidan Larepublik in koz lo la in dedwir ankor par anviron 50poursan. Vwala sa dernyen sif ki mon pe donn ou. E kwa ki Prezidan pa

ti nonmen parske sa leta nou ri pt regarde si ti napa lezot *invoice*, lezot keksoz ki nou pa konnen e nou'n war ki e moman dan preparasyon sa *logo*, ti annan R27mil 900 ki ti'n depanse.

So Onorab mon a repet ankor en kou i R279mil 539. Mersi.

MR SPEAKER

Mersi. Bon nou a sey pa repet menn kestyon menn size, mon a pran kestyon bann Onorab Ernesta.

HON PAUL ERNESTA

Mersi Mr Speaker. Mr Speaker Minis ek ou delegasyon tou nou bann koleg Onorab e tou dimoun a lekout bonzour.

Mr Speaker mon kestyon Minis in koz lo s lakonpannyen Seselwa ki ganny - *I mean* sa lakonpannyen ki ganny *direct* by en Seselwa. Kestyon ki mon annan eski sa lakonpannyen i anrezistre Sesel e i pey *tax* Sesel? Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Mersi Onorab. Sa i pa lenformasyon ki mon pou annan la anba mon

anmenn, me mon kapab rode, me pour mwan i pa fer en okenn diferans. Mersi.

MR SPEAKER

Bon. Mersi mon annan ankor en kantite Manm ki'n lev lanmen. Mon pou pran en kestyon ankor e mon pou fer en pe balans mon pou donn Onorab Georges sa kestyon. Onorab.

HON BERNARD GEORGES

Mersi Mr Speaker. Mr Speaker mon kestyon pou Minis i *comme* swivan, premyerman Minis, eski sa *logo* ki nou pe koz lo la i en nouvo *logo*, parey in ganny mete dan kestyon *Leader* Lopozisyon, oubyen i en *refreshing of* en *logo* i deza egzistan ?

E dan sa konteks eski sa lakonpannyen ki'n ganny swazir i an en *track record* lo promosyon oubyen *logo* pou bann lezot sektè touris dan lemonn? E trwazyenmman Mr Speaker, eski Minis i kapab rapel avek nou Lasanble, avek Lepep Seselwa, lekel Gouvernman ki ti o pouvwar, e lekel Prezidan ki ti *State House* ler *Union* ti ganny swazir pou premye fwa pou fer sa *logo* pou Minister Touris? Mersi.

MR SPEAKER

Minis. Ou repons.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. Non, Onorab parey mon'n esksplike avan i pa en nouvo *logo*. I pa en nouvo *logo* i en *tweaking* - en azisteman sa *logo* ki ti deza la. Se sa ki nou pa'n war li nesesite sorti al fer en *full fledged bidding* pou sa travay. *Union son track record is well known.*

Son *track records* tou dimoun i ti konnen ler i ti ganny pran an 2006 e ozordi ler nou'n rebran li ankor, se zisteman akoz sa leksperyans ki i annan dan *international branding and marketing*. I pe fer sa pou plizyer *Tourism Board* e enkli *Tourism Board Lacoste Scotland*.

Donk, nou satisfè nou, napa okenn problem lo sa ki *you know* i en dimoun i en konpani ki konnen kwa ki zot pe fer. 2006 an tou ka i pa ti Prezidan Ramkalawan ni Gouvernman *LDS* o pouwar. Mersi.

MR SPEAKER

Mersi Minis. Mon pou pas kestyon pran siplemanter Onorab *Leader* Lopozisyon, ki'n annan son kestyon orizinal.

Sorry mon pa kapab pran, mon annan 7 dimoun, mon napa letan pou mwan kapab pran lezot siplemanter. Onorab Pillay ou siplemanter silvouple.

HON SEBASTIEN PILLAY

Mersi Mr Speaker. E laverite pou sorti evantyelman. Premyerman Mr Speaker mon ti a kontan ki Minis i klarifye. Ti annan en *interview* ki ti ganny donnen e zofisye Departman Touris ti al devan medya e dir poudir sa *logo* in kout 30mil liv sterlen.

Zot in osi dir poudir zot in bezwen envit profesyonnel sa lakonpanyen pou vin Sesel pou ganny en *country feel* pou *design* sa *logo*. Sitan sa konpanyen i eksperyanse, nou bezwen fer son profesyonnel vin Sesel pou ganny en *country feel* kan nou an Seselwa la isi ki ti'n kapab partisip dan en konpetisyon pou *design* sa *logo* e nou pran *ownership* nasyonal sa *logo*.

16an pase avek ozordi Seselwa in vot pou sanzman, so si nou bezwen war sanzman ...

MR SPEAKER

Onorab Pillay pa tro gran.

HON SEBASTIEN PILLAY

Nou bezwen klarifye avek Minis. *Ok.*

MR SPEAKER

Mersi.

HON SEBASTIEN PILLAY

Ou'n dir poudir *Cabinet* pa'n aprouve, me Prezidan in dir ki i ti pe swiv sa. So Prezidan ti okouran ki sa *logo* pe kout £30mil. Kan eski zot in fer desizyon pou retourn kot sa lakonpanyen, pou fer li er desann son pri?

Kan eski zot ti al kot sa lakonpanyen pou fer li fer desann son pri? Mon dezyenm kestyon, apre tou sa leksplikasyon ki ou'n donn nou, ou pe fer letour, ou pe fer letour ou pe fer letour - ou pe koz...

MR SPEAKER

Onorab Pillay silvouple.

HON SEBASTIEN PILLAY

Be les mwan demann mon kestyon.

MR SPEAKER

Ou pa kapab, ou pe ...

HON SEBASTIEN PILLAY

Be mon pe demann kestyon lentere Lepep Seselwa mon ...

(Interruption)

MR SPEAKER

Order! Order! Ou pe antre dan en largiman avek Minis lo ki mannyer in fer son repons. Demann ou kestyon, i reponn mannyer li i anvi reponn, silvouple.

HON SEBASTIEN PILLAY

Avek tou respe ki mon annan pou ou eski ou krwar ou konportman ozordi bomaten an relasyon ek sa size, e relasyon Lepep Seselwa i byen Mr Speaker?

Mwan mon pa pe fer en largiman avek Minis. I mon lentere pou fer sir Minis I ...

MR SPEAKER

Onorab poz ou kestyon.

HON SEBASTIEN PILLAY

... pran son responsabilite. Minis eski ou kapab dir ou, eski ti annan *selective bidding* pou *logo* parey Prezidan in dir, i annan en *file* i ti montre pep Seselwa? Si non i vedir ki Prezidan in koz lalang avek Lepep Seselwa!

MR SPEAKER

Onorab!

HON SEBASTIEN PILLAY

E mon dernyen kestyon, mon dernyen kestyon.

MR SPEAKER

Onorab Pillay! Ou napa drwa fer sa kalite remark lo Prezidan. Ou *retract*.

(*Interruption*)

MR SPEAKER

Eskiz mwan, eskiz mwan bann Manm. I annan serten remark ki mon pa aksepte Onorab Pillay ou bezwen *retract* sa remarke si ou annan ankor kestyon pou poz Minis, poz li si non nou a terminen.

HON SEBASTIEN PILLAY

Mersi. Mon ava *retract* sa remark ...

MR SPEAKER

Mersi.

HON SEBASTIEN PILLAY

... ti annan en *file* in dir *selective* ou, ou'n dir *direct bidding*. Mon dernyen kestyon.

Akoz - aköz ki Departman Tourizm apre ki nou'n pas dan COVID e bann artis in ganny afekte, e i dan lentere anmenn en mouvman nasyonal otour kreasyon en *logo* ki pou vin *brand* nou pei, zot pa ti pran en desizyon vin organiz en konpetisyon, envit nou an artis lokal pou vin ansanm, pou

prezant en prodwi ki ti ava vin en *talking point* kot bann dimoun n ti a kapab koz lo la?

E mon ti a kontan Mr Speaker demann ek Minis koman *Chairman FPAC*, pou *provide* Lasanble avek tou bann dokiman depi ler sa konpanyen in ganny swazir, lo an peyman ki'n ganny fer pou sa bann profesyonnel ler zot in vin isi, konbyen sa in arive me lekel ki'n peye?

E osi lo konbyen larzan Gouvernman Sesel in pey sa lakonpanyen finalman pou sa *logo*, e si reelman, reelman in annan sa sanzman dan pri nou ti a kontan ganny laprev sa, zis parey ou ti dir nou i annan *invoice* ki ou pa ankor peye avek relasyon ek Prezidan Kenyatta.

Nou *still* pa ankor ganny dokiman lo sa bann *invoice*. Safwasi nou ti a kontan ganny sa bann dokiman Mr Speaker. Mersi.

MR SPEAKER

Mersi. Mon'n tann trwa kestyon la ki'n deza ganny demande. E ki'n deza ganny reponn. Minis mon pou les ou lib pou kapab dres sa bann kestyon silvouple.

MINISTER SYLVESTRE RADEGONDE

Mersi Mr Speaker. Mersi Onorab. Mon rekonnèt lo ki

Onorab i annan pou zwe da sa Lasanble. E ozordi mon rekonnèt osi ki koman *Leader* Lopozisyon i pa en rol fasil.

Akoz napa bokou keksoz pou kapab fer kankan avek. Napa bokou, alor prezan ou bezwen pran *logo*, R279mil. Mr Speaker mon oule dir ki prosedir ki ti swiv, ki ti ganny aprouve par *Procurement* ti *direct bidding* - *direct bidding*.

Onorab in dir konpetisyon, konpetisyon. Nou pe repet ankor lo menm zafer aköz dan sa moman nou ti al kot sa dimoun, i ti annan 2an leksperyans pou fer sa *logo* aköz nou ti al kot li pou li *refresh* sa enn. *Refresh* i pa ti en *rebranding*, *refresh*.

Vwala mon napa naryen ankor plis ki mon kapab dir Mr Speaker. Mon remersye ou.

MR SPEAKER

Mersi. Nou pou termin sesyon kestyon la. Mon remersye Minis e son delegasyon, mon respekte drwa bann manm pou demann kestyon, me selman repet menm kestyon, rod menm repons i pa servi nou dan naryen. Minis mersi bokou e mon swet zot bon depar.

Mon a les Minis ek son delegasyon sorti apre ou a kapab lev ou *matter of privilege* Onorab Pillay.

(MINISTER RADEGONDE AND HIS DELEGATION WAS EXCUSED FROM THE HOUSE)

MR SPEAKER

Mersi. Onorab Pillay ou *matter of privilege*.

HON SEBASTIEN PILLAY

Mersi Mr Speaker. Mr Speaker mon oule met devan ou san ki mon - mon pa oule ganny enterprete konmkwa mon pe dir ou ki mannyer pou fer ou louvraz i pa leka. Me selman mon montre poudir si mwan mon met presyon lo Gouvernman e ou war li parfwa neserer pou ou dir ek mwan fer *retraction* oubyen koriz mon parol.

La mon annan mwan en Minis ki mank respe pou mon Lofis dan Lasanble Nasyonal, met en lord ek mwan Sebastien Pillay, mon napa problem - ki mank respe pou mon lofis dan Lasanble Nasyonal e ou pa dir li naryen la.

E mwan sa ki mon pe demande konmsi Mr Speaker se ki - mon konnen zot pa kontan mon demann kestyon - be i mon devwar anba Konstitisyon pou demann kestyon Gouvernman pou fer mon louvraz.

So ler mon pe fer mon devwar lo non Seselwa, ou ekspekte mon ganny loportinite pou fer li. E mon ti a kontan ki ou ti'n devret fer Minis fer en *retraction* parey mwan mon'n fer en *retraction* lo sa ki mon'n dir.

MR SPEAKER

Mersi Onorab Pillay. Onorab Pillay mon pa war okenn ou privez ki'n ganny afekte. Mersi. Nou a pran en poz la avan nou apel lot delegasyon e nou a fer en poz *sanitizing*. Mersi.

(technical break)

MR SPEAKER

Bonzour Minis pou Lagrikiltir, Sanzman Klima e Lanvironnman Mr Flavien Joubert e osi delegasyon ki pe akonpany li e mon swet byenveni Mr Kevin Nancy, *PS* pou Lagrikiltir, Ms Linetta Joubert *Chief Officer* pou Departman Lagrikiltir, Mr Raymond Coralie *Store Director* Departman lagrikiltir.

Mersi pou zot prezans nou a pran zot keston ki lo nou *Order Paper*. Premye lo 130 Onorab Francois Adelaide.

HON FRANCOIS ADELAIDE

Mersi Mr Speaker. Bonzour Mr Speaker. Bonzour Minis avek ou delegasyon. Tou Manm Onorab espesyalman bann dimoun Val Den Dor bann ferme. Mr Speaker mon keston i al koumsa;

Eski Minis responsab pour Lagrikiltir i kapab donn detay Lasanble Nasyonal, lo sityasyon aktyel proze irigasyon pour konekte bann ferme Val Den Dor avek sa bann nouvo rezervwar ki'n ganny kree tou dernyerman pour ede rezourd sa problem mank delo, sirtou pour bann proze lagrikiltir dan sa rezyon? Mersi.

MR SPEAKER

Mersi Onorab. Minis nou repons.

MINISTER FLAVIEN JOUBERT

Mersi Mr Speaker. Bonzour Mr Speaker. Bonzour bann Manm Lasanble Nasyonal e osi bonzour tou bann dimoun ki pe ekoute.

Mr Speaker sa proze ti ganny inisye par lasosyasyon ferme Val Den Dor avek COMESA, ki ti osi ganny ranforsi avek sipor UNDP anba en proze ki apel *Eco-system Based Adaptation project (EbA)*.

Sa proze i konpri konstriksyon 2 tenk beton avek

kapasite 320mil lit e sa i pou benefisye apepre 80 fermye dan sa rezyon. Proze irigasyon pou konekte bann fermye Val Den Dor avek sa bann nouvo rezervwar i aktyelman dan son staz final.

E sa proze i konpri 2 konponan prensipal. Sa i lenstalasyon rakor pou anmenn delo dan sa rezervwar, en laliny ki sorti dan sours Bougainville pou alimant sa rezervwar delo ki sitye pres kot laferm Mr Balthilde e en lot laliny sorti dan en baraz ki'n fek konstrir, pou alimant sa rezervwar ki sitye Dan Merl.

Lot konponan se enstalasyon laliny sorti dan sa 2 rezervwar pou distribye delo kot bann fermye dan sa rezyon.

Mr Speaker Departman Lagrikiltir in rankontre serten retar pou enplimant staz final sa proze, akoz en mankman rakor sa groser ki nou ti pe rod 2 pous lo marse lokal.

Depi milye 2019 ziska Zilyet 2020, ti napa okenn furniser ki ti kapab vann sa Departman okenn rakor sa groser ki nou ti pe rode.

Swivan larive en lo rakor 2 pous lo marse lokal an milye mwan Zilyet sa lannen, Departman Lagrikiltir in inisye bann prosedir e in fini ganny dan laprouvasyon pou aste en total

2.7kilomet rakor ek bann pyes neser pou konplet sa proze.

Aktyelman peyman pe ganny fer. Nou ekspekte ki sa semenn peyman i a kapab fini konplete. Kontrakter pou met sa sistenm irigasyon an plas o pli vit posib, de ki sa peyman i fini ganny fer e materyo in pare pou travay.

Departman Lagrikiltir i anvizaze konplet sa proze par lafen katriyenm kar sa lannen. Mersi Mr Speaker.

MR SPEAKER

Mersi. Onorab Adelaide ou annan siplemanter.

HON FRANCOIS ADELAIDE

Yes, Mr Speaker. Minis mersi pou donn mwan sa bann detay lo sa proze. Parey ou'n dir esperon ki sa proze i ava konplete dan sa dele letan, e bann fermye i ava kapab benefisye avek servis delo. Petet zis en pti kestyon, akoz mon ti annan bokou siplemanter be ou'n reponn.

Pour 2019 ziska 2022, ok ou dir mwan ti napa rakor, be selman dernyen-r-er zot in gannyen. Me selman mon konpran poudir ti annan en problemm avek *Procurement*.

Eski i vre sa ouswa poudir keksoz in rezourd, akoz sa kestyon in vin kot zot e

dernyen-r-er le petet mon war keksoz in larg en pe?

Eski ti annan sa problemn avek *Procurement* e la eski ou kapab dir nou si parey ou pe dir tou keksoz in annord e *hopefully* bann zabitan parey ou pe dir, i a finalman ganny sa proze pou ed zot fini zot laferm? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou sa pwen siplemanter.

Onorab i pa'n vreman annan okenn problemn avek *Procurement*, prosedir standar in ganny fer, me letan sa prosedir in ganny fer ti napa materyo e alors sa prosedir ti ganny abandonnen. E apre letan materyo in vin lo *market* sa Departman in ganny enformen e Departman in relans prosedir avek *POU* e finalman nou'n ganny laprouvasyon pou aste. Me nou konnen poudir dan sa dezyenm staz ler nou'n refer sa 3 prosedir, ti annan zis en *supplier*. Letan i annan zis en *supplier* i annan en ta kestyon ki ganny demande aköz napa lezot, eski ou'n fer demann avek

lezot dimoun eksetera, eksetera.

E i annan plizyer tranzaksyon e ale retour ki ou bezwen fer. Me finalman procurement in konpran poudir napa ankor sa bann materyo lo *market*, e i pa pou annan dan en letan ki vini la e alor nou pran tou sa ki nou annan e nou peye e nou fer li. Alor sa ki'n arive i annan en pe retar, me nou pou war ki avek sa rapor ki nou'n gannyen la, nou a kapab met sa proze anba kontrol e bann dimoun ava ganny zot delo. Mersi.

MR SPEAKER

Mersi Minis. Mon oule dir bann manm ki mon annan 15minit par kestyon ozordi bomaten. Onorab Arissol.

HON PHILLIP ARISSOL

Mersi Mr Speaker. Bonzour Minis avek ou delegasyon. Bonzour bann lezot *MNAs* e lezot bann dimoun ki pe ekout nou. Minis eski ou kapab dir nou ki difikilte ki bann zofisyè irigasyon kot Lazans Lagrikiltir pe rankontre, ou ki pe kontinyelman rankontre pou fer *maintenance* lo bann sistenm irigasyon, ouswa pou enstal bann nouvo proze irigasyon pou lagrikiltir dan sa revizyon? Mersi.

MR SPEAKER

Mersi. Nou'n larzi e pti pe lo kestyon Val Den Dor la. Minis nou a pran kestyon pou letan ki nou annan.

**MINISTER FLAVIEN
JOUBERT**

Mersi Mr Speaker. Mersi Onorab pou kestyon. Mr Speaker difikilte i prensipalman abilite e kantite dimoun i annan pou fer *maintenance* lo sistenm, Departman Lagrikiltir i annan lezot sistenm ki pe planifye poi investir ladan, par egzanp i annan sistenm laponp kot nou'n fini anmenn laponp dan pei pou nou fasilite koneksyon delo pou bann lezot pti sours.

Me aktyelman i en kestyon kapasite nou bann dimoun e menm tou resaman bann dimoun ki fer regilasyon i fer nou konpran ki i annan en problemanm transpor pou zot deplase, akoz nou ganny en kantite demann par egzanp dan wikenn, dan aswar e letan i annan lasesres kot zot bezwen deplase vitman p kapab fasilite akse avek delo.

Alor i annan, dan nou Departman li menm i annan enn de sa bann difikilte. Me Departman osi pe travay lo amelyor fonksyonman Departman. *PS* pe fer sa zefor e

mon krwar avek sa bann azisteman ki nou pou fer, nou pou war ki nou kapab annan en pli bon reaksyon letan nou annan bann sityasyon kot i konsern delo.

E parey mon'n dir avek sa bann nouvo sistenm ki nou met an plas, nou ekspekte ki nou annan en plis bon *maintenance* e en pli bon sistenm e nou a ganny nou plis fermye ki pa bezwen las latet e zot a ganny ase delo pou siport zot bann aktivite. Mersi.

MR SPEAKER

Mersi Minis. Onorab Woodcock.

HON WAVEL WOODCOCK

Mersi Mr Speaker. Bonzour Minis ek ou lekip e tou dimoun a lekout. Minis an vi ki ou Minister pe antreprann plizyer proze irigasyon lo Mahe, pou konekte fermye avek delo enkli Val Den Dor, eski ou Minister pe osi konsider rezourd problemanm delo lagrikiltir lo blok Amitie Cap Samy e Cote D'Or Praslin? Mersi.

MR SPEAKER

Mersi. Minis repons silvouple.

**MINISTER FLAVIEN
JOUBERT**

Mersi Mr Speaker. Mersi Onorab pou kestyon. Mr

Speaker mon annan lalis irigasyon la. Lo mon lalis i annan 17 proze ki pe ganny planifye e parmi mon pe gete i annan omwen 1,2,3,4,5 omwen 6 sa bann proze ouswa 5 sa bann proze, ki aktyelman Praslin.

Alor lo lalis priyoriter pou irigasyon ki sa Departman pou travay lo la, nou pe koz St Joseph, Baie Ste Anne, Amitie Grand Anse, Mont Plaisir - bann landrwa parey, alor i pou annan proze pou Praslin e nou kapab donn ou en poi bon lendikasyon egzaktman lekel sa bann proze e ki bann fermye ki pou deservi. Mersi.

MR SPEAKER

Mersi. Onorab William.

HON WAVEN WILLIAM

Mersi Mr Speaker. Bonzour Minis avek ou lekip. Minis mon'n ekout ou avek latansyon, mon anvi ki ou eklersi avek sa Lasanble akoz Prezidan dan *press conference* in dir ki i annan dimoun pe trenn lipye, e mon vwar poudir dan en lespas 2 an rakor 2 pous dan en lespas 2an pa'n kapab ganny enporte e mon anvi konnen avek ou lekel ki pe trenn lipye? Mersi.

MR SPEAKER

Mersi Onorab. Minis.

MINISTER

FLAVIEN

JOUBERT

Mersi Mr Speaker. Mersi Onorab pou sa kestyon. Onorab mon pa'n *investigate* lekel ki pe trenn lipye, me selman mon konnen poudir Departman i pa'n enplike dan enportasyon rakor dan sa peryod letan e sa i kler. E Departman ti pe depan lo bann fourniser lokal akoz *POU* anba bann Lalwa *Procurement* i demann nou, pou al rod kotasyon kot bann dimoun ki kapab furni sa bann materyo avek Gouvernman, e zot a kapab ganny servi pou bann proze ki Gouvernman pe fer.

Alor Departman in fer sa demars, Gouvernman, *sorry* bann fourniser ti napa, e menm nou'n al apros bann fourniser enn par enn, me zot in dir nou non, zot pa kapab ti annan problem bato, ti annan diferan kalite *issue* e la prezan resaman ki in annan materyo lo marse.

Lot keksoz ki nou kapab debloke pour ki dimoun pa trenn lipye nou kapab fer keksoz mars pli byen, se Departman i komans enport son prop materyo. Me nou pa'n fer sa demars, akoz i pa vreman enn bann keksoz ki nou fer pou bann keksoz parey rakor ki nou

konnen e i annan normalman lo bann marse lokal.

So mon pa pou kapab deklare lekel ki ti pe trenn lipye, me selman in annan retar dan *supply* materyo lo marse lokal. E mon krwar nou fason ki nou fer *procurement* i en bann keksoz ki met nou a en dezavantaz. Mersi.

MR SPEAKER

Mersi. Onorab Loizeau.

HON NORBERT LOIZEAU

Mersi Mr Speaker. Bonzour tou dimoun. Mr Speaker mon anvi demann Minis vi ki sa proze *water catchment* i en proze ki *UNDP* ti finanse mon krwar depi bann lannen 2017. Mon rapel sa klerman aköz 3 mon zabitan Bel Air bann manrmay Sans Soucis ki ti fer sa proze.

Alors Minis mon anvi demann ou dan sa proze *water catchment* ek rakor, konbyen ki Gouvernman li in antre ladan pou finanse e konbyen ki *UNDP* li in finanse pou sa?

E si osi Minis, eski zot ankor annan en konversasyon avek sa bann lorganizasyon enternasyonal, vi ki mon war nou pe ganny problem rakor, finansman pou isi laba pou zot kapab ed nou ankor pou nou kapab fer sa bann proze par egzanp lo Praslin ki Onorab

Woodcock pe demande? E dan tou bann landrwa ki nou annan problem delo pou lagrikiltir? Mersi.

MR SPEAKER

Mersi Onorab. Minis.

MINISTER

FLAVIEN

JOUBERT

Mersi Mr Speaker. Mersi Onorab pou sa kestyon. Mr Speaker fodre nou konpran *UNDP* i pa en lorganizasyon ki finanse li. *UNDP* i enn bann Lazans Nasyon-z-Ini ki akse fon de lapar bann pei. Sa larzan mon krwar i sorti anba Fon Adaptasyon ki Sesel in aksede avek permisyon ki nou, nou annan koman en pei pou akse s afon atraver an servan *UNDP* e osi *COMESA* atraver en *Grant* ki ti donneren pou sa proze.

Me parey mon'n sey fer sorti problem i pa ti en problem napa larzan. Problem se en problem ki nou ti'n pas dan en peryod ki zot ti napa materyo lo marse lokal, pou nou aste. Larzan in la li, e an 2021 sa larzan ti la, me i ti napa materyo pou aste lo marse lokal.

Alor keksoz ki nou bezwen gete, se ki mannyer nou pou akse materyo letan i napa lo marse lokal?

Me selman Mr Speaker mon konpran kestyon Onorab, Lagrikiltir i annan lezot demars ki nou pe fer avek bann lorganizasyon menm *UNDP*, kot nou oule lans ankor dan bann lezot proze ki pou benefisye ankor *farming* dan pei. E nou pe koz en proze ki nou pou ale pou *Climate Smart Agriculture* ki nou'n fini fer diskisyon avek en delegasyon *FAO* ki'n vin isi.

Nou'n fer diskisyon avek *UNDP* e nou ti oule met sa ansanm pou nou al rod en sonm - en bon sonm pou ede fer bann lezot proze lo Mahe, Praslin e La Digue par egzanp, pou ed lo irigasyon ek bann lezot keksoz, ki nou a kapab fer remonte ankor bann fasilite pou bann fermye.

Me parey mon'n dir Onorab pou retourn kot ou kestyon nou pa ti bezwen sa bann larzan pou nou deblok sa bann proze dan sa ka. Mersi.

MR SPEAKER

Mersi. Mon pas lo prosen kestyon. Kestyon limero 131 Onorab Egbert Aglae.

HON EGBERT AGLAE

Mersi Mr Speaker. Bonzour Minis ek *panel* ek tou dimoun a lekout. Kestyon i lir come swivan;

Etandonnen bann mankman lo *Store* Lagrikiltir, eski Minis i kapab dir ek sa Lasanble ki *status* aktyel nou *Store* Lagrikiltir? Ki bann mezir ki i annan an plas pou garanti konsistans dan *supply* e osi stabilite dan pri abordab ki a benefisye nou bann fermye? Mersi.

MR SPEAKER

Mersi. Minis repons silvouple.

MINISTER FLAVIEN JOUBERT

Mersi Mr Speaker. Mersi Onorab pou ou kestyon. Mr Speaker mon krwar enn bann keksoz ki mon'n deza koz lo la DA Lasanble letan nou'n koz lo lagrikiltir se ki, *store* i enn bann *challenge* ki'n la e ki in koz en pe problenm pou sa Departman. Nou pe fe *manner* pou nou amelyor sityasyon. Parey mon'n eksplike dan lepase noun amelyor sistenm levanter, nou'n aktyelman dekouver par egzanp ki i annan R2milyon *write-off* ki sa *store* in bezwen *write-off* aköz lafason ki nou'n *manage* bann stok.

Nou'n sanz *Management* resaman e i annan lezot keksoz ki nou pe fer pou nou fer grosi sa *Revolving Fund*. Aköz enn bann keksoz fondamantal ek sa

store se ki sa *Revolving Fund* ki siport li dan lepase in toultan pe deklinen. Nou pa kapab annan en *Revolving Fund* ki pe deklinen.

Mon pe prezimen Mr Speaker ki sa lannen i pou premye fwa ki ou pou komans kapab fer sa *Revolving Fund* grosi. E petet sa i a kapab ed nou lo kote store e ed nou lo kote *supply*.

Me zis pou retourn lo kestyon egzakt Onorab Mr Speaker, Departman Lagrikiltir i ti a voudre zot - enform Lasanble ki tou dernyeran nou'n kapab fer vini 3 *consignment* prodwi, enn par bato e 2 *consignment* spesyal par avyon, vi ki ti annan retar ek transportasyon maritim pou asire ki nou annan sifizaman prodwi lo *store*.

Depi 3 semenn pase i annan en lo pestisid ki'n antre dan pei par *air freight* e sa in fini ganny distribye lo tou bann *store* lagrikiltir ki enkli Praslin. E i a laporte tou bann fermye anrezistre. Nou kapab osi konfirman ki apre en pe letan, serten prodwi esansyel ki enkli langre partisip, *shade cloth* ki ti'n fini pas komann, in osi ante dan pei per *sea freight* sorti Sidafrik.

Sa bann prodwi i ekspekte ganny delivre lo *store* prensipal

Grand Anse Mahe pandan sa semenn. I pou ganny distribye lo lezot store osi tou ki bann prosedir administrative i konplete.

En lot *consignment* langre Mr Speaker prensipalman *MPK* sorti Lalmanny, in osi fini antre dan pei semenn pase par *sea freight* e Departman Lagrikiltir i dan prosedir fer tou bann *clearance* nesaser pou met sa bann prodwi a laporte bann fermye.

En katriyenm *confinement* Mr Speaker i en lot *consignment* langre ankor *MPK* ek *Well Grow* ki'n fini ariv lo *store* prensipal sa semenn sorti kot en fournisseur lokal. E menm prosedir pe ganny fer pou asire ki sa prodwir i ganny met a laporte bann fermye anrezistre, pli tar semenn prosen.

Mr Speaker parey mon pe dir nou pe fer tou nou posib malgre bann difikilte pour ki nou kapab remet keksoz lo sa nivo apre sa bann difikilte ki nou'n pas ladan, e fer ki nou annan en bon stokaz dan sa *store* e li menm. Kot dezyenm morso kestyon;- ki bann mezir ki an plas pou garanti konsistans en *supply* e osi stratezi stabilite dan pri?

Mr Speaker Lagrikiltir pe kontinyelman antreprann serten reform, pou fer ki i mars

pli konsistan avek bann bezwen bann fermye.

Prosedir pou stabiliz loperasyon *store*, pou garanti konsistan dan provizyon bann prodwir esansyel i enkli, sanzman dan *management store*, relans *Inputs Committee* kot Departman, ki dapre mwan i pa ti pe fer ase en bon travay pou kapab gid Departman lo kalite e kantite prodwir ki merit ganny met lo market e tre kritik i pa ti pe konekte ase byen avek *extension service* pou konn bezwen bann fermye lo teren.

Mr Speaker nou pe osi reviz lalis bann fournisseur - savedir bann *suppliers* ki pe avek ki nou pe aste materyo. Enn bann desizyon ki nou'n bezwen pran, se ki nou pou arete aste materyo sorti Sidafrik.

Sa i akoz i tro difisil poi nou fer materyo ariv Sesel e avek sa bann difikilte ki nou'n gannyen avek bato resaman, nou war li i enposib pou nou kontinyen aste enn sa marse ziska ler kekfwa keksoz a sanze.

Mon a donn en legzanp Mr Speaker e Onorab, sa *consignment* ki'n arive isi ozordi par *sea freight*, i ti sipoze kit Sidafrik depi le 23 Zen. E se la prezan ki i ariv dan pei, akoz bann bato i mank larou i sot Sesel zot pa anmenn nou bann

kargezon e an menm tan nou bezwen pey *storage* letan sa bann materyo i reste ater lo por.

Alor nou pou bezwen sanzman nou bann fournisseur e rod nou bann fournisseur ki nou konnen nou kapab ganny en laliny direk, e zot kapab donn nou materyo pli vit ki nou kapab restoke dan *store*.

Nou pe osi investir dan sistenm levanter stok ki *digital*, e sa i en keksoz ki nou pe fe ek *DICT*, pour ki nou kapab vin pli proaktiv, e konpran letan bann stok pe desann e osi evite ki nou annan stok ki gate e ki ganny zete ouswa *write-off*. E parey mon dir Mr Speaker lot keksoz se ki sa *Revolving Fund* dan lepase Minister ti ganny donner R5milyon avek Finans.

E apre zot ti sipoze servi e ranplas an mezir ki nou vann. Me nou ki nou vwar *Revolving Fund* in kontinyelman desann, nou'n sanz la fason ki nou pe fer nou bann *pricing* e nou pe ekspekte ki la avek sa bann nouvo *pricing*, nou *Revolving Fund* i a stabilite e fotespere i ava kapab komans grosi. E sa i a permet nou stok pli regilye, e stok plis osi lo *store* - plis varyete e materyo lo *store*.

An plis ki sa Mr Speaker nou pe travay pros avek *POU*, pou etabli bann mezir pou fasilite *procurement* dapre Lalwa,

pou evite ki i annan retar dan aprovizyonman lo *store*. Sirtou letan nou realize ki *store* lagrikiltir, pe fonksyonn an prensip parey en laboutik.

Ou pe aste materyo, ou pe revann ou pe ganny larzan pou ou apre restoke ankor. E alor nou bezwen fer sir ki nou pa pri dan bann prosedir *procurement*, ki anpese ki nou kapab met materyo dan sa landrwa ase vit.

Zis en lot pti remark Mr Speaker, se ki i enportan note ki sa departman i annan en sistenm SMS pou enform fermye lo tou bann lenformasyon esansyel lo lagrikiltir, e nou pe fer sorti bann nouvo lenformasyon pou zot lo bann nouvo prodwir an mezir i antre dan pei. Mersi.

MR SPEAKER

Mersi Minis. Ou siplemanter Onorab Egbert Aglae.

HON EGBERT AGLAE

Minis mersi pou ou larepons. Minis an term bidzeter ou'n koz lo sa *Revolving Fund* eski ou Minister ou departman in asize pou revwar bann *figures* ki relye avek bann provizyon *store* li menm lo en baz anyel?

E ki la ou ava kapab vin avek en *capping* en Bidze li menm li, pou kapab asire ki larzan i *available* e ki bann

procurement i ganny fer atan malgre bann defi ki ou'n nonmen?

Dezyenman Minis, i annan serten konsern ki malgre i annan bann provizyon ki antre dan pei, bann fermye pe konplent lo kalite osi. Eski dan sa bann prosedir ki zot pe fer zot annan sa *oversight*, pou vwar ki prodwir ki zot pe fer vini - sirtou la parey i annan *issue* pestisid ki pa pe neserman *meet* avek sa demann, e kalite pyes ki annan ki fermye pe konplent pa pe marse, eski zot pe fer bann letid osi pou vwar kalite osi ki zot pe fer vini?

E dernyerman Minis, eski *store* i annan li en parey nou dir i annan en *agronomist* ki petet relye avek Departman pou fer ki kalite ki zot pe fer vini, la kantite osi ki ou bezwen baze bann enteraksyon ek bann fermye, i reste relevan e osi i ava anpese ki i annan bann prodwi ki pou bezwen ganny zete parey ou'n nonmen R2milyon ki pou perdi la. Mersi.

MR SPEAKER

Mersi Onorab. Minis silvouple.

MINISTER

FLAVIEN

JOUBERT

Mersi Mr Speaker. Mersi Onorab pou sa 3 pwen. Onorab

larzan ki nou pe ekspekte servi pou 2022, i a pepre R8.8milyon depans, e sa i san kont bann azisteman ki nou pou bezwen fer, dan kalite e varyete prodwi en? Sa i zis avek nou lalis standar ki nou pe travay avek.

Sa *Revolving Fund* si nou anmenn li byen i pou ase pou nou kouver sa sonm, akoz nou pou pe peye, pe aste e pe vann an menm tan. E nou ekspekte ki ou pou kapab mentenir li lo sa nivo. E sa direksyon ki nou'n pran lo kote *pricing*, mon krwar i po ed nou sot sa sonm dan bann lannen ki pe vini e nou ava war nou ase konfortableman avek ase larzan, pou fer sa bann *procurement* e vann avek fermye a en pri rezonnab.

Kot i konsern *forecast* osi mon a zis dir en lot pti keksoz se nou pe aktyelman sanz nou *suppliers* pou nou ganny en pli bon pri, akoz ki ou pe war se ki nou pe aste avek bann *middlemen*, e nou pa pe ganny en bon pri ki letan nou met an *market* lo la, nou pa kapab met en gro *market* akoz nou'n deza fini pe pey en profit lo la.

Alor nou pe sanz nou *suppliers* pou nou al pli pros avek kot bann keksoz i ganny fabrike, pour ki nou kapab ganny en pli bon pri. E apre nou kapab met en *market* ki

rezonnab pour ki nou kapab fer nou *Revolving Fund* fonksyonnen.

Lo kote kalite Mr Speaker, nou'n tande serten komanter lo kote kalite, me selman mon kapab asir ou poudir bann prodwi resan ki'n ganny anmennen lo *store*, i bann prodwi ki sorti kot bann fournisseur ki'n ganny aksepte dan plizyer pei, e osi sa bann prodwi i annan plizyer bann prive ki pe fer vini sa bann prodwi ozordi.

Alor mon pa ekspekte ki i annan en gran problem kalite. Me selman si i annan en problem kalite notifie zofisye, zofisye i a kapab vwar ki manner, kwa ki pe koz sa problem. Nou konnen poudir i annan serten prodwi lo *market* ki pa lo sa bon kalite, me selman i pa Departman ki pe *supply*.

Lo kote *agronomist*. Mon'n koz lo *inputs committee* e lo nou *inputs committee* i annan *agronomist* e se pour sa rezon ki nou pe re aranz sa *Inputs Committee*, pour ki nou donn en pli bon gidans sa *store* pour ki a kapab stok sa ki fermye i bezwen enkli ki sa bann lenformasyon ki sorti kot *extension service*. Mersi.

MR SPEAKER

Mersi. Mon pran siplemanter Onorab Woodcock.

HON WAVEL WOODCOCK

Mersi Mr Speaker. Minis pandan *recess* mon'n ganny sans fer diskrit avek plizyer fermye, sirtou lo blok Amitie. E i annan en gro konsern kot in konsern mank materyo lo *store* sirtou langre, legren e pestisid.

E sa i en *issue* en konsern ki'n la pou en bon pe lannen. Annefe i menm arive parfwa kot menm si stokaz in arive lo Mahe, swa i pran letan pou ariv lo Praslin, ouswa nou pa gannyen lo Praslin e mwan Out in annan en gran mank lo *store* annefe.

E mon kestasyon i Minis konmsi donn nou en - si ou kapab dir nou ki zot pou fer vreman, pou zot ede rezourd sa *issue* ki i pa a repet ankor, akoz tanzantan nou rankontre sa difikilte kot bann fermye i konplent ki i mank materyo lo *store*? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou ou kestasyon. Mr Speaker mon annan avek mwan *store manager*, mon pa konnen

si i pou anvi koze, me petet mon a koz lo son *behalf*.

Nouvo *store manager* e Mr Coralie i enn bann rezon ki nou pran Mr Coralie koman en nouvo dimoun se nou oule ki i annan en nouvo lenerzi, ek en nouvo fason fer dan *store*. E lenstriksyon se ki deswit koman materyo i arive fodre ki i ganny distribye partou.

Semenn pase nou ti pe koz avek en fermye Amitie e nou ti'n tonm dakor ki materyo pou ariv lo *store* dan sa semenn. Mr Coralie i a kapab konfirman si bann keksoz in ganny *dispatch* pou ariv Praslin. E osi nou prosedir parey mon'n dir atraver nou amelyorasyon ki nou pe fer, nou bezwen fer sir ki nou *streamline* en pe nou prosedir, ki sa *store manager* i ganny plis liberte pou li fer sa ki i bezwen fer olye ki i bezwen toultan i bezwen rod *approval*.

Mon ti dir sa en fwa dan lepase letan mon ti vin Lasanble ki Departman Lagrikiltir, i en bann problem ki mwan mon'n remarke se ki toultan sak desizyon nou bezwen al kot PS pou fer desizyon.

E PS i war li ankonbre avek en kantite keksoz ki dimoun pe vin demann li pou fer desizyon. Sa bann desizyon i devret pe ganny pran kot sa dimoun ki pe fer fonksyonnen

sa morso lagrikiltir, e dan sa ka se *store manager* ki fer son travay e asire ki son bann prodwir i ariv lo Praslin. Mr Coralie pa kapab zis konfirman si materyo in aktyelman arive lo Praslin. Mersi.

MR SPEAKER

Wi Mr Coralie ou kapab zis konfirman silvouple.

STORE DIRECTOR
DEPARTMENT OF
AGRICULTURE RAYMOND
CORALIE

Bonzour tou bann Onorab. Tou bann materyo pestisid, ensektisid *herbicide* in fini ariv Praslin depi 2 semenn pase e anvant avek tou bann fermye. Mersi.

MR SPEAKER

Mersi. Mon a pran kestyon Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Tou koleg Onorab e byensir zabitan Zil Pros ki a lekout.

Zisteman, mon kontan tande ki Mr Coralie i dir tou sa bann prodwir in ariv lo *store*, me selman on ti a kontan ki annan ase ki ler bann fermye la Digue i deplase pou vin Praslin, zot pa fer sa *trip* anven. Minis

eski zot get *lifespan* zot bann prodwi ki zot pe stoke?

Akoz i annan konplent sorti kot fermye La Digue ki dir ki zot aste legren me legren in *expire*. E eski zot annan en prosedir *refund*, akoz ler zot vin rod *refund* zot ganny dir fodre zot al pi o, me zot pa konnen ki bor pli o pou zot ale. Mersi.

MR SPEAKER

Mersi. Minis.

MINISTER FLAVIEN
JOUBERT

Mersi Mr Speaker. Mersi Onorab pou sa 2 pwen, enn se eski i annan ase pour fermye La Digue.

Mr Speaker nou laranzman ki nou annan avek fermye La Digue se ki zot fer kontak avek *Extension Officer* lo Praslin e nou, nou ti'n deza donn lenstriksyon ki *Extension Officer* i transport materyo sorti Praslin. E nou ti'n ganny en fasilite stokaz Linyon pou nou kapab met sa bann prodwi ladan, e letan bann dimoun Praslin dapre zot komann ki zot in plase zot kapab zis bon ki kolekte lo La Digue menm.

E sa i en lenstriksyon ki ankor la, e bann fermye La Digue i kapab zis fer kontak avek sa Zofisye *Extension* zot kote lekel li lo Praslin e i ava

donn zot ki La Digue regilyerman nou le semenn e i a kapab anmenn sa ban materyo a apre zot ava kapab kolekte lo La Digue menm.

Lot keksoz Mr Speaker se eski i annan en problem *lifespan* ek prodwir sirtou legren? Dapre sa ki mon konpran i annan *germination test* ki ganny fer lo bann legren e i pa sipoze annan sa bann problemm avek bann *batch* ki pe ganny vann. Me selman si i annan en problemm mon pa pou ensiste lo *refund*.

Me mon ava koz lo ranplasman si vreman i annan en problemm avek en *batch*, e sa problemm i ganny notifie avek Departman. I parey nenport ki prodwi si ou'n vann en dimoun en prodwi dan en laboutik e i annan en problemm avek, byensir i ou devwar pou donn li en lot prodwir pou li kapab fer sa ki i ti'n *plan* pou fer.

Alor mon pe mazine koumsa si i annan en problemm a dimoun i kapab retourn avek son pake lagrenn e Departman Lagrikiltir i ava fer le nesaser. Mersi.

MR SPEAKER

Mersi Minis. Nou bezwen termin la pou sa kestyon. Nou a rebran lot kestyon 11er 10. Mersi.

(BREAK)

MR SPEAKER

Nou pou rebran kestyon. E avek Minis pou sa seri kestyon nou annan Mr Joel Valmont, *Chief Executive Officer PUC*. Kestyon 132 Onorab Richard Labrosse.

HON RICHARD LABROSSE

Mersi Mr Speaker. Bonzour Minis ek ou delegasyon. Bonzour tou manm prezan e bonzour tou dimoun ki a lekout espesyalman zabitan mon distrik Plaisance. Minis kestyon limero 132 i sorti Plaisance i *comme swivan*;

Etdonnen ki i annan zabitan ki pe sibir problemm sanitasyon e menm serten ki zot plan lakaz pa pe ganny aprouve, akoz lokasyon *sewage tank* lo plan, eski Minis pour Lanvironnman, ki *PUC* i tonm anba son parasol, i kapab eksplik Lasanble an se moman ki bann dernyen demars pour enstal sa system *STP* dan distrik Plaisance? E kwa ki pe met retar ek sa proze? Mersi Mr Speaker.

MR SPEAKER

Mersi Onorab. Minis repons *please*.

MINISTER **FLAVIEN**
JOUBERT

Mersi Mr Speaker. Mersi Onorab pou ou kestyon. Mr Speaker kouvertir sistenm *sewage* dan Plaisance i tre limite. E sa servis an se moman i pe kouver prensipalman *housing estate* dan rezyon Dan Kan. Pou kouver plis lakaz, nouvo tiyo pou bezwen ganny enstale, serten stasyon laponp pou bezwen ganny agrandi.

PUC i estimen ki pou kout anviron R81 milyon pou agrandi sa sistenm *sewage* e permet koneksyon pou 1034 lakaz dan rezyon Plaisance avek La Louise. Mr Speaker a ler aktyel *PUC* ion fer resorti ki i dan demars pou rekonstrir stasyon laponp Roche caiman, avek sa lot sitye obor *Intelvision* an vi ki zot dan en leta kritik e i pa pratik pou met plis presyon lo sa 2 lenfrastriktir.

PUC pe al osi antreprann en *refurbishment* mazer lo sa stasyon tretman Providence. Sa louveraz pou pran anviron 1an a 2an pou konplete apre ki kontra in ganny sinyen. *Tender* pou stasyon Providence in fek ganny pibliye dan mwan Zen e demars pe ganny fer pibliy lot *tender* pou stasyon laponp.

Mr Speaker i pa tro apropriye si *PUC* i kontinyen agrandi sistenm *sewage* avan

adres defayans dan bann lenfrastriktir aktyel. Gouvernman ek *PUC* ki kontinyelman angaze dan zefor pou lasistans enternasyonal atraver *loan*, pou enstal bann lenfrastriktir *sewage* lo Praslin ek Mahe.

Lefe ki i annan en platform lo la kantite *loan* ki pei i kapab pran, alor *comme* priyorite *PUC* ansanm avek Gouvernman, in kapab angaz dan en *loan* avek Labank Envestisman Eropéen e osi Labank Afriken pou permet finansman sa bann Labank Afriken pou Devlopman pou permet finansman sa bann louveraz *refurbishment* lo sistenm Mahe ki mon'n mansyonnen avan, e osi en nouvo sistenm *sewage* pou La Digue.

Dan konteks spesifik Plaisance Mr Speaker, kot Onorab in fer referans, *PUC* i rekonnet problem ki bann propriyete ki bord avek lanmer pe fer fas avek, sirtou dan letan gran mare.

En letid preliminar ki *PUC* in antreprann dan sa rezyon, i monte ki i pou kout anviron R6milyon pou etabli en sistenm koneksyon *sewage* pou anviron sa 20 propriyete ki bord avek lanmer.

Baze lo sa sityasyon ki ganny konsidere koman kritik,

PUC pou byento komans demars *tender* pou enplimant sa sistenm koneksyon *sewage*, apre ki bann lotorizasyon neseseur tel ki *Planning* i ganny e donnen.

Lo sa ki konsern Plaisance an zeneral *PUC* ek Gouvernman i ava bezwen vwar dan bann Bidze fitir, si i annan posibilite pou komans enkli finansman pou en tel proze. Mersi Mr Speaker.

MR SPEAKER

Mersi Minis. Siplemanter Onorab Labrosse.

HON RICHARD LABROSSE

Wi Mr Speaker. Mon ti annan detrwa, me selman in reponn tou. Mon annan zis en la ki mon ti a kontan ganny en pri leklersisman lo la.

Minis en pti pe lannen pase i mon lenformasyon i byen 2018 apepre, ti annan en *Master Plan* ki apel *Comprehensive Sanitation Master Plan* ki ti ganny prezante. Mon krwar bann Manm Lasanble osi sa letan ti ganny en kopi sa, kekfwa an se moman ki nou pe koze la ki manner sa plan, pe ale pou son lenplimantasyon? Mersi.

MR SPEAKER

Mersi Onorab. Minis.

MINISTER

FLAVIEN

JOUBERT

Mersi Mr Speaker. Mersi Onorab. Mon pou demann avek ou permisyon Mr Speaker *CEO PUC* pou entervenir lo sa size *Master Plan* pou *sewage*. Mersi.

MR SPEAKER

Mersi. *CEO*.

CEO PUC MR JOEL VALMONT

Mersi Mr Speaker. Bonzour tou bann Onorab. Kot i konsern *Master Plan* pou *sewage* Mr Speaker sa ti en *design* ki kouver Mahe, Praslin avek La Digue an prensipal. E sa *Master Plan* i fer resorti ki pou kout environ R1.2bilyon pou etabli sistenm sanitasyon lo Mahe avek Praslin.

Sa 1.2 pa enkli La Digue aköz nou'n deza annan finansman pou La Digue. Lo ki konsern Mahe i annan en *design* ki vizit environ 10 *STP* e bann rezyon pli kritik i ganny kouver anba la. Enn bann pwen ki nou ti fer resorti dan sa *Master Plan* se pour adres lenfrastruktir aktyel dan Viktoria sa plan Providence.

Ek en pe sa bann stasyon laponp e sa i sa premye staz kot nou'n ganny finansman kot nou a pe fer sa lannen avek sa 2an ki vini. Tou dilon bann

loportinite ki prezante *PUC* i sey angaze avek bann bayer defon pou get loportinite pret larzan pou devlop sekter *sewage*. Me parey nou tou nou konnen sa tarif ki prezant son lekor ozordi i pa enn ki ankouraz repeyman sa bann lenvestisman ki nou bezwen. E nou bezwen war nou kot nou *rely* lo bann fon kot nou bezwen pret anba en kad ki apel kot *Sovereign Loan* kot Gouvernman i pret larzan.

E i pret sa *PUC* pou devlop sa bann sekter. E pou le moman nou ankour dan sa faz sey idantifye sa bann fon. Nou'n nobou etabli en *Agreement* avek *EIB* ek *AFD* pou get *refurbishment of existing system*, me nou pa ankour ganny en kadreman pou devlop or agrandi sekter *sewage* lo Mahe avek Praslin an deor sa ki nou pe fer lo La Digue. Mersi Mr Speaker.

MR SPEAKER

Mersi *CEO*. Nou a pran enn de bann siplemanter bann lezot manm. Onorab Roucou.

HON MICHEL ROUCOU

Mersi Mr Speaker. Bonzour a tous. Bonzour spesyal zabitan Mont Fleuri. Minis i annan sa proze *sewage* ki pe sorti Copolia ki'n deza ariv anler lo stenn Rochon, akoz ki i pa pe ganny

demare pou le moman in *stuck* lanmenm la anler?

Apré osi eski *PUC* i pe mazin poi li re rod ankour bann lezot alternativ lo kote *sewage* en pti pe pou petet bann lakaz ki en pti pe plis dan leo? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou ou keston. Onorab mon a zis pran sa dezyenm pwen ki ou'n koz lo la apre mon a donn laparol *CEO PUC*. Kot i konsern lezot solisyon, mon ti a voudre enform ou menm avek Lasanble, ki i annan bann diskisyon ki pe ganny fer pour gete ki mannyer bann lezot solisyon *sewage* i kapab ganny anmennen ki desantralize.

I kapab ganny anmennen pou bann *estate* sirtou, bann ki pa kapab konekte ouswa ki tro lwen avek *network*. E pou fer sa parey *CEO* in fer sorti nou pou bezwen idantifye finansman byensir, me i annan konsiderasyon ki pe ganny vwar lo kote sistenm, lo mannyer pou ganny administre, lo ki mannyer i pou ganny siporte finansyerman akoz i koute pou ou *maintain* sa bann sistenm.

E alor sa bann desizyon i ava ganny kominike an mezir nou progrese lo la e *PUC* osi byensir pou form parti en parti santral dan sa diskisyon. Mon a pas laparol avek *CEO PUC* pou li azout ankor lenformasyon. Mersi.

MR SPEAKER

Mersi. *CEO* lot pwen *please*.

CEO PUC JOEL VALMONT

Mersi Mr Speaker. Mr Speaker sa sistenm Copolia ek Rochon ki Onorab pe fer referans avek, in annan en pe serten difikilte pou nou fer ekstansyon dan sa rezyon. Parey tou lezot difikilte ki nou gannyen ek lenfrastruktir kot i konsern *utility*, *wayleave* i en *issue*, pas lo propriyete atraver propriyete, dan semen en lot *issue*.

Sa kot i konsern Copolia i annan en portfolyo, kot nou ti pe fer en proze an konbinezon avek Minister Later. E mon pa kapab donn en komitman la, me selman a mon ava re vizit sa konponan, pou nou get ki mannyer ou kapab sey *extend* ankor en pe dan sa lannen ki vini pou anmas bann lezot konsonmater.

I pa en sistenm fasil, aköz menm difikilte nou pe gannyen avek sistenm delo dan sa rezyon. Mon pou bezwen sey re

vizit sa apre re anmenn en pe plis lenformasyon pou Manm *MNA* Mont Fleuri. Mersi Mr Speaker.

MR SPEAKER

Mersi *CEO*. Onorab Sandy Arissol ou kestyon.

HON SANDY ARISSOL

Mersi Mr Speaker. Bonzour Minis. Bonzour *CEO*. Mr Speaker mon ti a profite pou felisit *CEO* letan i la, e felisit *PUC* pou travay ki zot kontinyen fer pou asire ki nou ganny delo bann fasilite, elektrisite dan tou distrik.

Me letan nou la pe koz lo sistenm *sewage*, mon krwar i en keksoz ki'n lev dan plizyer fwa avek plizyer *MNA* e dernyen fwa ti Onorab John Hoareau Beau Vallon. I en size nasyonal e nou Bel Ombre nou'n komanse nou pa'n fini.

So kestyon ki mon ti a kontan demande Mr Speaker an vi ki mon'n tann *CEO* avek Minis koz lo bann *loan* kekfwa ki nou'n gannyen, zisteman pou asiste *PUC* dan sa travay, mon'n tann avek Labank Eropéen avek Labank Afriken, mon ti a kontan demann zot an vi ki i en problem mazer e nou, nou en pti zil ki annan en kantite delo e nou pe ganny ankouraze pou

plant dan lakour. E sa 2 keksoz pa ale ek kanmarad.

Eski Gouvernman i angaze Minis, oubyen zot annan en dele letan zisteman pou nou kapab dil avek sa sistenm *STP* nasyonal ki'n annan en plan pou plizyer lannen pou asire ki tou sa bann keksoz i ganny kapte en sel landrwa, e nou pa ganny ankore sa bann kestyon, e sa i ava pli osi pou Praslin avek bann demars ki zot pe fer pou La Digue? Mersi Mr Speaker.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou sa kestyon konsernan program Nasyonal pou *sewage*.

Parey *CEO* in fer sorti e mon a donn li laparol pou li koze apre, i annan en *Master Plan* pou sanitasyon. Me diskisyon i ankour mon krwar, in ler pou nou akseler sa diskisyon e fer ki nou annan en bon plan ki mannyer nou pou atak sa travay, e osi lekel bann ki a nou laporte ozordi. Akoz pa tou sa bann keksoz ki i pou a nou laporte finansyerman.

Nou bezwen konnen lekel ki nou kapab rezourd, e osi vin

avek en lanvlop finansyel pou kapab fer li ganny fer. E sa Onorab parey ou'n fer remarke i en keksoz ki'n ariv ler pou nou fer. E i en keksoz ki *PUC* ek bann lezot Lazans, nou pou bezwen dan sa peryod ki pe vini, petet menm an 2023 vin devan avek en plan pli kler lo lafason ki nou pou fer li.

Mon a pas laparol avek *CEO* pou li azout lenformasyon sirtou lo la fason ki zot pe get egzekisyon sa bann program salitasyon ki ti'n deza prevwar dan pei. Mersi.

MR SPEAKER

Mersi Minis. *CEO* wi ou kapab eklersi.

CEO PUC JOEL VALMONT

Mersi Mr Speaker. Mr Speaker kot i konsern *sewage* si oule konsern pozisyon stratezik, *PUC* nou war li lo 2 nivo enn, bann landrwa kritik kot i demann *extend* sistenm pou anmas sa bann landrwa.

E sa i bann priyorite ki nou vizite tou le lannen, an servan mwayen resours *PUC* li menm pou sey *alleviate* sa bann enkonvenyans ki dan sa bann landrwa. En legzanp i parey ou refer Beau Vallon - en kot legzanp i pou parey nou pou al fer Plaisance dan sa rezyon kot nou'n refer ek *MNA*.

Menm Bel Ombre in annan serten rekour ki nou'n fer lannen pase, apre in annan dan letan *COVID* dan rezyon *ex Khashoggi* e apre dan rezyon Beau Belle *phase 2*. I tou kot nou *budget* sa bann landrwa lo term kritik e nou prioritez en pe leklersisman dan sa sekter.

Kot i konsern adres li lo en nivo nasyonal Mr Speaker, i en zefor ki mou pe sey fer ansanm avek Gouvernman. Ozordi Sesel i ganny deklare koman en *high income country*. E a sak rekour kot ou apros bann baryer defon si ou permet mwan anmenn li koumsa, sa i ganny souleve an premye. E i fer ki larzan ki nou pou bezwen prete, i lo en to lentere pli eleve, konpare avek sa bann ki nou'n deza pran annavans e ki nou annan lo nou liv ozordi. So se sa ki pe fer li difisil pou enplimant sa plan nasyonal Mr Speaker.

Keksoz ki mon oule fer resorti i tarif ki i pa permet, repeyman sa bann *scheme* koumsa e la kot en legzersis en pe pli zeneral pe ganny fer kot pou nou kapab entegre sa bann plan investisman, an relyan li e ki mannyer nou pe evolye tarif *utility*, kot i konsern sey fer en *schema* pou ganny larzan e osi sa bann det ki nou pou bezwen pran.

Mr Speaker i pa fasil pou donn Onorab en *schema* spesifik pou dir li poudir 2024 nou pou'n in fini pret larzan pou rezyon Pointe Larue. Par egzanz 2026 pou rezyon Pointe Au Sel *and so on and so on*. I tou pou bezwen fer dan sa prosen 3 a 4an ki nou annan, pou sey etabli sa direksyon e *then* anmenn sa lo nivo piblik e donn plis lenformasyon lo la e ki mannyer nou pou prioritez sa lavans dan sa sekter sa sityasyon. Mersi Mr Speaker.

MR SPEAKER

Mersi. Mon a pran kestyon Onorab Cosgrow.

HON WALLACE COSGROW

Mersi Mr Speaker. Mr Speaker mon pou retourn lo distrik ki kestyon orizinal i lo la. Mon'n note ki i annan en plan pou en *sewage network* dan distrik Plaisance. E note osi ki son kou i apepre R81milyon pou kapab enplimante.

Me mon kestyon i eski i annan posibilite ki nou kapab fer li par faz? Tou an prenon kont i annan bann landrwa dan distrik Plaisance par egzanz Belvedere, sirtou en pe landrwa dan La Louise. Kot i vreman ankonbre. E kot i difisil petet

pou fer serten devlopman akoz sa problemn *sewage*.

So si i annan posibilite fer li par faz, ki *at least* nou kapab soulaz en pti pe sa bann rezyon. Me osi petet lo kote finansman, soulaz en pti pe zot lenvestisman ki zot bezwen mete.

E dezyenm Mr Speaker, eski i annan posibilite kolabor avek bann lazans par egzanp *PMC*? Akoz ou ava note dan serten vizit ki mon'n fer sirtou dan rezyon kot *Old People's Home*, i annan serten demars par *PMC* pou *capture* sa bann landrwa e met lo en sistenm *sewage* pou bann zabitan.

Akoz i annan pa mal problemn l kot i konsern *sewage*. So eski zot pare pou kapab kolabor avek bann Lazans parey *PMC*, pou soulaz en pti pe sityasyon bann zabitan? Mersi.

MR SPEAKER

Mersi Onorab. Minis ou repons *please*.

MINISTER FLAVIEN JOUBERT

Mersi Mr Speaker. Mersi Onorab pou sa 2 kestyon. Mr Speaker, mon pou les *CEO* koz lo la bout fer proze par faz ki'n ganny propoze pou Plaisance.

Me kot i konsern *PMC* sa diskisyon i deza pe ganny fer.

E parey mon'n dir nou ti ava voudre akseler li. E nou ti a voudre ki byento nou ava kapab vin avek en repons lo lafason nou pou atak bann problemn sistenm, bann defayans ek bann bout *network* ki bezwen ganny fer. E osi bann sistenm desantralize.

Sirtou pou kouver bann landrwa kot i annan for dansite lakaz. E sa i enkli bann *estates*. Alor sa diskisyon i ankour. E nou ava enform bann Manm Lasanble anmezir ki nou fer progre lo sa size.

Me nou espekte ki parey mon'n dir *PUC*, i pou enn bann lazans ki pou santral dan sa diskisyon. *CEO* pou sa premye parti *please*.

MR SPEAKER

Minis. Mersi Minis. *CEO* ou a eklersi sityasyon Plaisance briyevman silvouple.

CEO PUC JOEL VALMONT

Mersi Mr Speaker. Mon pou bezwen al en pe dan teknik pou eklersi sa Mr Speaker. Kot i konsern *extend* sistenm *sewage* par faz, i posib pou fer sa kot ou deza annan en sistenm ki deza in ganny etabli, pou li *accommodate* sa ekstansyon.

Me kot i konsern distrik Plaisance. Sa *main backbone* ki nou pou bezwen pou fer sa *accommodation of* koneksyon bann lakaz, i pa ankor ganny etabli.

E sa ki fer li sa kontrent pou kapab devlop sa proze par faz dan sa sirkonstans. Si Mr Speaker, *MNA* pe koz lo par faz kot nou vini nou met sa premye *artery*, sa premye kadreman ki nou bezwen apre pou azout bann lakaz.

Me i osi i vin avek en kou sitan eleve sa bout, se li sa bout ki pli ser. Ekstansyon parey nou pe fer dan Bel Ombre, dan Beau Vallon i pli apropiye pou fer en lapros par faz, akoz sa artikilasyon ki mon pe koz lo la i deza etabli.

Nou pou bezwen depans en pli gro larzan an avan. Met sa bann gro lenfrastruktir ki nou bezwen. Apre la fer li par faz. Sa nou konstren ozordi ki nou annan avek sa lapros Mr Speaker. Mersi.

MR SPEAKER

Mersi. Mon pou prezan pas lo prosen kestyon. Onorab Terence Mondon.

HON TERENCE MONDON

Mersi Mr Speaker. Bonzour Minis avek *CEO PUC*. Mon kestyon, an vi devlopman

touristik ki pe arive dan distrik Takamaka,

Eski Minis i kapab donn nou Lasanble zot prozeksyon lo demann pou delo trete pou sa rezyon? E ki provizyon zot pe fer pou soutnir sa bann devlopman? Mersi Mr Speaker.

MR SPEAKER

Mersi Onorab. Minis la parol pou ou.

MINISTER FLAVIEN JOUBERT

Mersi Mr Speaker. Mersi Onorab pou ou kestyon. Mr Speaker, *PUC* i rekonnet ki i annan plizyer gro letablisman touristik ki ekspekte ganny konplete pandan lannen 2023.

Banyan Tree dan distrik Takamaka ki dan en leta pli avanse, i enn parmi sa bann letablisman. Depi Zanvye sa lannen ziska Zen, *PUC* in rikord anviron 49 nouvo aplikasyon dan sistenm *planning* ki i pou bezwen servis delo ek elektrisite letan konstriksyon i konplete.

Ladan i annan 38 laplikasyon domestik. 4 laplikasyon komersyal, e 7 laplikasyon ki relye avek Lendistri Touris. Konpare avek lannen 2021 kot i annan 18 laplikasyon, sa i montre en logmantasyon par 31 ka.

An se ki konsern delo Mr Speaker, rikord *PUC* pou 2022 i montre ki an mwayenn demann delo pou distrik Takamaka, i anviron 1300 met kib par zour.

Sa i reprezant anviron 20 poursan lakantite delo ki ganny trete e distribye par zour, sorti dan sistenm Anse Boileau, Port Launay, Grand Anse e Lillete.

Fodre fer resorti Mr Speaker ki distrik Takamaka i resevwar delo trete sorti dan 2 gro rezervwar ki sitye anler Santa Maria Les Canelles. E ki mazorite sa delo i sorti dan sa bann stasyon tretman ki mon'n fek masyonnen.

Mr Speaker, *PUC* i estimen ki avek sa bann nouvo konstriksyon, demann delo pou ogmante dan distrik Takamaka pou sorti 1300 met kib par zour pou vin an mwayenn 1500 met kib par zour.

PUC i fer resorti ki son sistenm aktyel pou kapab permet delivre en tel ogmantasyon, pandan bann mwan kot i annan ase delo dan bann larivyer prensipal ki ganny servi pou prodwir delo trete.

Normalman sa i dan peryod Novanm ziskan ver lafen Mars. Pandan peryod pli sek, Avril ziskan Out, *PUC* i depan bokou lo son plant

desalinasyon sitye Anse Boileau.

E i annan bokou sirkonstans kot restriksyon delo i bezwen ganny entrodwir. Sa i aköz plan desalinasyon Anse Boileau, i kapab kontribye zis 50poursan demann delo pou sid Mahe, ki enkli distrik Takamaka. Pou rezon stratezi e koman mezir sekirite, *PUC* in toultan ensiste avek bann gro devlopman touristik, pou annan zot prop plant desalinasyon koman *backup*.

En tel lapros in ganny mentenir pou bann gro letablisman touristik ki lo plan konstriksyon dan distrik Takamaka.

An se ki konsern plan stratezik pou ogmant nivo sekirite delo trete pou rezyon sid Mahe dan bann peryod lasesres, *PUC* in konsidere priyoritiz serten lenvestisman dan en plant desalinasyon, dan rezyon Anse La Mouche dan lannen 2023 a 2024.

Sa plan ki pou donn anviron 2mil met kib par zour pou kapab konplimant sa enn ki egziste Anse Boileau. E osi ogmant kontribisyon desalinasyon pou anviron 75 poursan demann delo trete dan sa rezyon.

Pou fini Mr Speaker, mon ti ava voudre soulinyen ki

konservasyon delo i reste pli bon fason pou asire ki sa resours i pa perdi.

Bann nouvo devlopman zot osi zot responsab pou met an plas bann mezir, pou koup lo lakantite delo ki zot pe demande, pou ki nou tou nou kapab partaz pli byen sa resours.

E alors *PUC* lo son kote i pe fer son bann travay, pou asire ki i annan *supply*. Me i enportan osi ki sa bann devloper letan nou koz avek zot, e letan nou antre an diskisyon konsernan zot devlopman, zot osi pran kont ki nou annan limitasyon e ki delo i kapab vin en faktor limite dan Sesel. E ki zot osi zot fer demars pou ki zot annan ase *supply*, stokaz eksetera, pou asire ki zot kapab kontinyen fonksyonnen dan tou letan lannen. Mersi.

MR SPEAKER

Mersi. Siplemanter Onorab Mondon.

HON TERENCE MONDON

Mersi Mr Speaker. Mr Speaker mon konnen ki *PUC* i annan en plan konpreansiv pou delo ki date 2008 ziska 2030. E aparaman zot osi devlop serten model syantifik, pou pli byen planifye sa balans ant demann e fournisman delo trete dan pei.

Eski Minis i kapab dir ki progre ki'n annan dan lenplimantasyon sa plan, e sirtou dan planifikasyon nou resours delo lo en baz syantifik?

E mon dezyenm kestyon. lo sa proze *South Mahe water transfer* ki sipoze transfer delo depi Port Launay pou vin Takamaka, atraver Santa Maria, eski sa proze in fini konplete antyerman? Ouswa i pa ankor konplete? Mersi Mr Speaker.

MR SPEAKER

Mersi Onorab. Minis.

MINISTER FLAVIN JOUBERT

Mersi Mr Speaker. Mersi Onorab pou sa 2 pwen klarifikasyon. Mr Speaker mon pou pas laparol avek *CEO* pou li reponn tou lede pwen. Mersi.

MR SPEAKER

CEO, yes please?

CEO PUC JOEL VALMONT

Mersi Mr Speaker. Mon ava fer li lanver mon ava pran sa dernyen kestyon avan, kot i konsern sa sistenm transfer Takamaka Santa Maria. Minis in konfirman ki ozordi Takamaka pe resevwar delo sorti Santa Maria. Sa i premye pa.

Nou dezyenm lobzektif sete pou anmenn delo atraver Baie Lazare. Sa ti dan sa dezyenm faz proze ki nou ti pe fer, kot nou ti pe met tiyo sorti Baie Lazare tou dilon ziska Takamaka kot Legliz Takamaka dan nou rezervwar.

Mr Speaker, sa proze dan son permanans li in konplete, se ki reste an deor sa proze, se nou pe sey idantifye en *plot* pou nou met en stasyon laponp ant Takamaka *lower* anba kot sa letablisman en pe popiler la - *Chez Batista*, dan sa rezyon la. Kot nou pou kapab elev sa delo ziska dan rezervwar Takamaka.

So an gran prensip mon kapab dir Mr Speaker, nou preske arive dan sa direksyon. Savedir Takamaka ozordi i kapab ganny kouver an traver 2 fason.

Kot i konsern sa *Water Master Plan* 2008/2030 Mr Speaker, in annan en bon pe proze dan sa *Master Plan* ki nou enplimante ozordi.

Enn parmi i bann stasyon desalinasyon. En gran parti sa *Master Plan* ti annan pou fer avek ogmant kapasite tiyo dan sa bann rezyon.

Enn sa proze ki mon'n koz lo la an premye Mr Speaker, i sorti dan sa *Master Plan*. Ki montre poudir *PUC* pe servi sa

Master plan pou enplimant tou son bann prose tiyo.

Partou kot zot vwar *PUC*, swa pe kas semen oubyen pe fouye pou remet lenfrastruktir, gidans i sorti dan sa *Master Plan*. Groser tiyo e ki mannyer nou re organiz *network*.

Mr Speaker, ler nou ti debit sa *Master Plan* an 2008, perd dan sistenm ti anviron 50poursan. Enn bann proze ki ti fek ganny fer resorti dan sa *Master Plan* se pou adres perd delo dan sistenm *PUC*.

Ozordi sa perd lo Mahe, nou'n nobou fer sa bann proze kot nou'n anmenn li lo 27poursan.

Nou target i 25poursan Mr Speaker. Nou'n komans en legzersis lo La Digue, kot nou pou en pe pli aparan Zanvye lannen prosen, kot pou nou adres perd.

Nou'n pran en legzersis Praslin dan lannen 2020/2021 kot nou'n redwir pert lo Praslin sorti lo en nivo 35 poursan, nou'n anmenn li 20 poursan.

Sa in enkli an avans bann proze enstalasyon tiyo, e enstalasyon bann *meter* dan bann rezyon.

Tousala Mr Speaker, i bann proze ki sorti dan sa *Master Plan*. So nou pe ariv 2030. I posib ki a 2025 nou pou bezwen komans reviz sa *Master*

Plan pou nou ganny ankor en *period* 10an investisman pou nou konsantre lo la. An gro sa kot nou ete ek sa *Master Plan* Mr Speaker. Mersi.

MR SPEAKER

Mersi. Mon a pran kestyon Onorab Esparon.

HON REGINA ESPARON

Mersi Mr Speaker. Mr Speaker mon anvi demann avek Minis, swivan piblikasyon sa *Master Plan* 2014 la. In dir nou poudir distrik Takamaka, distrik Anse Boileau.

E la *CEO* in dir nou poudir i annan La Digue osi ki pou benefisyè. Ki bann lezot distrik lo Mahe ki pou benefisyè avek sa *Master Plan*? E sirtou la mon pe mazin dan distrik Glacis nou annan bann zabitan O Kanbar ki napa delo trete. Ki bann lezot distrik ki pou benefisyè anba sa plan dan imedyat la? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mon a pas laparol *CEO*. Mersi.

MR SPEAKER

CEO please.

CEO PUC JOEL VALMONT

Mersi Mr Speaker. Mr Speaker, pou mon al dan en lalis distrik i pa pou fasil pou mwan fer sa la. Me selman keksoz ki mon kapab fer resorti kot i konsern bann landrwa ki napa delo trete Mr Speaker, i tonm dan 2 kategori.

Enn i bann kategori kot Gouvernman i devlop *landbank*. Kot la *PUC* i antre dan en langazman ek Gouvernman pou devlop en *network* delo dan sa rezyon. E an gran parti sa direksyon i pe marse avek *PUC*. En pe retar wi. Me selman nou pe fer li arive an gran parti.

Lot i annan pou fer avek bann landrwa ki pli eleve. E ki bann sistenm aktyel *PUC* i permet pou donn sa distribisyon.

E sa i tou annan pou fer avek bann laplikasyon ki vin devan. E bann konsiderasyon kot nou sey met lenvestisman kot i konsern sa bann rezyon. En legzanp sa bann rezyon i Kalver Takamaka. I annan bann plizyer landrwa kot i annan sa. Me i tout annan pou fer avek *sensitization* sorti kot sa bann piblik anver *PUC*, pou nou kapab amenn e sistenm dan sa bann rezyon.

Mersi Mr Speaker.

MR SPEAKER

Mersi. Bon mon ava pran ankor en dernyen kestyon Onorab Ernesta.

HON PAUL ERNESTA

Mersi Mr Speaker. Mr Speaker, Minis dan son repons in dir ki in koz en pe lo kote desalinasyon avek bann dimoun. E mon'n vwar ki kestyon pe koz lo devlopman touris ki pe arive dan distrik.

Eski Minis dan son demars dan letan in diskit avek sa bann devloper, pou asire ki zabitan pa ganny afekte avek letan sirtou dan letan i annan mankman delo?

Si letan in diskite in donn zot e serten kapasite ki zot bezwen zot tou pou zot fer zot *water harvesting*. Pou fer sir ki sa pa afekte kominote letan sirtou i annan bann problem ki annan mankman delo. Enn.

Aprè dezyenmman mon memwar i servi mon byen, sa proze ti annan en serten sonm dan *South West Intergrated System*.

Ti annan en serten sonm ki ot ti komans avek an 2018. Ozordi konbyen sa kou in arive apre lenplimantasyon proze? *Thank you*, Mr Speaker.

MR SPEAKER

Mersi. Minis ou annan 2 pwen pou adrese.

MINISTER FLAVIEN JOUBERT

Mersi Mr Speaker. Mersi Onorab pou sa 2 kestyon. Mr Speaker, kot i konsern devlopman, *PUC* letan i fer son, swa Gouvernman ki enkli *PUC*, letan i diskit ek bann devloper, byensir zot pou pran kont sa ki sa devloper pe demande. Me zot pa pou pran dan sa ki konsonmater pe deza servi.

Zot pou bezwen gete ki kantite kapasite an plis ki annan, ouswa si i annan *spare* lo ou sistenm. E la prezan zot pou kapab dir ek sa devloper ki kantite i kapab ganny *accommodate* dan sistenm ki deza egziste.

Alor i pou difisil pou dir ki en nouvo devlopman i pe afekte konsonmater. Si ou war konsonmater parfw zot pa ganny delo se ki i napa ase dan sistenm. E tou dimoun i ganny afekte parey. Mersi Mr Speaker. Mr Speaker mon ava pas laparol avek *CEO* silvouple pou dezyenm pwen.

MR SPEAKER

Ti annan en lot kestyon? Wi *CEO*.

CEO PUC JOEL VALMONT

Mersi Mr Speaker. Mr Speaker, i pa'n kler pou mwan an son

totalite sa dezyenm kestyon. Sa ki mon'n kapte se ki konbyen i koute pou sa *Master Plan*? An totalite oubyen zis en konponan? Mersi Mr Speaker.

MR SPEAKER

Klarifye silvouple.

HON PAUL ERNESTA

Zis pou klarifye Mr Speaker. mon koz lo sa proze *South West Intergrated System* la. Ou'n dir in fini konplete, konbyen in arive son konpilsyon sa proze? Sa bout *from Grand Anse to Takamaka*?

MR SPEAKER

Mersi. *CEO* ou annan larepons.

CEO PUC JOEL VALMONT

Mr Speaker, i pou mal pou mon donn en figure spesifik. Sa kontra i dan mon latet, i pa vini sa limero sa kontra. Mon a fer ou biro ganny sa lenformasyon.

MR SPEAKER

Mersi ou ava kapab enform Manm en lot ler. Mon pas lo prose kestyon e sa se 134 Onorab Doyace Porice.

HON DOYACE PORICE

Mersi Mr Speaker.

MR SPEAKER

En moman Onorab. Madanm Clerk in fer mon remarke ki nou bezwen sanz delegasyon pou ou kestyon.

Mon ava remersye *CEO Valmont*, anmezir ou sorti. E nou ava pran en pti poz *sanitizing* an mezir ki Madanm raporter i apel lot delegasyon.

(technical break)

MR SPEAKER

Byenveni nouvo delegasyon. Mon annan zis 2 zofisye lo mon lalis. Jean Claude Labrosse, *Principal Climate Adaptation Officer*. E Ms Annie Simeon *Principal Climate Adaptation Officer* dan *Climate Change Division* osi.

Madanm Clerk ou a endik mon lekel sa trwazyenm zofisye pou mwan kapab rekonnet li silvouple. *Ok* avek nou osi i annan Mr Denis Matatiken ki *Principal Secretary* Departman Lanvironnman. Annefe in zwenn nou en pe boner. Mon war son non lo lalis pou prosen kestyon.

Byenveni zot tou le trwa. Nou ava prezan kapab pran kestyon Onorab Doyace Porice.

HON DOYACE PORICE

Mersi Mr Speaker. Minis avek ou delegasyon, tou mon bann

koleg MNAs. E tou bann dimoun a lekout, bonzour.

Aprè en vizit avèk bann zofisyè *Land Waste Management Agency*, kot bann lanmar ek larivyer dan bann sou-distrik lo Praslin, kot i annan bokou keksoz pou fer:

Ki plan sipervizyon ou Minister i annan pou ede amelyor netwayaz dan bann lanmar ek larivyer?

Ki kalite proteksyon ou Minister pe pran pou kit sa bann landrwa prop?

Ki kantite kontrakter i annan lo Praslin pou antreprann sa kalite travay? Mersi.

MR SPEAKER

Mersi Minis. Larepons *Please*.

MINISTER FLAVIEN JOUBERT

Mersi Mr Speaker. Mersi Onorab pou sa Kestyon. Mr Speaker, pa tou larivyer ek lanmar ki anba kontra dan le de distrik lo Praslin parey lo Mahe. E sa parey nou konnen i akòz limitasyon Bidze. E la Onorab i byen ki ou'n donn mon sa loportinite pou nou koz en pe ankor enn fwa lo sa size Bidze ek netwayaz.

I kler Mr Speaker, ki pei napa ase larzan pou depans pou tir salte, ki nou menm nou,

nou zete dan tou lanmar, dan tou larivyer, dan tou boursay.

Fodre ki nou bann piblik, bann ki fer krwar zot konpran me aprè zot kontinyen zete. E bann ki petet ozordi pa tro enterese avèk lapropte, in ler pou zot konpran. E si zot pa konpran petet zot kapab aprann lo lenpak ki salte i annan lo imen.

Ozordi Mr Speaker, i annan sanniter, i annan zofisyè lanvironnman, i annan zofisyè Lanvironnman, i annan zot zanfan ki sorti dan lekòl avèk nouvo keksoz montre zot lo salte.

Me nou pe kontinyen war sa menm problem ki pe leve dan pei. Nou bann dimoun dan nou pei i bezwen war zot lekor dan sa zefor. Akòz i pa zis Gouvernman ki pou bezwen vin anmas salte partou. I plito en kestyon ki nou, nou pou fer koman en sitwayen responsab letan nou anna en keksoz pou nou zete.

Mr Speaker, tan ki nou konportman koman bann sitwayen pa amelyore, sa bann kestyon lo kouvertir servis netwayaz pou toultan la. E nou tou nou pou kontinyen depans pou koriz defo serten dimoun dan nou sosyete.

Pou retoun lo kestyon Mr Speaker, ki plan sipervizyon ou

Minister i annan pou ede amelyor netwayaz dan bann lanmar ek larivyer?

I annan sirveyans ek sipervizyon ki pe ganny fer dan tou distrik lo Mahe, Praslin ek La Digue ki konpri *spot check*. Bann vizit tou le de semenn. E osi tou le mwan. I annan en seri vizit ki ganny fer lo tou bann larivyer ek lanmar ki anba kontra, avan ler peyman i ganny fer.

E sa bann vizit ganny fer ansanm avek zofisye distrik - *DA* ouswa lezot *staff* son lofis. E osi *DA* i enform sa brans Minister ki lo Praslin ler i annan okenn konsern lo performans bann kontrakter ki pa fer travay byen. E in annan lenstans kot aksyon in ganny pran kont sa bann kontrakter ki pa pe performen.

Byensir Mr Speaker, nou konnen poudir sa sistenm i pa perfe. I annan de moman kot i annan defayans. E Minister i pou bezwen travay pou amelyor sa bann defayans, an traver bann lafason ki i gard rikord e lafason ki bann zofisye i raporte lo sa bann travay.

Plan Minister byensir se pou ogmant sipervizyon bann travay ki kontrakter i fer pou bann netwayaz, ki ganny fer regilyerman.

Lot plan Minister se pou ogmant frekans netwayaz dan ban larivyer ek lanmar. Sirtou bann landrwa kot i annan bokou aktivite imen ki enpakte lo sa bann sours delo.

E osi Minister dan son program sansibilizasyon lo zesyon lanmar ek larivyer i pe kontinyen, met lanfaz lo bann mezir ki nou kapab pran pou gard sa bann landrwa dan en bon sityasyon lapropte.

Dezyenm parti kestyon Mr Speaker, se ki kalite proteksyon Minister pe pran pou kit sa bann landrwa prop?

Parey in dir avan, pou ki bann lanmar ek larivyer i reste prop Minister pou ranforsi sirveyans lo bann sours delo e ranforsi bann Lalwa lo depoz salte. E osi Minister pe travay avek lazans dan distrik, pou detekte kot piblik i polye sa bann sours delo. Me parey mon'n dir i tou depan lo nou bann sitwayen, aköz nou pa kapab annan en Lapolis ouswa en zofisye pe vey sak sitwayen, sak fwa i zet en salte.

Lot keksoz Mr Speaker ki ti ava bon fer remarke se ki, nou annan en program ki nou pe travay avek Gouvernman Lokal, pou nou amelyor lakantite fasilite bin dan pei. Ki pou ede pou nou donn plis fasilite dimoun pou zot met zot bann

salte, oye ki zot war neseseite pou zet dan bann landrwa piblik.

Mon krwar nou ti fer remarke dan en prezantasyon avan avek Lazans responsab pou salte, ki ozordi dan pei lakantite bin ki nou annan i lanmwatye sa ki nou ti ava voudre annan idealman.

Alor nou pou bezwen met zefor pou nou amelyor e ogmant lakantite fasilite pou salte dan pei. E ed nou bann sitwayen pou zot servi pli byen sa bann fasilite.

Trwazyenm parti kestyon Mr Speaker, se ki kantite kontrakter i annan lo Praslin, pou enplimant sa travay? Dan distrik Baie Ste Anne Praslin, 35 larivyer ek lanmar pe ganny netwaye anba kontra. Sa i reprezant 90poursan bann larivyer ek lanmar ki pe ganny amenaze anba kontra lo Praslin.

Parey mon'n mansyonnen avan i annan 35 larivyer ek lanmar anba kontra. E i annan 6 kontrakter ki pe travay anba sa bann kontra. 3 Baie Ste Anne ek 3 Grand Anse. I annan en group larivyer ek lanmar dan sak 2 distrik lo Praslin, enn Baie Ste Anne e enn Grand Anse ki pa pe ganny amenaze an se moman, aköz prosesis *tender* pa ti materyalize.

Lannen prosenn bann kontra pou terminen e nouvo kontra pou vin an fors apre sa. Mr Speaker ti ava bon fer remarke ki, dezormen bann larivyer ek lanmar pe osi ganny transfer avek Lazans LWMA, pou ki zot kapab zer da en fason pli konplet bann servis netwayaz dan kominote depi lannen 2023. Mersi.

MR SPEAKER

Mersi. Siplemanter Onorab Porice?

HON DOYACE PORICE

Mersi Minis pou repons. Minis parey ou'n dir i annan 6 kontrakter lo Praslin. 3 Baie Ste Anne ek 3 Grand Anse. Eski ou pe mazin anploy plis kontrakter? Aköz parey nou konnen ki nou annan 72 lanmar ek larivyer lo Praslin.

Apard bann kontrakter, ou Minister in mazin en lot alternativ pou kit larivyer ek lanmar prop?

Par egzantp ou'n nonmen travay pe ganny fer avek Gouvernman Lokal. Me mon pe mazine ki si zot ti kapab ganny en dyalog avek bann NGOs osi ek lezot Lazans. Mersi.

MR SPEAKER

Mersi. Minis.

MINISTER FLAVIEN JOUBRT

Mersi Mr Speaker. Mersi Onorab pou sa 2 pwen klarifikasyon. Mr Speaker kot i konsern lakantite kontrakter, i en size ki nou deza koz lo la menm avek Lasanble.

Ozordi nou war nou avek en kantite kontrakter dan pei zis pou servis netwayaz. E sak fwa nou azout ankor nouvo kontrakter, nou war ki Bidze i spiral an deor kontrol.

E i difisil pou nou kapab kontinyen demann Minister Finans pou azout ankor lo sa bann Bidze. E Minister Finans pe demann nou ozordi si nou le azout kontra, trouv li dan nou Bidze ki deza egziste.

I annan serten legzersis ki pe ganny fer la., e i pe ganny dirize par Finans, se pou revwar efikasite bann kontra.

E konpran vreman si sa bann groser, si lafason ki kontra i ganny donner, si bann frekans ki pe ganny ensiste lo la i apropiye. E si atraver sa bann sistenm nou pe ganny pli bon valer pou larzan. Alor ti a bon nou les sa process konplete. E apre nou ava konpar egzaktaman kwa kim rekomannde pou kontra pou netwayaz dan pei.

Zis azout kontrakter petet i kapab azout problem lo sistenm Gouvernman. Sirtou lo

kote Bidze. Kot i konsern lezot mezir pou asire ki bann lanmar i reste prop. Byensir nou annan deza bann linisyativ ki Minister Lanvironnman in angaze ladan.

Mon konnen zot annan serten landrwa lo Praslin kot zot pe angaze avek bann kominote, sirtou bann *estates*, pou sa bann dimoun pran responsabilite zot lanvironnman imedyat jot zot reste.

Met annord, met en pe lord lo kote netwayaz. Met en pe zefor lo lanbelisman. E osi lo bann mezir par egzanp pou kaptir delo pou zot kapab servi, pou amelyor zot bann zarden eksetera, ki bann dimoun i kapab servi e enjoy lavi pli konplet dan sa bann landrwa.

En lot keksoz Onorab ki mon krwar i enportan nou koz lo la, se ki nou bann zabitan osi fodre zot vin alert lo sa bann size. Bokou zot, bokou nou, nou vwar sa bann lanmar. E nou vwar lekel ki pe fer sa bann dega dan sa bann landrwa.

Akoz mon pa tro krwar si tou sitwayen i deside pou li koup son fler, par egzanp ouswa koup pye dibwa zet dan lanmar ouswa zet salte.

I annan serten dimoun ki annan serten konportman ki nou bezwen adres zot

direkteman. Alor i enportan osi ki nou bann kominote zot pran sarz sa landrwa kot zot pe reste. E zot kapab alerte letan i annan problemn. En fason ki nou kapab dil avek sa ban dimoun ki pe vreman koz problemn.

Ou ava dakor avek mon ki laplipar dimoun zot viv en lavi trankil, normal e zot pa vin en lenkonvenyans pou lezot vwazen.

Me i annan serten i kontinyen. E nou bezwen met sa anba kontrol. Mersi.

MR SPEAKER

Mersi. Mon a pran kestyon Onorab Woodcock.

HON WAVEL WOODCOCK

Mersi Mr Speaker. Minis parey Onorab ki'n koze avan mon in dir i annan environ 72 lanmar lo Praslin ki enkli environ en 34 Grand Anse. E nou annan selman 3 kontrakter ki pe travay lo sa bann lanmar.

I pa bann pti lanmar, i bann gran lanmar. E mon krwar nou bezwen admet poudir 3 kontrakter pou *maintain* sa bann lanmar i preski enposib. Mon konsern se ki ler sa bann lanmar pa ganny *maintain*, i kre en problemn a lonterm, kot lanbousir i bouse.

Lanmar letan gro lapli lanmar i inonde. Ouswa i ganny bann *algae* lo sa bann lanmar ki bann *wildlife* dan sa lanmar i mor. Ki apre i annan en loder. E i annan en *issue* lasante osi ki n ou bezwen konsidere.

En lot konsern ankor Minis se ki...

MR SPEAKER

Onorab pa tri tarde pou prosed lo kestyon silvouple.

HON WAVEL WOODCOCK

Yes. Minis en lot *issue* se ki ou'n mansyonnen wi i annan serten lanmar wi ki dimoun i zet keksoz dan sa bann lanmar. Me an menm tan i annan sa lot kontrent lerozyon.

Kot bann lanmar akoz lerozyon bokou bann pye dibwa pe tonm dan lanmar. I annan bann siko, bann debri e tousala. E i annan 2 antite aktyelman la ki pe dil avek bann *issue* lanmar. Sa i enkli CAMS e LWMA.

Mon kestyon i sa bann debri ki pe tonm dan lanmar, i responsabilite lekel? Mon konnen poudir dan lepase zot in dir poudir i annan sa problemn bidzeter.

Me si sa bann debri, sa bann pye dibwa, sa bann siko pa ganny tire dan sa bann lanmar, in *the long term* i pou

kre en problemn ase serye sirtou ki pou koz linondasyon dan plizyer bann landrwa dan distrik. Mersi.

MR SPEAKER

Mersi Onorab. Minis repons please.

MINISTER FLAVIEN JOUBERT

Mersi Onorab pou sa - mon krwar en pwen me selman ki ganny kase an 2 morso.

Mantenans lanmar e son risk pou inondasyon e osi lefe ki i annan pye dibwa ki kapab tonm dan lanmar, e osi koz bann problemn parey linondasyon.

Mr Speaker parey mon dir, latansyon ki nou devret pe mete se lo salte. Nou bezwen fer sir ki lanmar i lib. I napa sa bann salte parey plastik ki nou konnen i andomaz lanvironnman. E i fer ki nou lanvironnman pa vin atiran osi pou bann viziter. Sa i premye lobzektif.

Byensir i annan lasante sa lanmar li menm, son fason ki i fonksyonnen. E nou bezwen fer sir ki nou pe kit son sirkilasyon annord. Nou pe fer sir ki napa okenn blokaz.

E sa bann blokaz nou konnen i kapab koz en pe problemn pou bann propriyeter

sirtou dan letan ki i annan tanpet.

Me letan mon pe ekout Onorab Mr Speaker, mon krwar sa bann mezir ki i pe koz lo la. I kapab ganny pran koman bann keksoz ki pa anba kontra dan en fason regilye.

Me i kapab ganny pran koman parti en bann mezir ki ganny fer de tanzantan pou anpes ariv sa bann dezas. E mon krwar sa i en keksoz ki nou kapab planifye ansanm ek distrik, pou ki nou annan kapasite. E nou annan en pe resours ki met akote. Pou letan i annan bann sityasyon i menase, ouswa nou remarke i annan en bezwen pou nou fer li, nou entervenir e nou fer li.

Akoz pou mwan en lanmar par egzanp ou'n tir detrwa pye dibwa ki'n tonm ladan, i pa sa lannen ki lezot pye dibwa pou kontinyen tonm ladan. Petet pli tar ou ava ganny ankor pye dibwa. Apre ki on pas serten levennman.

Alor i en keksoz ki kapab ganny travay lo la avek distrik ek lezot Lazans, an servan bann resours ki nou kapab idantifye. E ou ava ganny en sistenm kot letan i annan bann problemn i menase ou ava kapab entervenir. E met li an a kontrol. Mersi.

MR SPEAKER

Mersi. Mon bezwen avans lo prose kestyon. Sa se 135 nou'n arive. Onorab Rocky Uranie.

HON ROCKY URANIE

Mesi Mr Speaker. Minis ankor enn fwa bonn apre midi avek ou nouvo delegasyon. Byensir tou koleg Onorab.

MR SPEAKER

Eskiz mwan, poz Onorab Uranie mon fer menm soz. Nou bezwen sanz delegasyon. E les mon remersye Mr Jean Claude Labrosse e Ms Annie Simeon pou zot partisipasyon. E mon ava swet zot bon depar.

Antretan nou ava fer en pti poz *sanitizing*. E madanm raporter i ava apel lot delegasyon. Mr Denis Matatiken i reste avek nou pou prosen kestyon.

(sanitizing break)

MR SPEAKER

Bon byenveni zofisye ki'n zwenn nou. Mr Rahul Mangroo, *Deputy CEO Land Waste Management*. E Ms Christina Dora son *Procurement Manager*.

Onorab Uranie ou a bezwen rekomans ou kestyon silvouple. *Sorry* mon'n en pe anpaye dan bann sanzman delegasyon.

HON ROCKY URANIE

Mersi Mr Speaker. Byenveni nouvo delegasyon. Minis mon kestyon i lir koumsa: -

I annan bokou vye feray ki bezwen ganny tire lo *site* kot zot in ganny mete e an se moman i annan en dimoun oubyen en lakonpanyen ki pe fer triyaz sa bann feray. Eski sa dimoun oubyen lakonpanyen in ganny en kontra pour fer triyaz?

Dezyenm, si wi, kan ki *bid* ti ganny fer pour donn sa kontra e konbyen pe koute si i annan en kontra?

3enm, Lekel bato ki'n ganny kontra pou transport sa bann feray ki sorti La Digue pou anmenn Mahe? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou ou kestyon ki an trwa morso.

Mr Speaker, Minister Lanvironnman an traver Lazans ki responsab pou amenaz salte (*LWMA*) i annan responsabilite pou amenaz bann vye feray ouswa *scrap metal*, ki tousala ganny anmennen lo bann *landfill* Mahe, Praslin avek La Digue.

Lo Mahe sa bann feray i ganny triye e process direkteman par bann *scrap metal dealers* ki deza lo sit. Lo La Digue ensi ki Praslin napa personn ki pe fer sa. E LWMA i bezwen fer provizyon pou retir sa bann vye feray e transport Mahe.

Sa i malgre ki plizyer dimoun dab lepase in eksprim lentere pou fer sa travay. Nou a rapel Mr Speaker ki deryer LWMA ti tir feray lo La Digue ti an 2019. Kot apepre 250 tonn ti ganny transporte Mahe.

La Digue sityasyon kot *stockpile* i pli kritik akoz lespas i vreman limit. E avek plan pou stasyon tretman *sewage* par PUC, in annan en bezwen pou liber en parti sa sit ase vit.

Mr Speaker, premye parti kestyon Onorab, se eski sa dimoun oubyen lakonpanyen in ganny en Kontra pou fer triyaz?

Wi Onorab i annan en lakonpanyen ki'n ganny kontra pou travay lo sa sit La Digue. I annan 2 lakonpanyen aktyelman ki'n ganny kontra pou travay lo sa sit La Digue.

Premye kontra i avek en lakonpanyen apele *Loan Plant Hire*, en konpanyen sorti Praslin ki to ganny kontra pou fer triyaz pou separ feray avek

bann lezot materyo an servan en *excavator*.

E avek sa *excavator* ti annan en latasman ki apel en *grabber* ki en lekipman ki fer li posib pou atrap ek detay bann debri e retir bann morso feray ladan.

Dezyenm kontra, i avek en lakonpanyen apele *Unicorn Metal*, ki li son travay se pou pez bann feray an servan en *bailer* ouswa en lapres pou form bann blok kare, pou asire ki transportasyon i vin pli efikas.

Sa lakonpanyen in deza enstal son lekipman lo sit ki enkli son *bailer* ek son zenerater. Sa konpanyen li i ankor lo si t La Digue.

Dezyenm parti kestyon, se kan ki *bid* ti ganny fer pou donn sa kontra e konbyen pe koute si i annan en kontra.

Pou premye kontra Mr Speaker parey mon'n dir premye Kontra avek *Loan Plant Hire*. Lazans LWMA ti negosye avek 3 lakonpanyen - 2 ki baze lo Praslin, e en lot lo La Digue pou fer sa louvraz - Triyaz savedir. *Loan Plant Hire* ti le sel lakonpanyen ki ti annan sa lekipman apele en *grabber* pou fer sa travay.

Pri ki ti agree ti R1200 par erdtan avek provizyon ki travay i al pou 12 zour. Sa ti pou fer ki pri total i reste anba sa limit

sa 50mil ki Lalwa *Procurement* in etabli pou laprouvasyon entern *LWMA*.

Malerezman avek presyon pou liber sa sit pou *PUC*, travay apre 12 zour pa ti ankor fini. Alor *LWMA* ti prolonz sa kontra pou ankor plis letan ki'n fer li depas son limit pou sa kontra.

Lofis *POU* depi mwan Zilyet, depi in ganny alerte lo sa *anomaly*. In entervenir pou adres sa problem ki'n arive. E ozordi nou pe esper zot desizyon apre nou ava konnen ki egzaktman nou pou fer konsernan sa ka kot lareg *Procurement* in ganny depase.

E sa kontrakter i pou bezwen ganny peye, akoz in annan travay ki'n ganny fer lo sit parey mon dir. I pa en keksoz ki vertyel. Travay in ganny fer lo sit. Me i annan en difikilte ki'n arive avek Lalwa *Procurement*.

E *Loan Plant Hire* parey mon'n dir in fini konplet son travay lo La Digue. E mon krwar si mon rapel byen in fini kit La Digue.

Pou dezyenm kontra sa konpanyen ki pe pez feray, *bidding* ti ganny fer an Avril sa lannen.

Kot 8 lakonpanyen ki annan leksperyans dan *processing scrap metal*, ti ganny

envite pou partisip dan en '*Request for proposal*.'

4 parmi sa bann lakonpanni ti soumet en propozisyon. *Unicorn Metal*, *Loan Plant Hire*, *Surya* avek *BS Excarnation*. E sa ti ganny fer avek *LWMA*.

Sa lakonpanyen ki ti ganny kontra ti pare pou fer sa louvraz pou naryen, lo kondisyon ki tou feray ki i anmase i kapab *process* li menm, an vi ki i deza dan biznes *scrap metal*. Lazans *LWMA* ti pou zis ede avek transportasyon son bann lekipman. E osi sa bann blok feray ler pou retourn Mahe parey ti'n prevwar dan sa '*Request for proposal*.'

Pou fer sa, sa kontrakter ti pare pou retir son *bailer* ki ti trouve Providence, pou anmenn e enstal lo La Digue pou ede konpakte sa bann feray dan bann blok.

Sa i pou ede avek transportasyon an vi ki leksperyans in montre ki kou transportasyon Mahe avek La Digue, i vreman o.

E letan ou'n anmenn bann materyo prey nou dir an grennyen, nou bezwen fer bokou voyaz bato ki kout en kantite. Sa lakonpanyen li i ankor kot *scrap metal yard* La Digue.

Trwazyenm parti kestyon Mr Speaker se lekel bato ki'n ganny kontra pou transport sa bann feray ki sorti La Digue pou anmenn Mahe?

Mr Speaker, kot i konsern transportasyon napa okenn lakonpanyen ki'n ganny kontra. i annan demars ki pe ganny fer pou rod en lakonpanyen pou ede avek sa travay.

Sa i neser vi ki nou annan bokou plis salte ki nou pe anmase. E i pou ganny desann avek Mahe apre Kanpany Netwayaz Lemonn, ki pe konmanse apartir sa Vandredi le 16 Septanm.

Pou mont avek lekipman pou al La Digue, UCPS ti ganny en kontra pou selman transport lekipman pou sa kontrakter ki ti resevwar sa dernyen kontra sorti Providence pou anmenn Linyon La Digue.

LWMA ti'n negosye avek 3 diferan lakonpanyen pou fer sa transportasyon. Me UCPS ti ganny selekte, pou fer sa transportasyon ki ti enkli transport sa *Bill* ek zenerater sorti Providence pou anmenn ek enstal La Digue.

UCPS ti osi servi en *crane* 35-ton pou retir sa zenerater ek sa *bailer* enn fwa ki tib ariv lo La Digue. In kout LWMA

R165mil pou fer sa tranzaksyon. Mersi Mr Speaker.

MR SPEAKER

Mersi Minis. Ou siplemanter Onorab Uranie.

HON ROCKY URANIE

Mersi Mr Speaker. Mersi Minis pou ou larepons. Minis sa kontrakter ti ganny donnen 12 zour pou li tir, pou li triy sa bann feray. Eski sa 12 zour, zot menm ki ti donn li oubyen li ki to dir zot i kapab fer sa dan 12 zour?

E apre zot pe pey li R1200 par erdtan. Konbyen erdtan zot ti pe espekte i travay par zour? E pou sa 12 zour i ti pou ariv en serten kantite. Si i dir 10 erdtan par zour - 12 fwa 1200. Nou tou nou konnen konbyen i arive, 12mil. R12 mil en zour.

So dan 12 zour nou pe mazin i pou ariv 144mil, be konbyen zour ekstra in ale e konbyen pe koute an plis pou sa travay ganny fer? Mersi.

MR SPEAKER

Mersi. Mon krwar Minis in komanse lo sa kestyon. Minis ou elabore?

MINISTER

FLAVIEN

JOUBERT

Mersi Mr Speaker, Onorab parey mon'n dir travay ti annan

estimasyon ki zot ti kapab fer sa travay dan 12 zour.

Me osi enn bann kontrent ki ti pe ganny konsidere lo komansman se, lefe ki Lazans ti bezwen reste anba 150mil. E se pou sa rezon osi ki zot pa'n prevwar lo komansman 12 zour.

Me parey mon dir, letan 12 zour in arive, 12enm zour in arive. Lazans in vwar ki travay i bezwen ganny fer ankor. E lazans malerezman in kontinyen e in pouse pou ki sa travay i ganny fer lo son *maximum*.

Pou permet ki sa konpanyen ki pe vini pou li servi sa lapres pou met sa bann feray annord. I pa trouv li avek en sityasyon kot i napa materyo pou li travay avek.

Konbyen in arive an plis apre ki sa Kontra in ganny depanse? Sa total ki ozordi nou vwar devan nou se R500mil. E se sa kantite kontra ki'n depas. Sa i enkli sa bout par anba R150mil e larestan ki'n ganny depase ziskan ozordi. Mersi.

MR SPEAKER

Mersi. Mon ava pran kestyon Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker

mon ti ava kontan demann Minis. Bann literatir ki mon'n war lo kestyon zer *scrap metal* lo La Digue. Depi 2004 *LWMA* i pe eksprim konsern lo zer *scrap metal* lo La Digue pou bann problem lozistik.

Par egzanp *landing craft*. E apre menm bann *pick-up*, bann keksoz koumsa. E zot in dir poudir meyer solisyon se omwen enn fwa par an pou tir feray.

Donk mon anvi demann Minis, eski zot pe sey reste avek sa *time table* pou ki i pa akimile. E bann kou pa al an deor? Sa i premye kestyon.

E dezyenm kestyon. Ou'n dir dan ou larepons ki i ti annan bann endividi ki'n eksprim lentere pou sey pran sa biznes.

Alor eski i ava annan en mwayen pou travay avek sa bann dimoun ki'n montre lentere, pou ki lo La Digue omwen i ava annan en biznes ki zer *scrap metal* ki kapab a lonterm redwir kou? Akoz zot, zot ava baze lo sa zil menm? Mersi.

MR SPEAKER

Mersi. Minis.

MINISTER

FLAVIEN

JOUBERT

Mersi Mr Speaker. Mersi Onorab pou ou 2 kestyon. Mr

Speaker mon ti ava voudre re asir Onorab ki wi, nou ti ava voudre ki, e Lazans ti ava voudre ki tou le lannen i pe tir feray lo La Digue.

Akoz parey nou vwar la sa landrwa kot i annan sa *stockpile* ti aktyelman ganny konstri. E ti ganny enstale an 2018. E i ti komans avek zis en pti gin feray ki ti dan larantre *landfill*.

E letan nou pe get 2018 ziskan ozordi. Menm si nou'n tir 150 tonn 2019, sa landrwa in plen. I montre ki La Digue pe kre en kantite lo kote *bulky waste* avek *scrap metal*. E ki nou bezwen tou le lannen pe tire sa bann materyo.

Me dan sa peryod ki'n pase 2020, 21 sirtou, avek bann sityasyon *COVID* i pa'n posib pou fer bann laranzman pou fer desann.

E la ozordi nou ti a voudre sirtou avek sa demann pou nou liber sit pou *PUC*, ki nou tir *maximum*. E nou fer sa sit ase kler. E nou kit li en pli pti sit pou nou kapab *manage* pli byen.

Mr Speaker kot i konsern bann lezot biznes ki'n montre lentere dan sa travay? Mon pou dir ki i pli fasil e i pli rantab pou en biznes fer *scrap metal* lo Mahe. Akoz son bann kou ki vin avek ennlè i anpese ki ou

kapab fer en profi, depandan sityasyon pri feray lo marse.

Ou annan kou *labour*, ou annan kou lenerzi. Ou anna kou transportasyon ek tou bann lozistik ki vin avek feray. E menm ou annan sa bann sityasyon kot ou napa en sit pou travay lo la.

Ki nou pe gete nou lo kote Praslin/La Digue, se ki nou pou bezwen, Gouvernman an traver bann fon ki nou annan, nou bezwen osi rod solisyon ki pou zwenn sa bann konpanyen lanmwatye semen.

Menm si nou'n eksprim lentere, bokou zot i ankor pe ezit-e petet aköz sa kouler lenvestisman pou demar proze. E diskisyon ki nou'n annan se travay avek zot pou nou ankouraz zot atraver serten mezir.

Par egzantp enn bann keksoz ki ou kapab fer se annan en *bailer*. E pas sa *bailer* avek zot pou zot *operate*. E zot ava fer sa travay. I annan mason ki *shred pet*.

Par egzantp nou pe gete ozordi *pet* kout en kantite pou fer desann *pet* adn bann *sling* kan i annan en kantite lespas vid ki ou pe peye pou met lo bato.

Ou *shred* ou *pet* e an prensip nou kapab fer zis en *trip* par lannen, pet sorti La Digue

ek Praslin. Sa ki nou bezwen tou lazournen pe met sa bann gro *sling* plen avek boutey vid lo bato. Alor nou, nou pe get li dan en fason ki nou pou bezwen investir serten kapasite dan sa bann Landrwa.

E nou ti ava voudre ki nou fer sa an 2022/2023. E letan nou'n fini fer sa nou envit bann ki enterese pou vin *operate* sa bann fasilite.

I pa pou Gouvernman ki pou fer fonksyonnen. Me selman nou met an plas serten fasilite. E apre nou envit bann dimoun ki enterese pou vini e pou tir en profi dan sa travay.

Me *still* Praslin/ La Digue osi enn bann andikap ki annan ouswa dezavantaz ki annan, se transportasyon par bato ki osi nou pou bezwen gete ki mannyer nou kapab kouver.

Akoz sa ki lo Mahe i pa sibir sa menm depans parey en dimoun lo Praslin ek La Digue. Mersi.

MR SPEAKER

Mersi. Nou pe avans lo 12 edmi e mon fek note mon annan 3 kestyon ki reste. So mon a oblize avans lo prosen kestyon. Onorab Churchill Gill, Kestyon 136.

HON CHURCHILL GILL

Mersi Mr Speaker. Bonn apre midi Minis ek ou delegasyon.

MR SPEAKER

En enstan. En enstan Onorab Gill nou bezwen fer en lot sanzman. E mon remersye Ms Dora. E nou ava rebran. Nou ava fer *sanitize* silvouple. En moman.

Madanm raporter nou annan en lot delegasyon.

(technical break)

MR SPEAKER

Bon byenveni Mrs Nanette Laure, Direkter Zeneral pou *Waste and Enforcement Department*. Onorab Gill prosede ek ou kestyon silvouple.

HON CHURCHILL GILL

Mersi Mr Speaker. Ankor enn fwa bonn apre midi Minis. Kestyon i lir koumsa: -

Eski Minis i kapab enform sa Lasanble avek zabitan Praslin: -

Ki plan lonterm *SIF* pou rezerv Fond Ferdinand?

Eski i annan diskisyon ki pe pran plas an se moman, lo size en poursantaz larzan kolekte dan Vallée De Mai, pou reste Praslin pou benefisye zabitan Praslin, vi ki i annan plis ki 30an ki tou larzan ki pe

kolekte pa pe benefisyè zabitan Praslin? Mersi.

MR SPEAKER

Mersi Onorab. Minis ou repons *please?*

MINISTER FLAVIEN JOUBERT

Mersi Mr Speaker. Mersi Onorab pou ou kestyon. Mr Speaker, premye parti kestyon se ki plan lonterm *SIF* Fondasyon bann zil Sesel pou Fon Ferdinand?

Fondasyon bann Zil Sesel ouswa *SIF* ti ganny demande an Septanm 2020 par Gouvernman pou pran responsabilite pou an menaz sit Fon Ferdinand.

Sa desizyon ti ganny pran pou ede devlop laspe potansyel touristik e ekonomik Fon Ferdinand parey Vallee De Mai. An vi ki sa 2 sit ki baliz ek kanmarad. E Fondasyon bann Zil, *SIF* i osi i deza annan konesans ek leksperyans nesese pou amenaz en tel sit.

Ti annan en prosedir ki to pran plas pou asire ki bann travayer i ganny transfer ensi ki bann *assets* Fon Ferdinand, ki nou bezwen rapel ti ganny anrezistre koman en lorganizasyon e non pa en konpanyen.

Bann prosedir administrativ ensi ki legal, ozordi i ankor pe ganny fer pou konplet sa proses.

E i enportan ki avan *SIF* i investir dan okenn lenfrastruktir ou konsider bann laspe devlopman sit Fon Ferdinand. Tou bann travay pou met annord, bann rikord, e tou lezot lenformasyon ek tou bann dokimantasyon i ganny konplete.

Dapre lenformasyon ki mon'n gannyen, bann diskisyon lo Fon Ferdinand pou ganny diskite dan prose *meeting* anyel *SIF*, ki pou ganny fer lafen mwan Septanm.

Sa bann desizyon pou ganny diskite apre en avek Gouvernman e osi bann par ti konsernen sirtou lo Praslin. Swivan sa, en desizyon i ava ganny pran lo plan lonterm sa sit. E nou ava anonse.

I enportan fer resorti ki *SIF* avek Minister Lanvironnman pe an se moman travay avek bann Lotorite konsernen, pou asire ki Fon Ferdinand i ganny en proteksyon legal anba nouvo Lalwa lo bann *zone* proteze.

Dezyenm parti kestyon Mr Speaker, i konsern diskisyon lo size poursantaz larzan kolekte dan Vallée De

Mai e osi kontribisyon *SIF* lo Praslin.

Mr Speaker, tir en poursantaz larzan kolekte lo Vallée De Mai en pe parey en *tax* pou depans zis lo Praslin, i en propozisyon ki nou'n tande a plizyer repriz.

Me selman Mr Speaker, i en propozisyon ki pa an akor avek en pei ki ganny administre koman en sel Leta. Sesel i pa en federasyon plizyer Leta kot sak forse pei i annan lotonomi, e i kapab reklanm en parti revini zis pou li.

Akoz si nou swiv lozik Onorab lo sa size larzan Mr Speaker, nou pou kapab dir alor ki par egzanp larzan ki ganny anmase lo *Bill PUC* lo Mahe, i merit reste lo Mahe, e non pa servi po sibvansyonn elektrisite lo Praslin.

Ouswa nou ava dir ki larzan ki ganny ranmase Ile Coco i ganny depanse zis lo La Digue. E i pa ganny servi pou devlop fasilite lo Curieuse ki nou konnen i benefisye bokou dimoun ki sorti lo zil Praslin.

Mr Speaker, Aldabra i en parti Sesel. E larzan pe ganny servi pou prezerv en parti teritwar Sesel, ki nou tou nou konnen i merit ganny sa kalite proteksyon.

O kontrer Mr Speaker mon ti ava envit Onorab pou li

eksprim son lafyerte ki en Sit Patrimwann lo Praslin pe kontribye sibstansyelman dan sa zefor pou protez en lot Sit Patrimwann Mondyal Sesel.

Mr Speaker Onorab in dir ki plis ki 30an ki tou larzan ki pe kolekte pa pe benefisye zabitan Praslin.

Mon ti a kontan enform sa Lasanble ki Fondasyon Bann Zil Sesel ki pe zer sit Vallée De Mai, i pe deza kontribye dan devlopman touristik e ekonomik Praslin.

Dapre bann kalkilasyon, *SIF* pe kontribye plis ki R8milyon par lannen, direkteman dan kominote Praslin. san prenon kont bann benefis ki drayver Taxi, *tour* operater prive ensi ki bann lakonpanyen dan Sekter Touris i osi gannyen.

Ozordi Mr Speaker, nou a pran en legzanp, se ki bato pe fer *day trips* sorti Mahe pou al Praslin toulezour. E Vallée De Mai ki ganny zere par *SIF*, i enn sa bann sit ki pe atir zot pou fer sa bann *day trips*.

Dapre bann sif pou 2019 ti annan en pe plis ki 110 mil touris ki vizit Valle de Mai par an.

Byensir nou pou dakor ki zot vin pou sa natir ki egziste dan Vallee de Mai. Me fodre nou fer rapel ki se sa bon travay ki

SIF pe fer ki pe donn piblisite e valer dan sa sit.

Mr Speaker i deza annan 67 Pralinwa i dan lanplwa avek *SIF*. Menm ler ti annan *lockdown* akoz *COVID* personn pa ti perdi lanplwa oubyen ganny koup saler.

I osi annan plis ki 20 dimoun ki gid prive - *self-employed* ki pe servi rezerv pou siport zot ek zot fanmir pandan sa dernyen 20an. I bon note ki zot pa ni bezwen pey okenn kou operasyonnel avek *SIF* menm si zot stasyonn la.

SIF i osi met a laporte bann zabitan en landrwa pou vann zot prodwir artizanal sa dernyen 15an. Par an apepre R4milyon i ganny anmase atraver sa bann aktivite. Sa i ede definitivman pou devlop sa sekter lo Praslin.

SIF i osi ede atir larzan pou proteksyon biodiversite lo Praslin. Pandan sa dernyen 10an in resevwar anviron R10milyon atraver bann *Grants* ek bann diferan *donors*.

Pou protez biodiversite, en proporsyon sa larzan in osi ganny servi dan lakominote. In osi kontribye anver bann *holiday club* pandan sa dernyen 10an.

Si nou kalkil letan ki *SIF* in donner, i estimen ki plis ki 170 zour servis kominoter. E

plis ki 57mil erdtan pou *child care*. Sa i bann kontribisyon direk ki sa lorganizasyon pe fer an traver son travay dan Vallée de Mai.

Me toudmenm Mr Speaker, *SIF* i en lorganizasyon ki pou Leta Sesel. i ti ava byen vwar ki plis n ankor i kapab fer lo zil Praslin kot bann aktivite pe ganny fer.

Sa Fondasyon i deza annan plan pou investir dan serten proze. Parey sistenm fotovoltaiik kot lekol Baie Ste Anne.

E osi kontribye plis dan devlopman kapasite dan Sekter Ledikasyon ek lanvironnman lo zil Praslin.

E sa i kapab ale ziskan sipor pou nivo liniversiter. Sa Mr Speaker i bann diskisyon i nouvo *Board SIF* pou bezwen konsidere letan i fer son bann diskisyon stratezik. Mersi Mr Speaker.

MR SPEAKER

Mersi Minis. Wi ou siplemanter Onorab Gill?

HON CHURCHILL GILL

Mersi Mr Speaker. Mersi Minis pou ou larepons. Me selman mon krwar mon ava fer ou konpran Minis ki pa *SIF* ki vann Vallée de Mai. Vallée de Mai i vann son lekor.

So mon krwar pou dimoun Praslin ki pe ekoute, i enportan zot konnen poudir si ti napa *SIF*, i pa vedir Vallée de Mai pa ti pou vann son lekor.

So annan konpran byen nou largiman, pou nou donn lenpresyon ki *SIF* ki fer Vallée de Mai marse. Akoz Vallée de Mai son popilarite i deza la li.

Lo kot Sesel pa en federasyon.

MR SPEAKER

Onorab ou pa pou kapab *comment* lo tou soz Minis ...

HON CHURCHILL GILL

Non-non mon bezwen reponn li Mr Speaker.

MR SPEAKER

Silvouple en ladres kourt si ou pe al lo en kestyon. E entrodwir ou kestyon.

HON CHURCHILL GILL

Mr Speaker i annan zabitan ki viv Praslin pe ekoute sa diskisyon ki pe pase.

MR SPEAKER

Wi mon konnen. Ale.

HON CHURCHILL GILL

I enportan nou met keksoz an konteks. Minis in dir nou poudir Sesel pa en federasyon. Mon toutafe dakor ek sa.

Me Aldabra osi pa pou Praslin. i pou Sesel. So dan sa ka si nou krwar i byen ki Praslin i devret, Aldabra - nou dakor ek sa nou. Nou pa'n dir pa fer sa, me selman akoz ki Praslin ki bezwen anmenn sa *burden* li tousel?

Sa nou largiman.

MR SPEAKER

Onorab prosed avek ou kestyon *please*.

HON CHURCHILL GILL

Ou dir nou poudir *PUC* si *Bill* dimoun ki pey *Bill PUC* Mahe, alors ou bezwen pa sibvansyonn Praslin ...

MR SPEAKER

Onorab, eskiz mwan. Mon kourt letan nou annan kestyon, *this is Question Time*. Ou pa kapab antre en largiman avek Minis lo tou bann pwen ki in fer.

Ou bezwen poz ou kestyon, ou bezwen poz ou kestyon. Mon permet ou en pti lentrodiksyon. Me annou al lo ou kestyon pou ou terminen silvouple. Mersi.

HON CHURCHILL GILL

Sorti ki Praslin i kontribye en kantite dan *tax* Sesel, so i pa pou bezwen dimoun ki pey *Bill*

PUC Mahe, pou sibvansyonn Praslin.

Alors Minis ki dele letan ki nou espekte Fond Ferdinand - sa diskisyon Fond Ferdinand i kapab vin *fruitful* ki nou ava kapab war en *Management Plan* pou Fon Ferdinand? Vi ki an se moman napa.

E apre parey ou konnen Fond Ferdinand i annan bokou resours an term *Coco de Mer* ki sa ti form par dan son biznes.

Vi ki la bann diskisyon pe pran plas eski ou kapab donn nou en nide ki pe arive? Akoz dapre lenformasyon i annan en kantite koni ki pa pe ganny anmase. E sa i ti en sours reveni pou Fond Ferdinand. Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab. Onorab mon pou refer lo ou kestyon konsernan Fond Ferdinand premye.

Mon krwar a pwen ki ou'n fer sorti i enportan. Parey ou'n dir Vallée de Mai i vann son lekor wi. Posibleman dapre son labote.

Me Fon Ferdinand san en plan zesyon, san en administrater, i pa pe vann son

lekor li. Be vwala. Mr Speaker, dele letan pou Fon Ferdinand pou dir ki i annan 2 keksoz ki depan lo la.

Enn se bann desizyon ki *SIF* i pou fer. E nou espekte i kapab fer sa, sa lannen. Kot i konsern direksyon stratezik ki li i pou pran avek Fond Ferdinand.

Me parey mon dir i annan en lot keksoz ki pe met retar. E sa se konplet, letan ki i pou pran pou konplet ban prosesis avek Rezistrar.

E sa nou pa konnen kan i pou pran. Nou kapab re konfirman avek Rezistrar. E nou kapab enform Onorab letan sa bann lenformasyon i vin a nou laporte.

Kot I konsern *Coco de Mer* Mr Speaker, mon napa lenformasyon detaye lo ozordi lo si *Coco de mer* pe ganny anmase dan en fason efikas. E ki fason i pe ganny vann. Me nou kapab donn nou bann *MNAs* Praslin, Mahe, tou dimoun, en lenformasyon ki'n *updated* lo *Coco de mer* akoz Minister pe gard en lizye lo lavant *Coco de Mer*.

Menm eksportasyon lannwa *Coco de mer*. E nou konnen poudir *SIF* i gard en rikord konplet lo tou bann tranzaksyon *Coco de mer* ki i fer.

Alor nou kapab donn sa lenformasyon avek *MNA* letan nou sorti Lasanble la nou ava rode, e nou ava donn ou en lenformasyon ki konplet. E ki donn en bon portre ki sityasyon *Coco de mer* dan Fond Ferdinand ozordi. Mersi.

MR SPEAKER

Mersi Minis. Nou pou pas lo prosen kestyon. E mon'n remarke ki delegasyon ou reste parey. So mersi.

Nou pou al lo prosen kestyon 137 Onorab Georges Romain.

HON GEORGES ROMAIN

Mersi Mr Speaker. Minis mon kestyon i dir koumsa: -

Eski Minis i kapab dir avek Lasanble, ki bann mezir ki pe ganny pran pou redwir polisyon loder sorti kot lizin *IOT*? Mersi Mr Speaker.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pou ou kestyon konsernan *IOT*. Mr Speaker sa konsern ki'n ganny leve par Manm Onorab i enn ki'n ganny koz lo la dan plizyer lenstans.

Nou rekonnet lefe ki lizin *IOT* in ganny plase dan en landrwa stratezik dan Victoria, kot i annan plizyer lezot aktivite ki kapab fasilman ganny afekte par problem loder anvi sa kalite aktivite ki pe fer.

Nou a note par egzanp ki landrwa rezidansyel pli pros avek *IOT* i zis 700 met avek sa lizin.

Mr Speaker, *IOT* in envestir bokou larzan dan lepase, pou rod solisyon pou bann problem ki ti annan.

E Gouvernman koman en share holder. Nou ava rapel ozordi ki Gouvernman koman en *shareholder* nou ava rapel ozordi Gouvernman i en share holder ki anna 40poursan share dan sa lizin.

In travay avek *IOT* pou sorti kot i ete. E pou li amelyor son performans anvironmantal. I annan plizyer problem ki nou'n vwar dan lepase parey move kalite delo, ki ozordi in nepli vin en keksoz komen kot sa lizin.

Dan lepase minister Lanvironnman in angaz li avek sa lakonpanyen, pou ki en solisyon i ganny trouve. E ki sa problem loder i ganny rezourduouswa diminyen.

IOT in deza fini enstal en sistenm tretman modern, pou

fasilit tretman bann likid ki kapab koz sa loder.

Enn parmi bann lobzektif sa sistenm se pou zisteman ede rezourd kantite sa kalite likid oubyen sludge ki ti pe ganny depoze lo *landfill*.

E nou konnen sa i ti koz en problemn loder kot lizin, lo semen e osi Providence.

Depi ler ki sa sistenm in enstale, *IOT* in annan en routin travay *maintenance* lo sa sistenm dapre rekomandasyon sa lakonpanyen ki'n *supply* sa sistenm.

I bon note ki ver lafen lannen pase *IOT* ti fer renovasyon konplet lo son sistenm tretman delo salte likid.

Sa i vedir ki *IOT* i annan son *schedule* travay mentenans ki i bezwen swiv. Nou rekonnèt ki i annan lenstans ki sa lakonpanyen i rankontre problemn avek loperasyon sa sistenm.

E ki kapab kontribye pou okazyonn sa loder ki parfwa nou eksperyanse.

Mr Speaker, enn bann faktor ki nou osi pe prezimen i kapab pe kontribye pou nou eksperyans loder.

I letan ki travay pe ganny fer pou retir *sludge* kot sa lizin. Sa i ganny fer lo en baz toulezour. Kot sa konteni ki

annan *sludge* i ganny tire par en kanmiyon.

Nou'n ganny konfirman ki letan sa laport ouswa *access* i ganny ouver pou fer sa travay. se la kot loder i ganny eksperyanse.

Sa travay i ganny fer laplipar di tan 2 fwa par zour - 7er bomaten e osi aswar. Nou an diskisyon, Minister bi an diskisyon avek lizin pou vwar si sa travay i kapab ganny fer dan en fason diferan. Petet pli gran maten.

Byensir nou bezwen pran kont akse avek fasilite pou nou kapab depoz sa bann materyo dan en fason korek.

Mr Speaker, pou konklir mon ti ava osi oule asir bann Manm Onorab ki Minister Lanvironnman i kontinyelman reste angaze avek lakonpanyen *IOT*.

Pou ki sa konpanyen i pran son responsabilite pou asire ki otan ki posib. Sa problemn i ganny met anba kontrol.

E mon ti ava demann bann Manm Onorab sirtou bann ki dan rezyon lavil. Letan zot bann zabitan i dir poudir i annan problemn.

Zot kapab fer kontak avek Minister Lanvironnman an traver *Greenline*. E nou, nou ava fer le neserer pou nou

kontakte lizin e pou nou vwar egzakteman kwa ki pe okazyonn sa bann problemn loder. Mersi.

MR SPEAKER

Mersi Minis. Onorab ou siplemanter.

HON GEORGES ROMAIN

Mersi Mr Speaker. Mersi Minis pou ou larepons. Minis problemn *IOT* i pa en problemn ki fek arive. I en problemn ki bokou lannen sa problemn i la. Me sa loder ti'n al en kou. Me solman la in retourn ankor. Definitivman i bezwen kekfwa. I bezwen annan en problemn dan sa landrwa.

Swa en negligans, swa zot pa pe fer zot louvraz byen. I en landrwa ki frekant par bokou touris ek Seselwa. I en landrwa kot zot al pran bato pou al lo Praslin. E bokou dimoun i fer sa larout.

Ou pase dan ou loto, ou bezwen fer ou vit monte. Si ou vit pa monte loder i vin zwenn ou.

Minis mwan mon ti ava kontan demann ou, si sa loder i kontinyen persiste, ki Gouvernman i anvizaze fer?

Mon konnen pa pou kapab tir *IOT* la. Me selman ki Gouvernman i anvizaze fer pou kapab enn fwa pour tou pou

redres sa problemn? Mersi Mr Speaker.

MR SPEAKER

Mersi Onorab. Minis ou repons.

MINISTER FLAVIEN JOUBERT

Mersi Mr Speaker. Mersi Onorab. Mr Speaker parey Onorab in dir sa problemn i ariv en moman kot *IOT* in investir e in met bann sistenm an plas e loder in desann.

Nou prezimen i kapab annan serten defo ki'n arive resaman. E bann *staff* zot ava angaz zot en pe pli detaye avek *IOT* pou vreman idantifye tou sa bann pwenn kot i kapab annan loder.

Akoz i pa toultan en sel landrwa. Petet parfwa nou pe focus nou latansyon lo en sel landrwa. I posibil ki i annan lezot landrwa kot problemn i egziste. E i enportan ki nou fer e verifikasyon konplet lo sistenm.

Ki nou kapab fer letan sa sityasyon i vin an deor kontrol? Ou a rapel Onorab ki dan lepase *IOT* in menm demande pou *shut down* son sistenm.

E an konsekans nou konnen sa i osi enkli en *shut down* lizin. Sa i bann sityasyon en pe ekstrenm. Me vreman si i ariv bann sityasyon ki vreman kritik nou pou bezwen pran

mezir pou nou anpes sa sistenm fonksyonnen.

E koriz tou bann keksoz avek li avan ki nou les li kontinyen *operate*.

Me nou pa pe prevwar ki sa i pou arive dan limedya. E alor nou bann *staff* i a kontinyen travay avek *IOT* pou adres bann problem ki egziste kot sa lizin. Mersi.

MR SPEAKER

Mersi. Mon pa pou kapab pran kestyon lezot Manm pou sa kestyon. Nou pou termin avek li la.

E mon ava zis nou annan ankor en kestyon. Pou kestyon delegasyon Mrs Laure si ou ti ava kontan fer ou depar, *you are welcome*. Ou responsabilite in terminen. Nou pe gard Mr Matatiken pou prosen kestyon.

Mon prosen kestyon i en *Question Without Notice* ki ti'n ganny soumet koman en *Urgent Question*. Mon pa'n kapab klarifye li koman en *Urgent Question*, me mon'n profit lokazyon ki Minis i la pou les sa Manm demann son kestyon.

Mon annan osi en lot kestyon sorti kot Onorab Vidot ki ti'n demann en *Urgent Question* lo sityasyon Taxi drayver lo *Airport*.

Mon fer sa remark zis pou bann Manm konnen e pou

piblik konnen ki Onorab Vidot in fer son devwar pou anmenn en kestyon.

Me mon pa'n kapab pran li koman en *Urgent Question*. Mersi. Prezan mon ava apel Onorab Ernesta pou son kestyon.

HON PAUL ERNESTA

Mersi Mr Speaker. Mr Speaker dabor permet mwan fer mansyon spesyal, e remersye tou bann dimoun ki'n ede e ki kontinyelman ede dan bann letan i ariv bann dirzans anler Ros Sodyer.

E sirtou en mansyon spesyal pou sa patron bato ek son lekipaz ki'n ede.

E osi mon osi mazin bann fanmir sa garson ki dan en fason ou en lot trazikman in perdi son lavi resaman Ros Sodyer.

E mon ava swiy avek mon kestyon Mr Speaker. mon kestyon i *comme* swivan: -

Etandonnen ki dimoun pe souvandfwa noye Ros Sodyer Takamaka, eski Minis i kapab eksplik nou Lasanble ki bann mezir sekirite ki annan an plas dan sa landrwa, e si son Minister pe mazin fer okenn demars pou ranforsi sa bann mezir, si zanmen i annan, pou evit sa bann tel lensidan dan lavenir?

Mersi Mr Speaker.

MR SPEAKER

Mersi Onorab. Minis ou repons.

MINISTER FLAVIEN JOUBERT

Mersi Mr Speaker. Mersi Onorab pou sa kestyon. E parey Onorab mon rekonnet soufrans ki bann dimoun ki'n pas ladan, ki zot fanmir ouswa zot pros in ganny enplike dan bann lensidan ki'n arive Ros Sodyer.

Mr Speaker mon pe reponn sa kestyon prenon kont se pa zis Minister Lanvironnman ki responsab sa size.

Me an konsiltasyon avek lezot departman espesyalman tourism. Mon pe lir sa kestyon akoz i ti kapab egalman aplik pou lezot departman.

Mr Speaker, Ros Sodyer i ganny konsidere koman en latraksyon touristik lo Mahe. M e i osi popiler avek bann dimoun lokal.

Parey nou konnen i ganny trouve lo en propriyete prive dan distrik Takamaka ki son propriyeter i *Hill View Resort*. E sa i *ex-Bayan Tree Resort*.

Parey son non i dir, nou konnen poudir Ros Sodyer i en basen plizyer met fonder dan ki

delo i ranpli. E parfwa nou bann dimoun i vin vizite.

E i ariv serten keksoz, serten lensidan. Malgre son labote, sa sit nou tou nou konnen i osi danzere.

I annan laroul ek kouran ki ariv anler par lao sa trou. E bann laroul i kapab trenn en dimoun dan lanmer.

Depi zanbye sa lannen in annan e ka aksidan ki'n arive laba. Sa i enplik en etranze avek nasyonalite Slovak an Zen. En Alman an Out. En si ki sa Seselwa ki malerezman ti perdi son lavi. E sa ti an Out Sa lannen.

Bann Lotorite konsernen ti'n deza komans diskisyon avek propriyeter sa later dan lepase. I annan en komite ki'n ganny kree pou vwar ki fason pou anpes bann danze parey sirtou lo bann sit touristik dan pei.

Lo sa komite i annan reprezantasyon Departman Lanvironnman. Departman Tourizm, *SMSA* ki responsab *Maritime Safety*. Departman Lavyasyon Sivil, *Port ek Marine, Unit Service Life Guard* e osi Lazans Tenny Dife ek Sofaz (*SFRSA*).

Sa komite ti demann sa propriyeter prive pou enstal ban safety railings avek bann *board* lenformasyon pou anpes

dimoun vin lo bor ouswa benny dan sa trou li menm, ki nou apel Ros Sodyer.

Sa propriyeter pa ti agree pou enstal *railing* akoz i panse ki sa pou defigir labote sa sit. Me zot in agree pou annan bann *board* avek *warning* ki kapab ganny mete lo sa sit avan ki ou antre lo sa sit.

Baze lo diskisyon ki'n annan avek sa propriyeter. E reprezantan Departman Touris, sa propriyeter in agree pou finans *design*, *printing* e osi enstalasyon sa bann *board* ki nesese pou notife dimoun danze ki egziste kot Ros Sodyer.

Sa mesaz ki pou ganny mete lo sa *board* i pou dan diferan langaz. Ki enkli Angle, Franse, Alman e osi Italyen.

Tou tradiksyon bann mesaz *warning* in fini ganny fer par Departman Touris. E sa in deza ganny anvoye kot reprezantan sa propriyeter.

Ki deza an kontak avek bann lakonpanyen lokal ki fer design avek *printing* lo *board*. Zot dan formalite rod kotasyon ek bann *sample design* sa bann *board* avek sa bann lakonpanyen.

E mon ava fer resorti ki par egzansp i annan bann *board* standar ki nou ti'n deza, Minister ti'n deza travay lo la avek Lotorite Park Nasyonal ki

kapab ganny adapte pou bann menm travay.

Zis en lenformasyon adisyonnèl Mr Speaker, se ki Departman Touris in osi met bann *advisory* lo son bann platform medya sosyal enkli ki son *web page* pou avèrti dimoun ki sa landrwa i danzere.

E ki zot pa merit pe pran bann risk letan zot al Ros Sodyer akoz zisteman sa danze ki i prezante pou okenn dimoun ki antre dan sa landrwa. Mersi.

MR SPEAKER

Mersi. Onorab Ernesta ou a fer ou siplemanter bref silvouple.

HON PAUL ERNESTA

Mersi Mr Speaker. Mr Speaker briyevman, eski Minis dan zot diskisyon zot pe mazin osi enn premyerman, annan en restriktirasyon dan *lifeguard* pou fer sir ki nou annan dan bann rezyon?

E osi annan bann prosedir sofgard partou dan nou bann rezyon. Parey Anse Boileau, Anse Royale dan tou bann lezot rezyon, ki pou fer li fasil letan dan lentervansyon letan i annan bann ka koumsa ki arive partou?

Mersi Mr Speaker.

MR SPEAKER

Mersi Onorab. Minis.

MINISTER **FLAVIEN**
JOUBERT

Mersi Mr Speaker. Mersi Onorab pou sa kestyon. Me Mr Speaker sa kestyon i totalman a deor mon responsabilite. Mon pa kapab - mon pa konnen.

Me selman mon kapab notifiye Minis ki oversee *lifeguard*. E enform li poudir sa kestyon in ganny poze par Onorab dan Lasanble. Mersi.

MR SPEAKER

Mersi. Nou pou termin sesyon kestyon la. Mon remerisye Minis ek son delegasyon pou zot partisipasyon. E mersi bann Manm pou zot kestyon.

Nou ava repran travay apre midi 2er edmi. *Two thirty*. Mersi nou ava pran poz.

(BREAK)

MR SPEAKER

Bonn apre midi tou dimoun dan Lasanble e an deor. Bon nou annan devan nou pou sa apre midi en *Second Reading Public Bill. Truth Reconciliation and National Unity Commission (Amendment) Bill*.

Madanm raporter nou ava apel Vis-Prezidan e Mr Ally pou sa *Bill*.

Bonn apre midi e byenveni Vis- Prezidan Ahmed Afif. E

Attorney General Mr Frank Ally pou konsiderasyon *Bill* ki devan nou.

E pou komanse nou ava demann *Leader* Biznes Gouvernman pou Mosyon pou *Second Reading* sa *Bill*.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi Vis- Prezidan. Bonn apre midi *Attorney Zeneral* e bonn apre midi tou bann Manm Onorab e bann dimoun ki pe swiv nou.

Mr Speaker, anba *Order* 69 (2) nou *Standing Orders*. Mon *move* ki *The Truth Reconciliation and National Unity Commission (Amendment) Bill, 2022* i ganny lir en Dezyenm Fwa. Mersi.

MR SPEAKER

Mersi, mon a ganny segonnman pou sa *Bill* silvouple? Onorab Arissol?

HON SANDY ARISSOL

Mersi Mr Speaker. Bonn apre midi Minis avek AG. Bonn apre midi tou Manm. Mosyon i ganny segonde. Mersi.

MR SPEAKER

Mersi. Mon ava envit Vis-Prezidan pou fer prezantasyon lo *Bill*.

THE VICE-PRESIDENT
AHMED AFIF

Mersi bokou Mr Speaker. Bonn apre midi Mr Speaker. *Leader* Biznes Gouvernman, *Leader* Lopozisyon. Tou bann Manm Lasanble. E tou Seselwa a lekout.

Mr Speaker sa Prozedlwa ki mon pe prezante apre midi pe rod en lamannman avek sa Lalwa ki diriz komisyon Laverite, Rekonsilyasyon e Linite Nasyonal ki'n etabli depi 2019. Parey zot konnen sa Lalwa ti donn en manda *TRNUC* pou fer son travay pandan en peryod 3an.

Sa 3an ti koman 3 mwan apre ki bann premye Komisyoner ti ganny apwente. E vi ki zot i ganny apwente le 9 Me 2019, savedir zot manda i komans 3 mwan pli tar ki ti komans le 9 Out 2019.

Lalwa egzistan i donn *TRNUC* en manda 3an. Ki sipoze alors termin 3an apre le 9 Out 2019, i vin le 9 Out 2022.

Annefe le 9 Out sa Lannen 2022, *TRNUC* ti zwenn avek Prezidan pou donn zot rapor enterim. E dan sa rankont zot ti fer kler ki avek lakantite konplent ki zot in resevwar, letan e resours ki'n ganny met a zot dispozisyon, i pa'n posib pou zot kapab

konplet zot rapor final dan sa dele letan 3an ki Lalwa i preskrir.

Zot ti endike ki si zot manda i kapab ganny prolonze par ankor 4 mwan e o pli tar 31 Desanm 2022, sa pou permet zot kapab termin zot travay, e prezant en rapor final ek Prezidan parey Lalwa i demande.

Sa *Bill* ki devan nou i demann zisteman sa. Ki zot manda i ganny prolonze pou al ziska le 31 Desanm 2022. E si zanmen zot fini avan, zot manda a termin lo sa dat ki zot rapor final i ganny prezante avek Prezidan.

Lalwa i osi azout en provizyon pou donn sa kouvertir legal, pou tou aksyon e desizyon komisyon pandan sa letan ant le 9 Out 2022.

E sa moman kan zot manda i ofisyelman terminen si zot pas sa lamannman, ki pou pli tar le 31 Desanm 2022.

Avek sa prolongasyon manda Komisyon, kontra bann Komisyoner pou osi prolonze. Alor Komisyon ek tou son bann *staff* pou kontinyen zot travay, ziska ki manda Komisyon i terminen.

Alor lamannman ki devan nou i kouver vremen 2 *clause*. *Clause 11* apre *clause 14*. Anba *clause 11* i retir sa dele letan 3

mwan pou konplet travay apre ki zot in ekout tou bann ka.

Anba *clause* 14 i fer kler ki manda *TRNUC* i termin zour i prezant son rapor final ek Prezidan, ki tout fason pa kapab pli tar ki le 31 Desanm 2022.

Parey mon eksplike sa lamannman pou osi azout sa *clause* pou donn sa kouvertir legal sa Komisyon pandan sa letan ekstra ki pe ganny demande. Savedir, ant le 9 Out 2022 ziska kan i fini son travay. Esperon avan lafen lannen.

Vwala an gro ki sa Prozedlwa i pe demande Mr Speaker. Gouvernman i santi ki sa i pou permet sa travay enportan, pou anmenn Rekonsilyasyon, Laverite ek Linite Nasyonal atraver *TRNUC*, pou li termin son travay ek en rapor final e konplet, ava kapab ganny prezante ek Prezidan ver lafen sa lannen.

Mon alors kont lo zot sipor, tou bann manm Lasanble Nasyonal pou pas sa lamannman ozordi. E mon remersye zot pou permet *TRNUC* zisteman kapab fini son travay anba son manda. Mersi bokou Mr Speaker.

MR SPEAKER

Mersi Vis-Prezidan. Bon nou ava prezan met sa *Bill* lo *floor*

pou deba. E Onorab John Hoareau pou komanse. Onorab Hoareau.

HON JOHN HOAREAU

Mersi Mr Speaker. Bonn apre Midi tou dimoun a lekout. *Bill* ki devan nou parey in ganny dir, pe demande ki *TRNUC* son manda i *extend* ziskan le 31 Desanm 2022.

Dan bokou pei Mr Speaker, kot in annan labi pouvwar, sirtou labi dwa imen, ki'n ganny orkestre par en rezim ki'n vin an plas, nou vwar poudir i annan bann prosesis koumsa ki arive. Bokou dimoun in vin viktim bann sanzman. E bann prosesis rekonsilyasyon Nasyonal alor i enportan.

En sosyete i bezwen geri son nanm. Si in pas atraver atosite, ki'n fer ki son pep in polarize, ki'n fer ki'n anmenn linegalite e anpes son pep grandi dan larmoni, alor ou bezwen geri ou nanm.

Legzanp i kler otour nou, i annan en kantite pei ki'n fer li. E mon pa pou al dan tou sa bann pei, mon ava zis sit par egzanz Sidafrik. Boner dan bann letan 1990 apre ki ti m annan en *peaceful transition* sorti dan en rezim *apartheid* pou vin en rezim demokrasi, demokratik.

Ti annan en vre risk ki sa pep, sa pei ti pou tonm dan en ben disan. Alor apre sa tranzisyon Larsevek Desmond Tutu ti ganny komisyonnen. Oubyen ganny met koman *Chairperson*, pou li komans sa prosesis rekonsilyasyon.

Rwanda, 1994 apre ki ti annan en zenosid kont bann tribi Toutsu. Ler Prezidan Paul Kagame ti antre o pouvwar li osi i ti komans oubyen lans sa linisyativ, sa prosesis Linite Nasyonal e rekonsilyasyon Nasyonal.

Alors Sesel osi atraver Mosyon ki ti ganny anmennen par Onorab Ramkalawan *Leader* Lopozisyon sa letan, ti pase dan Lasanble. Ti demann pou en prosesis rekonsilyasyon Nasyonal ganny fer isi Sesel.

Pou fer sir ki nou konn laverite lo bann ka labi. Lo bann ka disparisyon. E sirtou bann ka ki'n pas dan lepok Parti Inik ki ti ganny dirize par en Diktater Prezidan Albert Rene.

I pa mon lentansyon pou al lo tou sa bann detay sa bann ka. Akoz in lo medya li menm. E tou dimoun in tande. Me i vremen enportan pou site, pou fer konnen poudir i bann moman tris ki nou'n vwar pase lo medya.

I bann moman kot in anmenn bokou larm. Me osi i

bann moman kot seren dimoun in vin devan in kapab anmenn en *closure* pou bann ka ki ti vremen persan dan nou listwar. I annan dimoun osi ki'n demann pardon. E in petisyon pou ganny bann amnesti.

Nou'n vwar atraver travay ki komisyon in fer fas avek bokou defi depi son komansman.

Premyerman i ti komans avek 7 Manm apre ti bezwen redwir. I ti annan li apepre 16 *staff*. I ti war pou dir determinasyon bann ka ti vremen difisil akoz louvraz ti *cumbersome*, ti bokou.

Pandan sa bann letan zot in anrezistre 374 konplent e prepar pou en rapor. Parmi sa 374 ka 361 bann ka, i bann ka vyolasyon drwa imen ki'n pase an 1977 a 1992. Letan sa gro nyaz nwar ti'n kouver nou pei. An total *TRNUC* in fer 266 *hearing*. E ekout environ 1200 temwen konplenan e siske. Serten sa bann desizyon in kouver, serten bann desizyon oubyen bann ka, bann konplent i kouver plis ki 150 paz.

Alor nou kapab konstate poudir i pa en travay fasil, i en travay ki pran bokou letan.

Lo kote reparasyon ki form parti travay sa Komisyon, nou'n vwar ki bann viktim pe demann ant R5 a 10milyon. E pou pey

pou plis ki 100 viktim. Pou lemoman ler nou get Lalwa - Lalwa orizinel. I dir ou the objective of the Commission is. Nonmen A, B, C, D E. E (A) i dir koumsa-

'To determine the Appropriate reparation for victims'. So sa size reparasyon i sipoze ganny determinen par Komisyon e non pa viktim lo menm dapre son Lalwa.

Me pou lemoman, rapor final ki pou annan sa bann rekomandasyon, pa ankor ganny soumet avek Gouvernman. Gouvernman in ganny zis en *interim report* parey Vis-Prezidan in fer nou remarke.

Alor byensir nou Gouvernman i en Gouvernman ki ekoute. I en Gouvernman ki analize. I pou get sa rapor tre byen dan tou son splander. I pou get son lenplikasyon bidzeter. Etidye lenpak ki pou annan lo nou lekonomi, sirtou en lekonomi frazil ki'n ganny ravaze par sa *COVID-19*. Alor i pou pran tousala an konsiderasyon.

Mr Speaker, mon pa poi pli long ki sa. Mon pou donn mon sipor sa bann provizyon ki'n ganny anmennen. pou fer ki *TRNUC* i kapab prezant en rapor final.

Sirtou sa i ganny ordonnen anba *Article 11 (3)* ki i bezwen prezant en rapor final.

Se pou sela ki parey mon dir mon pou donn mon sipor sa lamannman ki ganny anmennen. e avek sa Mr Speaker mon le remersi ou.

MR SPEAKER

Mersi Onorab Hoareau. Prosen enterven an i ava Onorab Gervais Henrie.

HON GERVAIS HENRIE

Mr Speaker bonn are midi. bonn apre midi tou dimoun. Mr Speaker mon krwar sa lamannman ki *VP* in prezante ozordi apre midi, esansyelman i fer en keksoz. Se ki i retir tou lensertitid lo stati sa Komisyon ler nou pe koze ozordi.

Parski evantnyelman i donn li sa pouvwar, drwa legal pou li kapab egziste ziska ler i prezant son rapor. Akoz parey in eksplike legalman sa Komisyon son travay ti'n merit fini.

Alor pou mwan ler mon pou vote, pou permet sa arive, mon pe fer li pou en rezon. Akoz mon santi poudir nou bezwen gannyen sa rapor.

Sa rapor i enportan. Pandan 3 an plizyer bann temwen zot in al devan sa Komisyon. E zot in rakont ban

zistwar en pe sanglan. Me ki'n firm parti nou listwar. E aprezan ki arive? Nou bezwen alor vwar sa rapor. Nou bezwen sa rapor aköz esansyelman mon krwar son bi letan sizyenm Lasanble par linanimite konsansis bipartizan ki nou ti vot lo sa Prozedlwa.

E apre en Lasanble dirize par Lopozisyon avek en Prezidan ki sorti dan en lot parti ti *assent*. Savedir ti annan en konsansis Nasyonal par Lepep Seselwa pou nou etabli sa Komisyon, pou konmsi kapab konkretiz Linite Nasyonal avek Rekonsilyasyon dan nou pti pei.

Me zis sa rapor tousel Mr Speaker, pa pou vedir gran keksoz pou nou tou. An komansman dabor avek sak Seselwa, ki nou isi anndan nou reprezante, dan le 26 distrik Sesel, i annan bann viktim, bann ki'n komet bann atosite nesessite pou zot rekonsilye.

Apre i annan rol ki bann Dirizan dan kominote pou bezwen fer pou ed sa prosesis apre ki sa rapor in sorti. E la nou pe koz lo bann politisyen an komansman par nou bann Dirizan relizye, sosyete sivil eksetera.

Donk sa rapor nou tou nou bezwen pe *look forward* pou vwar. Pou lir, aköz parey mon'n dir i ava temwany en

pase ase sanglan dan nou listwar.

Me ki dezormen malerezman nou pou bezwen viv avek. Me nou pa pou fer li, mon swete. Nou pa fer li vin en sikatris ki reste pou zenerasyon lavenir. Nou'n tann vann zistwar, nou'n plere, nou'n senpatize, nou'n demann pardon, nou'n pardonnen.

Me nou pou bezwen prezan evantyelman enn fwa ki sa rapor i vini, bouze, oublie avek promes ki bann tel keksoz pa pou zanmen ariv ankor dan nou pti pei Mr Speaker.

Pli enportan sa ki mon le dir, se ki dezormen letan rapor pou sorti, ki ozordi sa Lalwa pou permet. Nou pou bezwen nou tou koman Seselwa zer nou lekspektasyon. Nou pou bezwen apresye e konpran *the meaning of the word* apresye la ki mon pe servi.

Pou nou get nou pei kot nou ete. Groser nou lekonomi, rezerv nou pei, kwa ki nou kapab *afford*, ou pa *afford*. E ki nou kapab fer ouswa pa kapab fer. Nou bezwen annan sa lapresyasyon. Nou bezwen rekonsilye anver Sesel.

Ki ou isi, ki ou aryer, nou bezwen. E se dan sa prosesis la, rekonsilyasyon ki nou pou bezwen apresye sityasyon ki nou pei i ladan.

Mr Speaker mon note ki lo panel i napa personn sorti kot *TRNUC* ki la. Me an se moman ki nou pe koze eske ler rapor pe sorti, mon anvi satisfere mon lekor pou dir napa okenn nouvo ka. Okenn nouvo konplent ki pe ganny aksepte par sa Komisyon.

Me ki zot pe senpleman travay pou finaliz bann rapor, disi le 31 Desanm osi zot kapab, en pe pli vit ankor ki sa. Pou ki alor nou ferm en dosye. E apre ki arive? Sa Komisyon in anmas en kantite lenformasyon, bann *data*, zot annan bann dosye.

Alor i vin propriyete lekel? Bann lenformasyon personnel ki nou bezwen satisfere nou lekor ki i pa pou ganny kite alatrenn ouswa dan lanmen nenport ki. Me ki i bann keksoz ki nou pou fer sir i dan bon lanmen.

Me toudmenm mon remerci tou bann dimoun ki'n partisip dan sa proses. An komansman par sizyenm Lasanble ki'n fer li posibil. Bann dimoun ki'n annan kouraz pou avans devan rakont zot zistwar, bann ki'n annan limilite pou ale aksepte ki zot in fer.

E piblik Seselwa pou aksepte sa proses. Mon priye ki in ed nou grandi ansanm koman en Nasyon. E ki

dezormen letan sa rapor pou sorti, nou ava vwar poudir nou ava kapab benefisye avek transformasyon ki in anmennen dan nou sosyete.

In form parti en proses. Nou'n retourn dan miltiparti. Sa Komisyon in ganny aksepte e in egziste preski dan menm letan kot premye fwa nou'n war en sanzman Gouvernman demokratik. Ki in annan en tranzisyon dan lape. In annan en stabilite dan servis piblik.

E alor mon swete ki rapor *TRNUC* letan i pou sorti evantuelman, i pou parey mon dir o komansman konkretiz sa rekonsilyasyon Nasyonal ki Sesel i bezwen, avek sa Linite Nasyonal.

Son rapor i ava ed nou koman en pei, koman en Nasyon pou nou akseler letablisman, *Rule of Law* dan nou pei. Reform nou sektek sekirite. Pou lezitimiz bann lenstitisyon Leta e batir en lavenir dan lape avek stabilite.

Alor Mr Speaker, mon pou siport sa lamannman pou ganny sa peryod agrandi pou kapab fini sa rapor.

Pou ki Sesel e Seselwa vremen ava kapab tir en lesan dan sa proses ki nou pas ladan dan sa dernyen 3an. Mersi Mr Speaker.

MR SPEAKER

Mersi Onorab. Mon aprezan apel Onorab Waven William pou son lentervansyon.

HON WAVEN WILLIAM

Mersi Mr Speaker. Mr Speaker lo sa Prozedlwa ki mon napa problem pou mon kapab donn sipor. Mon anv i ki letan mon pe donn mon sipor ki *panel* i kapab eklersi sa Lasanble, an menm tan avek pep Seselwa ki'n sivre travay Komisyon.

Mr Speaker, par lefe ki nou demann en ekspansyon e travay pa ankor fini. Akoz letan mon pe fer en pti pe resers, mon vwar poudir i annan apepre en 200 *pending cases*.

Eski nou annan sa garanti poudir pou napa ankor bann lezot *case* adisyonnèl?

E dezyennman, eski ki dan nou lespri la, e lespri pep Seselwa la deor, eski pou annan en demann pou Bidze adisyonnèl?

Par lefe ki zot pa'n kapab konplet sa travay. E zot diskisyon zot in dir poudir ti annan en problem mankman ase resours. Me eski la avek sa ekspansyon zot pe osi, i pou osi anmenn avek li en kou bidzeter? Eski nou pe espekte en demann pou en Bidze Siplemanter pou *TRNUC*?

E mon lot konsern se ki wi, mon tout an faver sa laspe rekonsilyasyon Nasyonal. E eski nou pou vwar osi lanfaz ganny sorti dan sa rapor? Akoz i resanble difikilte in en pe lo sa kote.

E an adisyon nou vwar osi poudir i annan en lasosyasyon ki'n ganny formen, ki annan bann demann ki'n ganny met devan an term monneter.

La mon pa kont sa bann dimoun ouswa bann demann zot met devan. Me solman eski - mon re eksplike eski dan sa rapor i pou reflekte en pe osi travay sa lasosyasyon? Akoz dapre lenformasyon ki mon pe lir la, se ki i form parti konponan anba sa *Act*.

So sa i en pti pe bann konsern ki mon ti ava kontan ki mon ganny eklersi lo la. E par natir sa travay, eski si demen bomaten *TRNUC* i vin devan i demann ankor letan pou *expand*, eski sa pou ganny *entertain*? Par lefe ki o debi zot in deza dir poudir zot annan mank kapasite.

Mr Speaker avek sa de pti mo, mon ti ava kontan ganny sa detrwa leklersisman. An menm tan parey mon dir mon napa problem pou mon donn sipor sa *Bill*. Mersi.

MR SPEAKER

Mersi Onorab. Laparol i aprezan pou Onorab Wallace Cosgrow.

HON WALLACE COSGROW

Mersi Mr Speaker. Bonn apre midi Mr Speaker, Vis-Prezidan, *Attorney Zeneral*. Mr Speaker mersi pou donn mwan laparol pou dir de pti mo lo sa Lalwa ki devan Lasanble ozordi.

Annefe, entervenans ki'n koze avan Onorab William, in koz en pti pe lo rezon det akoz ki sa Lalwa ti ganny anmenn devan. Akoz ti annan sa formasyon *TRNUC*.

E in koz en pti pe lo sa konsansis bipartizan ki ti annan sa letan ler Lalwa ti vin devan Lasanble. E i montre ki poudir ti annan en lavolonte lo lapar tou lede koke parti dan Lasanble Nasyonal, e osi Gouvernman pou nou kapab bouz devan avek bann diferan konsern ki ti annan.

Se ki konsern bann size ki *TRNUC* i touse. E ti annan sa nesessite, sa lanvi pou ki nou bouz devan. E pou mwan sa nesessite, sa lanvi e sa konsansis bipartizan, i koz bokou. I dir bokou.

E i montre ki poudir nou ti anvi war en prosesis kot nou komans en keksoz. Nou etabli bann fe. E nou bouz devan.

E Lalwa parey nou konnen ti'n donn en peryod pou nou kapab fer sa. In donn en peryod pou nou kapab fer sa, e i annan diferan alokasyon bidzeter ki'n vin avek sa Lalwa ki nou'n met devan.

Diferan lannen nou'n war poudir *TRNUC* in vin devan Lasanble Nasyonal. E *TRNUC* in pled son *case* pou kapab ganny Bidze, pou fer son louvraz ki in ganny mandate par Lalwa.

Mr Speaker, bokou louvraz in ganny fer wi. Me mwan mon santi Mr Speaker ki san ki mon petet ofans okenn dimoun ki'n pas devan *TRNUC*, mwan mon santi Mr Speaker ki dabor Lalwa i fer provizyon. E sa i dan seksyon 2(8) ler i koz lo vyolasyon. I koz lo bann keksoz ki'n ariv pandan, e an relasyon avek koudeta.

Be Mr Speaker anyway nou tou nou'n swiv *TRNUC*. In pas lo televizyon, nou'n war. Mr Speaker, mwan personnelman mon santi ki poudir i annan bokou bann ka ki'n anmenn devan *TRNUC* ki annan son merit.

E ki ti al an lakordans avek provizyon ki Lalwa i demande. Me par kont Mr Speaker mon santi ki *TRNUC* in osi dan en sans desot son *border*. E in ekout en kantite bann ka *or* en pe bann ka ki

petet pa neseserman relye avek son manda ki i ti gannyen dan Lalwa.

Bokou bann ka ozordi ki *TRNUC* in ekoute, sete bann ka ki ti petet kapab ganny dil avek, avek bann lezot lenstans lezot Lalwa ki'n ganny etabli Sesel. E ti kapab petet ganny en rekour anba sa bann lezot lenstans. E ki petet ki'n arive Mr Speaker?

Sa bann lezot *case* ki a mon avi - e la mon pou dir zot, a mon avi. Ki petet pa ti devret pe pas devan *TRNUC*. Akoz i pa an relasyon avek seksyon 2 (8) Lalwa.

In pran, in fer ki in pran en kantite letan *TRNUC*. Zot in bezwen al fer bann investigasyon. Zot in bezwen fer *hearing*. Zot in bezwen ekout bann lezot *witness*.

So se sa in fer ki'n pran en kantite zot letan ek resours dayer, pou zot kapab ekout sa bann ka.

E mon santi ki si *TRNUC* ti *stick to* son manda ki dapre Lalwa - e ki dayer nou tou nou ti dakor. Or Lasanble avan ti'n dakor ler ti fer Lalwa, ti'n donn li en term 3an pou li konplete, mon krwar ki ozordi ler ti'n ariv lafen son manda, *TRNUC* ti pou dan en pli bon pozisyon pou li kapab *submit* son rapor.

Annou pa bliye Mr *Speaker*, en ekstansyon manda *TRNUC*, i enn ki pou osi kout piblik Seselwa *additional funds*. Plis larzan.

Plis larzan, i pou kout plis resours. Plis letan, pou zot kapab fini prodwir sa rapor, ki parey mon'n dir, mon krwar ti'n devret kapab fini prodwir, pandan sa bann letan ki zot ti'n gannyen akoz zot in ekout bann *case* ki *genuine*.

Me problem se ki zot in ekout bann *case* ki ti kapab ganny dil avek dan bann lezot lenstans. E sa i pa zis *TRNUC*. I annan bann lezot lenstans ankor kot ou war ki poudir Gouvernman zot fer bann keksoz ki an deor petet zot *remit*.

Aprè vini bezwen korize, bezwen al isi al laba. Refer Lalwa. Dir en keksoz apre *retract* sa keksoz. So pou mwan konmsi ou ava krwar sa i resanble menm kalite fason loperasyon ki ozordi Gouvernman pe *operate*.

So, mon en pti pe agase avek lefe ki nou bezwen rod plis resours. Rod plis dimoun, depans plis larzan pou kapab *extend* pou kapab ganny en rapor avek *TRNUC*.

Mon santi ki si *TRNUC* ti'n *stick to* son manda, mon repet ankor, ozordi nou pa ti pou war

nou dan en sityasyon kot petet nou ti pou bezwen demann ekstansyon pou *TRNUC* fini rapor.

Me menm si mon'n dir sa Mr Speaker, mon konnen ki poudir rapor i enportan. Rapor i enportan akoz nou bezwen konnen. Pep Seselwa i bezwen konnen. I bezwen war en rezilta final, tou sa bann lannen ki nou'n met Bidze, nou'n met zefor, nou'n met larzan dan sa Komisyon.

So menm si sa, nou bezwen kapab fini. Selman mon ti ava swete ki sa rapor ti'n kapab fini ariv devan Prezidan Larepiblik. E ki nou ti kapab ozordi pou nou dan lentere kapab fer sa ki Lalwa i dir, *or* sa ki pep pe demande rekonsilyasyon. E nou koman en pep nou bouze pou benefis Sesel. Nou ti'n devret kapab fini ganny tou sa ki mon'n nonmen.

Alor Mr Speaker mon pa tro konfortab avek sa bann ekstansyon. E mon krwar ki poudir Gouvernman ti'n devret petet war lezot fason ki manner, fer sir *TRNUC* i konplet son travay *on time - on time*. Delivre pou Seselwa *on time* lo sa ki i ti'n ganny *mandate* pou fer. Avek sa Mr Speaker mon a remersi ou.

MR SPEAKER

Mersi Onorab. E prosen Onorab, Onorab Johan Loze. Ou annan laparol.

HON JOHAN LOZE

Mersi Mr Speaker. Mr Speaker les mon komans dan sa fason. *The healing is not in the telling itself.*

From a psychoanalytical point of view en dimoun ki'n ganny afekte, ki'n ganny tromatize, ki pe *walk around* avek en *hurt*, en *traumatic experience*. Ou pa kapab espekte ki *letting sleeping dogs lie the dog itself will necessarily go to sleep or lie. Trauma will be trauma* i pou prezan, i pou *resurface*, i pou aktiv dan sa dimoun.

But having said that, i pa rezonnab pou nou espekte ki ou pou annan en *healing process just with the telling, with the recounting, with the bearing testimony of* sa ki'n arive ek sa dimoun. Ou kapab annan en komansman gerizon. Ou pa annan en gerizon la.

An menm enstan ou bezwen espere ki dimoun pou annan diferan reaksyon avek *peace making*. Avek prose rekonsilyasyon, konsiltativ. E prose *healing* bann lezot. I normal, nou tou nou imen. Nou tou, nou endividi. Prenon kont tousala, nou annan en kantite

dimoun ki'n vin devan ki'n komans *the process of healing*.

I annan en kantite dimoun ki zot, zot in vin devan pou rezon pou zit menm. *That is something else*. Annou pa al ladan. *But* eski i rezonnab pou nou konman en sosyete espekte nou'n komans sa prose, e i termin avek soumisyon sa rapor?

Mon pe koz pwennvi *healing* bann dimoun ki'n santi ki zot in ganny afekte dan en fason ou en lot. Akoz nou *focus* la, i nou donn ankor 3 mwan pou soumisyon en rapor apre *we are done*. Petet mwan mon ti a'n swet war en *way forward*.

Mon pa konnen si i pou dan sa rapor. *I hope*. Sirtou pou bann dimoun en serten *after care*. Mon vwar Per Pierre Legliz Plaisance pe fer son bout. *But* nou bezwen konpran koman en Nasyon ki sa ki nou'n dekouver la, sa ki nou'n al ouver. I en keksoz fondamantal. *It runs deep*. Nou'n fer politik avek, a gos e a drwat. Be nou pa pe kapab zis vini dir donn ankor 3 mwan apre i hope nou *move on*. Nou konpran? Nou konpran ki nou'n zwe avek la? Nou pa pe kapab.

I pa fini dan 3 mwan sa. I pa'n ni menm komanse sa. Akoz si nou pran sa latitud. Deza mwan mon pou dir zot i

annan en kantite dimoun dan sa pei *right now*, pa santi ki okenn rekonsilyasyon in ganny aporte par sa Komisyon Laverite, Rekonsilyasyon e Linite Nasyonal.

Me ler pa'n ariv rekonsilyasyon, en kantite dimoun pa santi zot pli ini ki zot ti ete avan kreasyon sa Komisyon. So nou pa kapab zis vini akoz i annan sa mo 'laverite, rekonsilyasyon, linite Nasyonal' e krwar ki sa bann mo par mazik zot in *part* zot bann benefis lo nou koman en Nasyon.

Mon pa krwar i pou mars koumsa. Si nou serye i pou annan en zefor lonterm pou ganny fer konsernan *peacemaking*. Konsernan *healing*. Konsernan ki mannyer nou koman en Nasyon nou dil avek sa bann verite ki'n mont lo sirfas.

I byen nou vini nou asize,
Wi, Atrosite!

'77!

Diktater!

I byen, i gou nou pe fer politik. Be viktim, viktim in vin devan. *How do we cater* pou bann viktim ki'n vin devan ki'n pour *out their souls*? E ki mannyer nou *cater* pou bann diferan reaksyon ki bann diferan eleman dan nou

sosyete, pe annan vizavi sa legzersis ki'n pase?

Akoz dir mwan sa ki zot oule, i pa'n en *unifying factor*. E diferan dimoun in tyonbo diferan keksoz. I annan dimoun i dir ou zis lefe ki sa Madanm Makati sepa ki manner i apele la - ler serten keksoz i ganny dir i asize i fer koumsa. Sa i dakor avek sa.

Bon i en *lack of professionalism* de lapar sa Madanm etranze, ki ti'n ganny konfyè sa *task*. E ki'n ofans serten dimoun ki ler non serten dimoun i monte, wi in *nod*. Ouswa i *lead on* dimoun ki i pe kestonnen.

I kler osi la ankor ki sa madanm i pa'n zanmen fer enterogasyon dan son karyer. I pe *lead on*. I pe met parol dan labous dimoun. Be Seselwa i pa en Nasyon bet li. In trouve poudir sa *process* ti *flawed to a large extent!* Be nou pa kapab zis asize dir wi i byen nou'n ganny Rekonsilyasyon. Nou'n ganny Linite Nasyon. Bate lanmen zanfan ganyen gato!

That is not what happened! Wi viktim in vin devan e zot in *pour out their souls*. Be nou bezwen asize la anndan rekonnèt ki bann blesir ki'n ganny met devan *will have to be taken cared of on a long term basis*.

E bann dimoun deor ki get sa koman en *flawed process*, zot osi nou bezwen ekout zot e konpran ki zot pe dir. E aköz ki zot pe dir sa ki zot pe dir. Be pa sa ki mon pe tande la anndan ozordi. Mon pe tande bravo, byenfer, in byen ale. E dan 3 mwan nou fini avek rapor i vini, nou *move on* koman en sosyete.

Be ki manner nou kapab *move on* apre ki nou'n al ouver sa *can of worms* la konbyen nou *move on* dan 3 mwan?

En gran poursantaz nou pep pa ankor konpran kwa ki'n vremen pase. E nou pa'n ni fer nou sosyete, nou pa'n fer nou pep en servis par met sa '77 ziska *maintenant*.

Apre nou vini nou dir en peryod dan nou zistwar ki'n annan atosite. Be lesklavaz pa ti atosite li? Ti napa atosite avan. Pa'n zanmen annan atosite avan '77 Sesel.

Nou ti viv dan *cotton candy* nou koman en Nasyon. Nou ti ganny *chou choutes* nou. Franse ek Angle ti *chou choutes* nou koman lesklav nou. Ti byen.

Dan bann lannen '78 ti ankor annan fanmir ki ti pe anmar pti boy deor dan gro ker soley avek pye papay. Zanfan 9an. '78! I annan dimoun ozordi ki gran, ki adilt ki li in grandi pe zwe ek pti boy ki ti ganny

anmare deor dan lapli, dan gro ker soley!

E sa i *definitely*. (Onorab Larue mon tann ou ler ou'n dir bann Jumeau. *I hope* mon gran ser Lydia i tande ki ou dir ou sa la)!

MR SPEAKER

Onorab Loze mersi pou fer referans avek Onorab Larue. Mon'n tann Onorab Larue enn, de fwa. Mon pe demann li silvouple pou tenir silans ou mwen.

Nou dan en deba serye, nou dan en deba sansib. Annou respekte parol lezot dimoun. Onorab Loze silvouple kontinyen.

Les mwan kontrol bann lezot Manm.

HON JOHAN LOZE

Mr Speaker, Moris nou vwazen, i ti *set* son legzersis pou komans depi lannen 1638 dat kolonizasyon.

In pran son listwar dan son antyerte. Antye. E i pa'n pran zis serten keksoz dan son listwar. In pran tou sa ki'n arive - *classism*, labi sosyoekonomik, labi dan landrwa travay. Ki'n la parey mon dir zot *trauma*, *you cannot lead this sleeping dog lie*.

Generational trauma i vin *through the recounting* ler manman i koz ek son fir, i koz

ek son garson. E i vin zenerasyonnel atraver *we pass it on and we keep passing it on*.

Legzersis ki nou'n fer Sesel i *faulty*. *I faulty* aköz nou'n fer li pou rezon politik, avek en bi politik pou ganny en gen politik out *of it*.

E prezan nou pa ni menm ki mannyer nou pou fini li e ki mannyer nou pou bouz devan avek. Nou pa'n pran an kont nou listwar e domaz ki'n arive avek nou pep *throughout* son *history* ki in isi.

E nou kontinyen fer bann *false statements* kot nou vini nou dir, en parti nou listwar kot in annan atosite. Konmsi zos sa parti nou listwar ki'n annan atosite. Selman nou'n en sosyete ankor fonde dan lesklavaz!

E nou pa rekonnet, nou refize rekonnet ki lesklavaz ti en problem. I pli gran atosite ki'n arive avek sa pep ki apel Seselwa ziska ozordi -. *To-date!*

Mwan dir mwan sa ki zot oule. Be i pa ni menm en konpetisyon ki pli gro atosite ki mwens atosite. I zis en kestyon nou ti'n devret fer sa ki byen e avek bon lentansyon. Zot lentansyon pa ti bon *to start with*. I pa ti bon, i pa ti byen. Se pou sa ki nou'n ganny sa dat

'77 an montan ziska *maintenant*.

E prezan nou vini byen proud. Nou'n *achieve*. Laverite, Rekonsilyasyon avek Linite Nasyonal. An gran parti bann endividi in koz zot laverite.

E mon dir *chapeau*, e mon dir zot felisitasyon. And I *hope*, mon vreman swete, mon senserman swete, ki koman en pei nou kapab trouv a *way forward*. Pou bann viktim ki'n vini, ki'n koz zot laverite, ki'n *come in search of healing*, ki nou kapab annan en *way forward* akoz *the healing is not in the telling*.

Dimoun pa pou geri zis akoz in vini in dir. Dimoun pou bezwen ganny ankadre. E lafason ki sa ki zot in dir in ganny resevwar osi pou bezwen ganny eksplike. Nou pou bezwen kontinyen koze koman en Nasyon.

Be osi nou vini nou'n dir ki sa i ava ed nou vin en sosyete ki annan plis *rule of law*. Ranforsi bann lenstitisyon Leta. Reform nou bann lafors sekirite. Nou bann lafors sekirite pe pran plezir pou bat dimoun konmela. Antre dan ou lakaz fer nenport kwa. Pez ou ater dan rigol met botin dan ou latet. Trenn ou lo koltar.

E la nou'n ganny dir poudir *hopefully* sa *process* ki

nou'n pas ladan i ava ed nou reform nou bann lafors sekirite. Akoz ozordi en lager kont drog i donn lafors sekirite fer nenport kwa sa ki zot anvi e i pou ganny sipor. Akoz i pe lager kont drog.

Demen nenport ki parmi nou i ganny kadase. Pe lager kont drog menm. I annan en rezon akoz sa pti mo *rule of law* ti form parti konba *SNP for all these years*.

Mr Speaker ou pou konn sa tre byen, ou'n lager pou sa ou. Minis Derjacques pou konn sa pli byen ankor i ti asize dan sa Lasanble ti nonm sa 24 lo 24. Ozordi zot pran *rule of law* zot ploy li piti pit zot fou dife ladan. Zot dir zot pe lager kont drog. E zot pyetin lo *rule of law*.

I ti toultan pozisyon *SNP* ki *regardless* kwa ki Leta pe fer. Leta i devret ganny restrikte par *rule of law*. I pa zot pozisyon ozordi. Zot pozisyon ozordi se lager kont drog. I donn zot *carte blanche* pou fer nenport kwa. Prezan vini vin dir nou sa prose ki nou'n pas atraver la, i ava ed nou reform nou bann lafors sekirite.

Depi nou lafors sekirite, depi nou sistenm lazistis in vin en *joke*. Zot pa'n sanze zot parey zot in promet Seselwa, ti pe vin sanze. Zot in adopte, e zot in adopte tou vilen manni ki zot ti dir zot pou lager kont.

Ozordi in kouve avek zot. E zot pa ni konnen ki pou fer avek pov zot. Prezan vini dir nou reform nou bann lafors sekirite.

Ranforsi bann lenstitisyon Leta. Be zot servi tou loportinite ki zot gannyen pou zot degrad bann lenstitisyon Leta. Tou sans ki zot gannyen zot degrad bann lenstitisyon Leta. Zot fer manner ki zot anvi avek bann lenstitisyon. Zot pas Lalwa otan ki posib pou zot tir pouvwar dan bann lenstitisyon.

Ou konnen lekel lenstitisyon ki zot pe ranforsi? Mrs De Silva, zis li. Li nou ranforsi son pouvwar, lo pouvwar, lo pouvwar. Li i ganny en konsantrasyon pouvwar enorm.

MR SPEAKER

Onorab eskiz mwan mon pou demann ou, pa fer referans avek bann endividi par non. Sirtou ler ou pe fer en alegasyon ki vreman serye. E ki ou pa pe sibstansyel.

Alor prosede avek ou largiman lo bann pwen san referans avek bann endividi. Mersi.

HON JOHAN LOZE

ACCS li zot ranforsi son prevwar li. Akoz i vin la anndan. Sak fwa pou ranforsi pas la

devan mwan. *Substantiation* i lo *Order Paper*. Zot pas zot letan zis ranforsi son pouvwar. Sel Lenstitisyon Leta.

Tou leres i ganny *diluted*. Zis ACCS, sel lenstitisyon Leta ki enteres zot pou ranforsi. Pa ki i pe fer byen pov pti bet li osi en. I annan son bann *challenges* li osi. Akoz *case* 50 milyon nepli 50 milyon la. In ganny deleye la, i lo bann lezot zafer la. selman sa en lot deba pou en lot ler.

E finalman i paret mwan nou pa pe tir okenn lesan dan lafason ki nou pe administre bann biznes Leta. So sa bann pwen ki mon fer dernyen la. Mon'n lev li akoz lafason ki zot, zot in koze. Ki zot, zot in vin dir.

Mwan mon ti pe vin zis koz lo *how we move forward with the healing*. Ki mon pa santi *is being taken care of*. Be selman vi ki zot pe dir nou *rule of law*, ranforsi bann lenstitisyon leta. Mon santi monn bezwen dir de mo lo la.

Akoz ozordi sa pei in vin en fars. Tou sa ki zot dir zot fer le kontrer. E sirtou tou sa ki zot ti dir zot ti pou fer letan zot ti *SNP*, i zis mansonz.

Parske ozordi sa menm parti politik ki ti dir i annan tro bokou kontrol, bezwen liberalize, bezwen louvertir, zot vini zot Minis i asiz dan

Lasanble pou pas Lalwa, in nonm sa mo kontrol 6 fwa. Mon ti ekout li mwan. 6 fwa i nonm kontrol. Sa bann madanm ki vey pti zanfan deor i asize i ekoute. I dir be zot ti ganny promet en keksoz diferan zot. So zot in fer en *complete reversal of* tou sa ki zot in dir dan lefase.

Mr Speaker, an terminan mon swete ki nou pran sa kestasyon *healing*. E mwan mon pou apel li *peace making* o serye. Nou nobou ganny en *clear way forward*. E fransman pou dir ou, mwan mon pa krwar ni TRNUC, ni son rapor. I *capable of* donn nou en direksyon lo la. Be nou pou bezwen li.

Nou pou bezwen en fason pou pran ka avek bann blesir ki'n mont lo sirfas. E nou pou bezwen en fason pou fer konpran, pou fer nou pep nobou analize, dizere. E pou nou annan en bon legzersis *of peacemaking* dan sa pei. Mersi Mr Speaker.

MR SPEAKER

Mersi Onorab. Prosen entervenans mon ava pas laparol Onorab Uranie.

HON ROCKY URANIE

Mersi Mr Speaker. Bonn apre midi VP avek AG. Tou koleg

Onorab e byensir tou zabitan Zil Pros ki a lekout.

Mr Speaker sa size TRNUC i en size ki en pe sansib. Akoz pou mwan ler mon swiv, petet mon'n war i annan bann ka ki vremen *genuine*. Ki bann dimoun in vin devan avek.

Me osi i annan serten letan ler mon ti pe gete, mon'n vwar i annan en bann ou a krwar zis pou li viin vin devan. Mon ti a kontan ki zot pa ganny mon mal. Me sa i lafason ki mon'n santi. I annan ki mon'n war i vremen *genuine*. Me i annan pou mon ou a krwar ki in vin zis devan. Mannyer la fason keksoz in ganny fer.

I enportan pou en pei Mr Speaker, nenport ki pei kot serten keksoz in pase. Petet pou bouz devan dan lape, pou nou ganny sa linite Nasyonal.

Kot byensir nou bezwen rod en fason pou nou kapab sey soulaz sa bann viktim, ekout zot. E osi ekout bann *perpetrator*. Akoz zot osi zot form par sa rekonsilyasyon.

So pou nou kapab etabli serten baz, pou kapab ganny sa lape, sa linite ki pe rode, sa rekonsilyasyon ki pe rode.

Mr Speaker, ou annan dimoun ler in vin devan mon ekoute - parey mon dir, ou vwar poudir kekfwaw in pase atraver serten sityasyon ki pa dezirab.

Me ler mon'n osi, e pou sa bann *perpetrator* ti ganny demande pou vin devan. E zot ti ganny promet iminite.

Me mwan mon ti ganny n konpran ki sa ti pou depi koudeta ziske mon krwar ziske '92 an montan.

E apre parey) Onorab Cosgrow in dir avan mwan, mon krwar sa in depase, in ale. Ki ti annan bann lenstitisyon dan pei ki ti kapab dil avek bann lezot ka, ki kapab anmenn kondannasyon. Me prezan ki mannyer in fer, sa bann dimoun in fini vwar, in fini tay kot *TRNUC*. Zot in fini ganny iminite. Kan petet i annan ki ti'n merit kondannasyon.

Me aköz *TRNUC* i pa'n swiv byen son manda parey i ti devret ale, in les deborde pou en rezon ou en lot.

E la bann petet ki ti devret ganny kondannasyon in finalman bann *perpetrator* in ganny iminite.

Pou mwan mon vwar sa i en pe. *TRNUC* in tay avek. E dan serten fason pou mwan personnelman mon war li en zouti politik osi. In ganny servi koman en zouti politik. Ki in ganny en serten egzazerasyon tou parfwa. E prezan sa nouvo Gouvernman i annan serten

keksoz ki in senmen kim pou rekolte atraver sa.

Bokou pe mazin larzan koman en reparasyon Mr Speaker. Aköz byen boner nou pa'n fer zot konpran byen ki kalite reparasyon.

E ler mon ekoute bokou pe koz larzan. Petet i annan dimoun ki li ki mannyer i ete i santi ki larzan i ava ed li rekonsilye.

Mon pa konnen. Petet i annan dimoun ki koumsa. Me i annan ki *genuine*, in pare pou li pardonnen. In pare pou li rekonsilye. Zis i ti anvi *closure*.

E mwan mon krwar *TRNUC* ti bezwen plis baze ver sa li, son bi. Anmenn Lape, Linite Nasyonal, ek Rekonsilyasyon. Me i annan ler mon ti swiv fransman la devan bann *perpetrator* ti kriye,

“Zanmen, zanmen, e zanmen mon pou pardonn ou!”

E sa osi nou pa kapab blanm sa dimoun aköz i pe dir sa. Li ki santi. Li ki santi.

Onorab Loze avan mwan in dir ki sa ekstansyon ki pe donner, *it is not the end* sa. Pou ariv Linite Nasyonal, pou ariv sa reparasyon, i bezwen ki politisyen li menm li, i aret fer bann politik ki pou zis kraze. Me plito anmenn bann keksoz pozitiv pou fer sa bann dimoun vwar ki *TRNUC* ti pe sey fer.

So Mr Speaker, tou lede viktim e *perpetrator* zot bezwen tir sa ki zot, sa ki dan zot lestoman, sa ki dan zot lespri, pou zot kapab soulaze. E mon asire sa bann ki'n vin devan zot santi zot bokou pli soulaze ler zot pa ti ankor vin devan.

E mon krwar sa i imen. I annan ki ler i vin devan si i dir, si *genuine*. I pou santi li bokou pli soulaze ler in dir laverite. *Ok*.

So alors nou bezwen en rapor pou *submit*. Me *TRNUC* si ti'n fer son louvraz byen, i pa ti pou bezwen sa ekstansyon. I ti pou'n kapab *submit* son rapor.

Be dan son rapor nou ti ava voudre vwar ki kalite rekomandasyon i vin avek. Akoz si mon ti ekout byen medya, mon ti tann sa madanm dir li menm ki sa prosesis li menm, pa pe vreman vwar sa rekonsilyasyon ki i ti pe espekte.

E sa pou mwan i montre ki eski *TRNUC* in vreman akonpli sa ki i ti devret fer? (Mr Loizeau lev ou lanmen ou ava koze ou, pa bezwen *disturb* mwan. *Ok?*)

So Mr Speaker, *TRNUC* in demann son ekstansyon ki mwan senserman mon krwar parey mon dir, si i ti'n fer li byen i pa ti pou bezwen. Me mwan mon pou ensiste ki nou bezwen get pli lwen ki sa.

I annan en lasosyasyon ki'n ganny formen, ki mon krwar ki pe al travay ansanm avek sa pou get sa rapor li osi. Pou gete ki pou arive avek.

Me ler mon'n ekoute, mon krwar son *Chairman* ti pe koz bokou lo reparasyon finansyel. E sa mon krwar pou kout pei bokou plis ankor. Me selman nou ava espere pou gete ki rapor i dir. So alors Mr Speaker, mwan pou lemoman mon pa pou vreman kapab dir ki pou fer avek sa bann viktim, oubyen sa bann *perpetrator*.

Me selman mon ti ava swete ki i annan en striktir an plas apre sa ki pou kapab petet an kadre sa bann viktim. E osi sa bann *perpetrator* pou zot kapab ganny vreman sa lape.

E piblik an zeneral kapab *move on* dan nou pti pei Sesel. Mersi.

MR SPEAKER

Mersi Onorab. Bon nou ava swiv. Mon apel Onorab Egbert Aglae pou son lentervansyon.

HON EGBERT AGLAE

Mersi Mr Speaker. Bonn apre midi Vis-Prezidan ek *Attorney* Zeneral. Mr Speaker, sa *Bill* ki la devan nou, in son lamannman in swiv en kreasyon, en Komite mon pou dir, en pti lenstitisyon dan li

menm ki mon kapab met li ki sizyenm Lasanble.

Atraver en Mosyon, ki ti ganny kree, e la nou ti vwar son nesans. E mon rapel byen bann largiman ki ti ganny met devan pou avanse, pou siporte, ki en Komisyon parey i ganny kree pou pei.

E enn bann pwen kardinal, ki ti met devan pou avanse pour ki Seselwa i konpran ki bi, sete pou geri pep Seselwa, anmenn linite e bouz devan koman en pep dan son bann devlopman.

E ladministrasyon ki ti la oparavan sete, ladministrasyon US. Nou lo sa kote latab e bann ki ti la, nou ti pe mazin avek en lespri ki sa kreasyon ti pou anmennen, ti ava anmenn nou lo en lot *milestone* avek en lot nouvo zenerasyon Seselwa.

Ki li menm bokou ki pa okouran, ki'n pase, ouswa pa ti ankor ne, parey mwan menm pou vwar keksoz dan en diferan perspektiv.

E Mr Speaker, bokou pei o monn in pas atraver bann diferan levennman dan lepase ki'n mark zot. E bokou pei, in reste angaze pour sirmont sa *scar* ki zot in fer fas avek. Me osi zot in, rod tou fason nesaser pou pa les sa *scar* ouswa sa boubou, anpes devlopman

lepanouisman pei e lafyerte, lazwa de viv, son pep.

Mr Speaker mon komans koumsa, akoz sa konzonktir ki nou'n ariv ladan, avek *TRNUC*, i annan diferan lopinyon, ki'n ganny partaze letan i ti pe fer son bann *sitting*, letan i ti pe vwar bann viktim. E mwan mon ti dabor remersi tou bann ki'n partisipe, ki'n vin koz laverite devan sa Komisyon.

Bann ki'n annan kouraz, mon felisit zot pou zot travay ki zot in fer. Me osi mon konstate poudir, in annan ki dan en fason ou lot, pa'n vin dir laverite devan sa Komisyon.

E i annan ki'n vin fer parey en *show* devan sa Komisyon. E pour mwan keksoz in komans sanz en pe ladan akoz, Komisyon li menm li ti annan pouvwar pou kapab tir bann laliny. Kot ler zot vwar keksoz pe al enn pti pe tro an deor, manda Komite, Komisyon, *raise the red flag* e dir.

Be ki nou'n vwar, keksoz in ganny les ale, in vin parey enn pti lesefer. E vwala kot, pou mwan serten kredibilite Komisyon ti ganny kestyonnen, prezan in kree dout.

E osi pandan bann lenstans kot nou ti pe pas dan bann peryod, kot ti pou annan kanpanya tou, e nou'n vwar poudir. Bann lenformasyon ki

Komisyon, ti pe gannyen ti pe ganny servi, kont bann oponan politik li menm.

E menm mon pa pe koz lalang mwan, e menm bann aktivis dan kanpany lo teren, in servi sa pour diferan lakour. Wi *mes cher amis*, *mes koleg* in arive sa.

E mwan pa pou montre ledwa lo personn mwan, sakenn in anvi fer son kalite politik, pou li fer son lavansman pou li ganny son *mileage* neserer. E sa ki mwan mon anvi nou sitye nou la, Mr Speaker se kot nou'n arive? Ki pouvwar sa Komisyon ozordi i annan.

E ler mon fer mon lanaliz pour mwan, son travay ki'n akonplir ziskan *maintenant* se ekoute. Ekout laverite. Me parey son non i dir, Laverite Rekonsilyasyon Nasyonal, i annan sa bout rekonsilyasyon prezan, ki nou bezwen koz lo la.

I annan sa bout linite Nasyonal, prezan ki nou bezwen koz lo la. E pour mwan sa Komite li menm li i napa en pouvwar pou fer, sa debout zwenn li menm li.

Sa Rekonsilyasyon, sa Linite Nasyonal, mon pa krwar i pou manda sa komite. Sa i pou bezwen en manda Nasyonal kot i komans depi son

Legzekitiv. Bann lenstitisyon demokratik, ki'n ganny etabli.

Menm depi son larelizyon, lo en baz spirityalite, i bezwen kapab pe pran *the ownership of* sa responsabilite e anmenn pep Seselwa ver lobzektif inisyal orizinal, ki sa komite ti ganny met devan pou kree.

Sa komite, pa ti ganny kree pou kree okenn entimidasyon, baze lo son *finding*. E sa komite ti fer kler, okenn levidans ki pou ganny prezante devan li, pa kapab ganny pran servi par okenn endividi pou fer okenn prosekisyon, ou si ou anvi ou santi ou anvi fer okenn prosekisyon, ou al fer ou prop *investigation*, e la ou a met ou *case* devan. Ti kler la, ti kler. Ti konpran sa.

So Mr Speaker gerizon, i en mo ki ganny servi dan Labib. Wi dan Labib i annan sa mo gerizon. E se sa ki Zezi ti fer, ler ti fer mirak se gerizon. Nou pei i bezwen annan gerizon, e gerizon malgre sa Komisyon pe demann ekstansyon i pou fini la, i pa pou kapab donn gerizon. I pa pou arive donn gerizon.

I pa pou arive donn Linite Nasyonal. Menm si nou, nou kapab dir annou pa donn li i fini lanmenm, kekyon ki nou kapab dir se *what next*, ki annan dan sa letap. Eski nou

vin zis ekout laverite. E nou pa bouz lo sa de pwen kardinal ankor ki enportan pou pep. I enportan pou sa prosen zenerasyon, ki la.

So sa i bann *thinking* ki nou bezwen asize koman bann *leaders* annou reflexir byen, lo ki pa ki nou fer ankor. In annan bann fo pa ki'n arive, annou get byen nou *next step* ki nou pou fer. E ki pou vini apre.

E pour konklir Mr Speaker, mon konpran bann viktim, mon konpran zot pe rod *redress*, mon konpran poudir i kapab annan bann sonm monneter ki kapab vin avek baze ler zot pe demann konpansasyon.

I kapab vin an konpasyon finansyel, ouswa konpansasyon bann ki'n dir parey bann propriyete. Mon konpran. Me en keksoz ki mon krwar, Leta, Legzekitiv bann *leadership*, bann lenstitisyon i bezwen asiz ansanm pou ganny en konversasyon lo sa *next step* dan sa prosesis, gerizon.

Tan ki nou pa pe fer sa, nou pa pe akonplir nanryen, ki sa rapor pou ganny soumet devan lavenir. Si nou serye, si nou krwar ladan, pour nou kapab *move on* koman en pep. Listwar i pou reste listwar i pa pou sanze.

Me nou kapab sanz lavenir ki nou zanfan pe viv ladan. Sa en pouvwar ki annan dan nou lanmen. Sanz lavenir. Nou pa pou kapab sanze listwar. E pep Seselwa i bezwen ganny sa kler dan son latet. Pa ganny antrennen dan bann kalite politik, ki parfwa i pa fer nou vwar pli lwen ki nou bout nennen.

E pour mwan Mr Speaker, mon ti a swete ki sa direksyon nesese in ganny pran koman en pep, malgre nou diferans politik, malgre nou diferans larelizyon. Malgre nou bann diferans *background*, malgre ki nou, nou annan en manm fanmir ouswa desandans, ki'n pas atraver sa bann prosesis ladan. Konpran pou dir Sesel i bezwen geri, i bezwen bouze.

E avek sa Mr Speaker, mon krwar ki i enportan pou nou fer sa refleksyon. Mersi.

MR SPEAKER

Mersi Onorab. mon krwar nou a pran en poz la, e nou rebran deba 4er 20. Mersi.

(BREAK)

MR SPEAKER

Laparol, i aprezan pou Onorab Audrey Vidot.

HON AUDREY VIDOT

Mersi Mr Speaker. Bonn apre midi, Vis-Prezidan avek *Attorney General*, tou Manm Onorab tou manm piblik ki a lekout e en bonzour spesyal zabitan Roche Caiman.

Mr Speaker mon'n atann serten enterven an avan mwan pli boners, lot kote latab kot zot in koz, lo anmenn en lafen lo soufrans lepase. E sikatris, lepase.

Wi nou osi, lo sa kote latab nou le vwar, en lafen lo okenn sikatris ou okenn soufrans, ki bann endividi ki'n vin devan *TRNUC* ki'n eksplik zot bann sityasyon ki zot in pas atraver. Nou osi, nou le vwar en lafen avek zot bann soufrans.

Me *LDS*, ler zot koze ozordi zot donn en lenpresyon ki, ozordi napa sa bann soufrans. Ozordi napa Seselwa, ki pe viv avek serten sa bann sikatris, ou soufrans ki parey bann endividi ki'n santi dan sa 43an. Zot in pas atraver. Zot pe penn en portre ki ozordi ou a krwar napa sa bann keksoz, pa pe arive sa bann keksoz.

Ozordi sa ki pe ganny deporte san pas devan lazistis. Ozordi sa ki pe ganny arete mal apropro ki bezwen taye pou rod sipor legal, dimoun ki ankor pe ganny oprese, pou annan sa laliberte, pou li kapab koze

libreman. Sirkile libreman dan sa pei.

I annan dimoun ki'n apros mwan ki i sorti depi lepok Parti Seselwa, in dir ek mwan Onorab, viktimizasyon ki mon'n tann mon bann Dirizan ki ozordi dan *LDS*, in koz lo la dan lepok ou Gouvernman, ozordi i tris pou mwan dir ki sa menm Gouvernman, ki mwan mon'n met la, ozordi i klerman annan viktimizasyon.

Mr Speaker, i annan endividi ki dir ou, sa sikatris ki zot pe koz lo la 43an, kan sa lepok. I annan zot pa ti dan sa bann letan zot. E ozordi, zot, zot oule ki okenn sa bann lensidan, ki sa bann endividi in vin devan, devan *TRNUC* pa pas avek okenn zot.

E menm bann ki ozordi, ki'n eksprim bann problem ki zot in pas ladan, ki nou'n tande lo medya, zot pa anvi vwar sa bann keksoz i kontinyen arive. Wi in annan en langazman, kot ansanm nou'n agree, nou'n met serten bann pwen devan. E pou siporte ki Seselwa, nou trouv laverite.

E nou annan rekonsilyasyon, pou nou vwar linite dan nou pei, *ok?* Akoz ankor i annan group Seselwa la ozordi, ki dir ou zot, anvi bouz devan ver lefitir pou zot fanmir. E zot anvi vwar ki okenn depans

ki Gouvernman i fer ozordi, i bezwen ganny partaze byen e ki i annan rannman ki zot tou zot vwar zot pe benefisye ladan.

Pa bokou letan pase devan Lasanble, Gouvernman in demann larzan an pli, pour *TRNUC*. In ganyen li, in ganny larzan. La ozordi Gouvernman i vin avek Lalwa devan nou, pou demann nou pou prolonz letan, pou permet *TRNUC* kontinyen travay ziska Desanm.

Me kestyon ki nou bezwen demande ki lasirans apre Desanm, ki Gouvernman pa pou retourn ankor dan Lasanble, pou vin demann nou ankor keksoz pou *TRNUC*? Ki garanti zot pe donn nou?

Dan bann letan kot in annan bann restriksyon, nou konnen zot pa'n kapab fer bann *hearing*. Me nou mazine i bezwen annan bann travay ki'n bezwen kontinyen fer. Eski sa bann rapor, in deza komans ganny travay lo la? Oubyen nou bezwen, esper prosen detrwa mwan ziska Desanm?

Rod larzan pou donner ankor pou peye pour k i rapor i kapab ganny finalman ganny donner ek Gouvernman. Si pa bokou letan pase zot in rod plis larzan, i kler definitivman, si zot bezwen prolonz letan, ou bezwen pey sa bann dimoun

pou travay lo sa bann rapor ziska Desanm.

E sa definitivman i pou reponn kestyon ki mon koleg Onorab William in demande. Zot pou bezwen ankor larzan.

Mr Speaker mwan mon pa koz pou mon bann koleg lo sa kote latav, me mon koz pour mwan. Mon'n aport mon sipor kot i annan merit pou *TRNUC*, fer son travay. E nou'n donn li letan pou li fer son travay. Si *LDS* dan son mazorite i krwar poudir, nou bezwen ankor larzan pou donn *TRNUC*, pour li konplet son rapor, nou a kit sa zot ava fer li. Mersi Mr Speaker.

MR SPEAKER

Mersi Onorab Vidot. Prosen entervenans Onorab Naddy Zialor. Ou annan laparol.

HON NADDY ZIALOR

Mersi Mr Speaker. Bonn apre midi Vis-Prezidan, bonn apre midi AG. Bonn apre midi Lepep Seselwa. Apre midi mon pran laparol avek tout limite, koman en zenn isi dan sa Lasanble. E ki'n ekout tre atantivman, depi ler ki deba in komanse. Me pli enportan ki'n tre atantiv vizavi, travay *TRNUC*.

Mr Speaker mon pa lesyel. En keksoz ki mon ti a kontan dir apre midi, se ki pou ou

kapab koriz kot i mal, ou bezwen admet ki ou'n fer mal. Pou ou kapab pardonnen ou bezwen pare pour pardonnen. Pou ou kapab ganny gerizon, ou bezwen ganny en platform ki kapab permet ou vid sa ki annan lo ou leker.

E Mr Speaker, atraver travay *TRNUC*, in permet mwan realize ki wi, in annan bokou boubou ki'n ganny konnyen. I annan bokou leker ki'n ganny kase, e i annan bokou nou pep ki'n pas atraver bann leksperyans inoubliyab.

E apre midi, mon remerisi zot pour zot kouraz pour vin devan e permet bann parey mwan, ganny sa loportinite pou konn sa lot kote *coin* zistwar Sesel.

Alors pou tou Seselwa ki'n vin devan *TRNUC*, pou partaz zot leksperyans lavi, pandan sa letan ki mwan mon pa ti ankor ne, me ki'n pas dan listwar Sesel, mon dir zot mersi pou zot kouraz.

Sa ki enportan apre midi, se ki nou koman en Nasyon nou bezwen realize, ki si vreman nou rekonnet progre sa pep, nou osi bezwen rekonnet ki en moman dan nou listwar, i annan serten keksoz ki nou fer, ki pa neserman reini, oubyen reisir ini sa pep.

E parfwa, swa dan linyorans, swa avek en konsyans, ouswa enkonsyanman, nou'n form parti en fason ou en lot, dan sa leksperyans ki Lepep Seselwa in pas atraver.

E mwan apre midi, avek tou liminite, mon rekonnet ki a en moman dan mon lavi, mwan osi mon ti form parti pou glorifye ouswa idantifye mon lekor avek serten lasosyasyon, ki san konnen, ouswa konsyan ou enkonsyanman en fason mon'n osi ede pou anmenn serten, pou konny serten boubou, ouswa anmenn serten lanmertim vizavi mon frer e mon ser Seselwa.

E avek limite mon osi mon ti a kontan dir zot eskize, pardon Mr Speaker.

(APPLAUSE)

HON NADDY ZIALOR

Napa keksoz ki fer pep pli fyer, letan ou apros ou frer ki ou rekonnet ki i enn ou disan, ki ou Nasyon e ki form parti pou pep. Napa keksoz ki fer pli *humble*, pou ou rekonnet ki wi, nou'n fer byen. Me wi nou'n osi fer mal Mr Speaker. E kot i mal, nou bezwen korize. Kot i mal nou bezwen aranze.

Alors pou mwan letan an 2016, mon ti tann koz lo

TRNUC, mon pa ti vremen konpran ouswa konnen kisisa sa? Ki vedir *TRNUC*? Me gradyelman o firamezir ki mon vwar bann dimoun parey Brian Victor - si ou permet mwan atraver ou Mr Speaker, ouswa lafanmir Hermitte, vin partaz zot leksperyans.

E la mon realize, ki wi nou bezwen annan en Rekonsilyasyon, dan nou pei. Nou bezwen, *humble* nou lekor, e rekonnèt ki nou pardonnen. Nou bezwen korize, e nou bezwen travay ansanm pou anmenn gerizon Mr Speaker.

E la mon anvi fer resorti, ki se pa *TRNUC* ki pou anmenn gerizon, se pa *TRNUC* ki pou anmenn pardon. Se pa Komisyon ki pou anmenn pardon, se pa striktir ki pou anmenn pardon, se pa Komisyon ki pou anmenn rekonsilyasyon, se ou avek mwan Lepep Seselwa.

Alors koman en zenn, koman en zenn sitwayen, koman en zenn Dirizan, koman en zenn 34an. Wi mon anvi vwar en pep geri, en pep kot ki swa ou ble, ki swa ou rouz, nou pare pou asiz ansanm, annan en tas dite, annan en lanmitye, san ki nou kree laenn, san ki nou kree divizyon. Me pare pou pardonnen e bouz devan.

Si sakenn nou isi dan sa Lasanble, nou rekonnèt se sel fason pour nou bouz devan se pour nou travay ansanm vizavi linite, e rekonnèt pli enportan rekonnèt ki i nesaser, e ti nesaser.

Mon asire ki ankor dan lan nou pou vwar, en Nasyon ki'n transformen. Sa Nasyon ki nou anvi koz souvan lo la, lo lendependans, lo *empowerment* i pou vwar li form parti dan devlopman Sesel.

E wi Mr Speaker, parfwa laverite i eklersi ou semen. E mwan mon remerisi tou bann ki'n eklersi semen Lepep Seselwa. Mersi Mr Speaker.

(APPLAUSE)

MR SPEAKER

Mersi Onorab. Prosen entervenans, Onorab Sathya Naidu.

HON SATHYA NAIDU

Mersi Mr Speaker. Bonn apre midi *VP* ek *AG* ek tou koleg Onorab. Lamannman ki devan nou, pe senpleman tous lo en laspe kot sa Komisyon, pou kapab ganny ekstansyon pou fini sa travay ki zot in komanse.

E byensir i en travay, ki sa Komisyon ki'n fer in tous lo en laspe ki vremen sansib. E mon vremen apresye ki lo lot

kote, in annan en Onorab ki'n kapab rekonnèt ki i sansib. Me selman li menm li, in referans ek sa Komisyon in dir *telenovela*.

I enteresan mannyer perspektiv par ler i sanz sitan vit. E sa i byen, akòz i pou ede ver sa demars pou inifye nou pep. Ler nou pe koz avek, lo size ekstansyon, savedir pou annan 200 ka ki pou ganny enkli dan sa rapor final, seksyon 11(3) sa Lalwa.

I fer resorti ki se sa ki anvizaz-e fer. Avek bi pou *attend* lazistis e Linite Nasyonal. Byensir baze lo rekomandasyon e bann aksyon ki pou swiv, ki pou kapab determinen si travay sa Komisyon, in nobou kapab vreman *attend* bann rezilta ouswa lobzektiv, ki inisyalman ti kapab permet li, pou ganny kree avek sa bi.

Alors pou kapab determin, si sa Komisyon in akonplir son lobzektif wi, ou non, dan sa lenstans i en pe prematir osi. Alors mon pa vwar okenn rezon lo sa bann lopinyon ki'n ganny fer pase, vizavi si wi ou non *commission* i kapab *attend* son lobzektiv.

Lo size Laverite pour mwan personnelman, koman en zenn mon'n tann en kantite, lo sa ki ti'n arive. Mon'n lir lo

journal be it, Regar ouswa *Weekly* bann *pamphlet* politik. Ouswa menm atraver bann endividi. bann fanmir, bann manm fanmir ki'n partaz zot leksperyans, swa an ekrir lo form papye, swa elektronikman. E mon'n kapab ganny en konprenezon lo sa ki ti'n arive.

Me toultan mon'n poz en kestyon pou dir. Eski sa rezim ki ti la avan, in vreman kapab al sa zistans, senpleman pou reste o pouvwar baze lo laswaf pouvwar ki en Dirizan ti annan? E o firamezir ki sa Komisyon ti pe travay, ou'n vwar sa bann fanmir pe vin devan, pe soumet tou sa ki zot in pas ladan, sa soufrans, in montre ou ki zistans en Dirizan ti'n ale pour li reste o pouvwar.

I kapab annan serten ki kapab zistifye sa ki ti'n arive, poudir i annan serten keksoz byen ki'n arive atraver sa rezim ki ti la. Selman mwan m on pa vwar li dan sa fason. Serten in ki sa Komisyon, in annan en laspe politik avek.

Wi an 2016, ti annan en Lasanble 15 lo 10. Ti annan en senp mazorite ki'n kapab etabli, en konsansis bipartisan pou kapab etabli sa Komisyon. Mwan menm rapel ansyen Prezidan Faure in vin devan kot in dir, ler koudeta ti'n arive, ti

annan sepa 14an, i napa nanryen pou fer avek sa.

Ladan menm nou ti'n vwar le 5 Zen ti'n ganny aboli. Zot ti'n pran zonm lib, zot in bouze. Tousala se bann prosedir ki'n arive atraver, kreasyon sa Komisyon. E osi progre! Progre se ler sa pep, espesyalman mon zenerasyon in kapab ekout bann *hearing* lo SBC, pou vwar sa ki'n arive, e pou zis konnen ki zot in sey kasyet.

Me laverite la, ou pa pou kapab kasyet lavi diran. Malgre ki annan serten ki'n komet sa bann atosite, mon aplodi zot pour lefe ki zot in vin devan pou admet sa ki zot in fer. E sa i montre ki tou sa bann lannen, ki en parti politik ti pe sey kasyet laverite, i montre ki kalite azanda zot ti annan.

Alors si lo sa menm nosyon, i pou annan en Dirizan ki pou vin devan, pou vin dir militer ler i vin lo semenn sepa ki zafer la, annou demann serten kestyon. Ler mon ti'n pas sa lamannman konstitisyonnèl, pou kapab permet sa ki ti'n deza ti pe arive vizavi bann lezot Lezislasyon, nou ti pe senpleman fer sir ki sa lamannman i vin an konformite avek Konstitisyon.

I vreman rar ki nou fer bann lamannman koumsa. Me selman nou ti pe koriz en

keksoz. Akoz deza baze lo bann korperasyon ki ti pe arive avan. Wi militer ti travay avek Lapolis. E ti annan en Onorab la, pli boner i ti'n dir lafason ki larme i lo teren.

Be mwan ler mon vwar mon zenerasyon, lafason ki'n tonm dan drog. Ler mon vwar bann zelev ki mwan mon'n lekol avek, sityasyon ki zot ladan, ler mon vwar en Gouvernman ki ti la avan ki ti napa sa kouraz, pou pran bann desizyon kont bann endividi ki pe *deal* dan drog!

Ozordi ler nou pe fer li, mon dir *yes* nou pou bezwen fer li! Nou bezwen asire ki i annan en lalit asarnen, san pitye kot bann endividi ki pe *deal* ladan. Alors ler en keksoz i sorti dan labous en politisyen lo lot kote latab, mon bezwen poz serten kestyon pou demande get nivo senserite i annan ladan!

Akoz pou tou sa lannen zot in sey kasyet. Me selman lavolonte politik sa pep osi ki'n elekte nou, pou met nou la an 2016, in permet nou komans sa proses. Mon swe se ki ler nou pe regard sa laspe rekonsilyasyon - ti annan en Onorab - mon krwar Onorab Aglae ki ti'n dir ki Komisyon pa'n vreman *attend* sa lobzektif. Mon tant pou dakor avek li, e

menm *Chairperson*, in rekonnèt sa.

Me i pou pas koman en rekomandasyon, i pou pas koman en *finding* dan son rapor pou dir, kwa ki zot in kapab *attend*, kwa ki zot pa'n kapab *attend*, mon panse. E se la kot nou kapab fer en *roadmap*, pour nou kapab bouz de lavan.

E sa lasosyasyon pou bann viktim ki ti'n ganny kree, mon'n pas lo Lalwa. Mon pa okenn baz lo ki mannyer sa lasosyasyon in ganny fer - in ganny kree. Kekfwa zot ti en pe enpasyon, e zot in vin devan pour met tou zot konsern.

Me mwan personelman mon poz serten kestyon, lo sa bann *claims* ki zot pe fer. Napa nanryen mal pou zot vin soumet, bann sonm me selman anba ki paramet? Eski i vremen zistifye e sityasyon pei osi ki nou ladan, ozordi kote eski Gouvernman li menm pou ale? Ouswa bann mekanizm?

Byensir sa i pou konsiderasyon ki pou bezwen donnen pli tar, ler sa rapor in ganny prodwi, ki pou bezwen kapab etabli pou nou kapab vremen rod sa fon, pou kapab soulaz bann ki'n vremen soufer.

Me Komisyon lo son kote mon'n santi, ki'n pa'n byen *handle* sa sityasyon ki'n vini atraver sa lasosyasyon pou

bann viktim si i napa okenn ankadre legal, ki zot, zot in swiv pou kapab permet sa arive.

E ladan menm sa lasosyasyon i devret realize ki i annan en rapor final ki pe vini. Alors atann avan ki nou ki met tou keksoz de lavan. Kekfwa dan en serten sans tou keksoz, i ariv pou en rezon. Zot in met zot bann konsern devan, i bann keksoz ki Komisyon li menm li i kapab konsidere, ler zot pe soumet zot rekomandasyon.

Lo size sa 3 mwan ozordi zour i vremen enteresan pou vwar Lopoziyon, i vremen konsernen lo lafason ki larzan piblik, pe ganny depanse! Selman dan lepase tou bann keksoz ki zot ti fer, ti'n met en lizye fermen lo la. Zot ferm zot lizye lo la.

Selman ozordi zot dan Lopoziyon, zot a pe desarz zot responsabilite. Fantastik! Mon ti a voudre ki *VP* i dir konbyen eski i pou koute, e mwan mon krwar ki tou sa ban endividi ki konsernen vizavi sa Komisyon, zot pou rekonnèt ki sa depans ki pe ganny fer, i fer sans.

Akoz, e i en travay ki ase entans ki pe ganny fer pou prodwi en rapor ki pou donn detay lo laverite ki'n arive. Ki pou met propozisyon ater, pou nou kapab bouz de lavan koman en pep. E Sesel pou tou

son zanfan, pou mwan personnelman i pa'n ariv par en koensidans. Mwan mon krwar *it's destiny*.

Ozordi nou annan en Gouvernman, ki nou vwar tou bann atosite ki nou'n tann tou, nou'n vwar. E nou pa pou repet menm fot. Mon'n zis donn zistifikasyon lafason, ki i annan en laspe kolaborativ ant Larme avek Lapolis, pou kapab adres sa problemn drog ozordi.

E la gran mazorite pep Seselwa, i le vwar ki sa lalit, nou pou kapab bouz ver en nivo kot i annan progre. Ozordi zour anba sa ladministrasyon napa viktimizasyon, dan landrwa travay. Parey oparavan baze lo krwayans politik en endividi.

Ou pa ganny *blacklist*. En biznesmenn pa ganny sere senpleman akoz in pa'n vot pou sa parti politik. Ozordi zour zot ganny letan - atraver SBC pou fer zot program parti politik.

Selman 2006 nou tou nou konnen kwa ki ti'n arive. Ozordi zour nou a pe viv a en moman kot nou annan en Gouvernman ki pe respekte drwa sa pep.

E i annan serten ki pou met fer tou sord kalite alegasyon poudir ki i annan vyolasyon drwa imen! Me si ou pe fer keksoz mal, i pou annan serten keksoz an term konsekans ki pou atase avek

me, *within the ambit of the rule of law, and not otherwise*.

E mwan personnelman mon krwar ki avek en Gouvernman, ki pe travay dan lentere tou Seselwa, kot nou vwar tou bann *civils servants*, ki'n menm la dan lepase ki ankor la ki pe travay zot osi zot rekonnnet sa.

Akoz ti annan en bon pe, ki ti krwar zot pou ganny pouse. I annan *civil servants*, ki'n vin menm dir mwan, ki zot apresye lo lafason ki keksoz pe deroule. E zot in menm soumet zot krentif poudir wi a en serten pwen mon ti krwar mon a perdi mon louvraz.

E dapre konpran ti annan en siporter Parti Seselwa, me selman mon ti a voudre ki sa Onorab i kapab *substantiate* lekel sa endividi. Dan plas zis dir en siporter. Akoz mon krwar pa si en siporter Parti Seselwa, en vre siporter Parti Seselwa, ki'n konn tou bann atosite ki sa Gouvernman in fer, i pou vin dir bann keksoz koumsa Mr Speaker. Mwan mon pou siport sa lamannman. Mersi.

MR SPEAKER

Mersi Onorab. Mon ava apel prezan Onorab Wavel Woodcock.

HON WAVEL WOODCOCK

Mersi Mr Speaker. Mr Speaker mon pou premyerman komans mon entervansyon, par prezant mon senser kondoleans avek Lepep Langleter pou lanmor Larenn Elizabeth II.

E avek tou mon bann fanmir, zanmi e bann konesans, sirtou bann Seselwa ki ozordi, zot annan nasyonalite Angle. Fodre pa zanmen bliye Mr Speaker, pandan en peryod nou listwar, ler nou bann frer ti pe ganny bate, trennen, met dan prizon san ziz-e e disparet, en bon pe nou bann fer ek ser, ti bezwen sov pei. I annan en bann ki ti ganny fors an egzil, e sete Langleter ki ti anmas nou bann frer ek nou bann ser pou donn zot *asylum*.

E pour sa mon dir en gran mersi lepep Angle pou akeyir e resevwar nou bann frer ek ser Lepep Seselwa. Mr Speaker, sa *Bill* ki devan nou ozordi i en *Bill* ki vreman senp. Annefe i pe zis fer provizyon pou *extend* manda *TRNUC*, pou ziska Desanm, pou donn zot ase letan, pour zot fini zot rapor ki zot pou prezant osi avek Prezidan, e osi avek Lasanble osi pou ganny en kopi sa rapor.

Me Mr Speaker en kestyon nou bezwen demande, aköz ki i pe pran sa kantite letan pou *TRNUC* fini son rapor? Mr Speaker le rezon i vreman senp,

aköz i annan tro bokou ka. I annan tro bokou atosite, viktimizasyon ki sa Gouvernman avan *SPPF/SPUP*, Parti Lepep in fer.

Si ti napa sa bann ka, sa ti napa sa bann atosite, si ti napa sa bann labi, si ti napa sa bann mert, pa ti pou bezwen annan kreasyon *TRNUC* ozordi. Nou tou nou ti pe viv an pe ek kanmarad. Pa ti pou neselit kreasyon en tel Komisyon.

Me lefe ki sa Komisyon in ganny kree, e ki son term son manda 3 an pe ganny *extend* pou detrwa mwan pou konplet sa rapor, i laprev e levidans ki en kantite keksoz en kantite atosite, en kantite ka ki'n arive dan nou pei Mr Speaker, kot plizyer nou bann fer ek ser seselwa in soufer.

Mr Speaker, mwan frer Onorab Zialor, ler in koze in dir en keksoz vreman enportan. Sa *Commission*, enn bann rezon prensipal, ki ti ganny kree se wi pou anmenn rekonsilyasyon. Me pou rekonsilyasyon arive i enportan, ki laverite i sorti. San ki laverite i sorti pou napa rekonsilyasyon.

Me mon konnen Mr Speaker, e i annan en *saying* ki ki dir, se ki laverite i ofans son met. I annan ki pa kontan tann sa bann laverite. Sanmenm ki zot pe konplent poudir, *ah!* I

pou kout en kantite larzan, pou *extend* manda.

Me selman, parey mon'n dir sa bann resours, sa bann larzan pa ti pou ganny depanse si pa ti zot, se zot loter, se zot lakoz, akoz ki ozordi nou annan en tel Komisyon.

Mr Speaker atraver *TRNUC* ozordi nou'n konn en kantite keksoz;- en kantite keksoz ki nou ti'n zis tande, en kantite soufrans ki en bon pe dimoun in pas atraver.

E bann keksoz ki plizyer paran, zanfan, madanm, manman, zot pa ti konnen, ki'n arive avek zot zanfan. Zot pa ti okouran, plizyer bann atosite ki'n arive avek zot pros. Me ozordi laverite in sorti. Plizyer bann keksoz ki'n arive dan en peryod fernwar, dan nou listwar bann ka mert, labi, vol, koripsyon, met dan prizon, akizisyon later, forseman Mr Speaker, fors an egzil.

Mr Speaker petet keksoz ki'n sok sa pep plis, ki'n fatig latet nou frer ek ser, Lepep Seselwa se, sa laverite ki menm bann *perpetuators* zot in vin devan, e zot admet ki zot in form parti plizyer bann atosite. Apre ki zot ti'n ganny lord, avek bann Prezidan lepase.

Annou pa bliye dan bann ka vreman spesifik, dan ka Claude Monnaie dan ka

Damendra, dan ka Sonny Elizabeth, ek Micheal Hoffman. Sa bann *states sponsored killers*, sa bann *states sponsored hitman*, zot admet ki zot ti ganny lord avek Prezidan Rene! I annan ki dir in ganny lord avek Prezidan Michel, pou zot fer sa bann keksoz.

I annan ki ti an kolizyon avek bann *MNA*, ki sorti dan zot Parti *SPUP/SPPF* dan lepase! Laverite in sorti, sa bann dimoun ki ti ganny anvoye ki'n dir poudir wi. Ladan menm en Manm li i a vin devan i a dir lontan letan lesklavaz, se pa bann dimoun ti ganny anmare avek pye dibwa.

Be Mr Speaker, dan zot letan, anba sistenm diktatir *SPUP*, nou bann frer ek ser i annan ki zot latet ti ganny anmare, ti ganny anmare dan sak Mr Speaker. Ti ganny anmare, i annan ti ganny vir latet anba Mr Speaker!

Apre ki ti arive ek zot Mr Speaker, ti ganny anmenn dan en bato, zot lipye anmare avek en blok masin, ganny zet dan kannal! Ganny anmare menm sa Mr Speaker, konmsi akoz dan lesklavaz ti annan atosite i zistifye atosite ki'n arive anba zot Gouvernman, anba diktatir?

Napa nanryen ki zistifye. eEi pa pou zistifye okenn Gouvernman, okenn parti ki

lefitir pou fer atosite akoz Parti Lepep, *US* in fer atosite *or SPPF*. Napa okenn mal ki byen Mr Speaker.

E Mr Speaker, mon vremen mon bezwen dir poudir anefe mon *apologize* avek mon bann frer aletranze, Langleter partou dan lemonn enkli Sesel ki'n pas dan sa atosite. Akoz ler mon pe ekout lot kote latab, i paret zot pe zistifye sa bann keksoz ki'n arive Mr Speaker. Anmar dimoun dan *binliner* eski i zistifye Mr Speaker.?

Bat dimoun, tortir dimoun, bril dimoun parey Claude Monnaie dan son *pick-up*. Parey sa bann *perpetuators* in admet zot in fer, eski ti zistifye?

Mon apresye ki Onorab Naddy Zialor in vini, en dimoun ki'n sorti lot kote latab ki ozordi lo nou kote latab, ki annan sa kouraz pour li demann pardon pou sa bann keksoz ki son Gouvernman in fer. Olye ki i apel *TRNUC* en *telenovela* Mr Speaker!

Parey Onorab Uranie ti dir, ler ti, nou ti amann *TRNUC* pou ogmant lakantite *Commissioner* ti annan, pou sorti 5 pou vin 7. Parey zot ti dir dan zot *rally* Mr Speaker. Parey en bann - i annan en Manm in dir koumsa zafer i annan en zwe zanfan sepa in koz lo la.

Bate lanmen zanfan donn en gato, i apel *TRNUC* sa Mr Speaker.

Mr Speaker i fer onte. Mon sagren, mon bezwen demann pardon Mr Speaker pou sa bann keksoz, sa bann parol koumsa pou sorti dan nou Lasanble, par bann Manm *MNA*, Elekte Mr Speaker!

Mr Speaker, nou bezwen pran nou responsabilite. Kot nou mal i enportan pou nou dir i mal. E bi sa *Commission* Mr Speaker, se pou anmenn rekonsilyasyon. Se pour ki laverite i sorti, pour ki nou pep i kapab bouz pli devan. Mon pa ganny en konpran ki mannyer en Manm i dir mon agase Mr Speaker, ki la en lot amannman pe vin devan Lalwa pou ogmant term - manda *TRNUC* pou ziska lafen lannen.

Ou agase, akoz ladan pe depanse, pou en rapor ganny prodwi, pou Lepep Seselwa finalman ganny en *closure*? I agas ou? Eski i ti agas zot letan zot ti vol \$50milyon, Mr Speaker? Eski ti agas zot letan nou ti fer logo pou £1milyon Mr Speaker. La zot pe lager R200mil?

Mr Speaker avan dan senkyenm Lasanble - dan senkyenm Lasanble ti annan zis *yes men* lo lot kote latab. Enkli Onorab *Leader*

Lopozisyon zanmen ti kestyonn son Gouvernman.

MR SPEAKER

Onorab, Onorab silvouple. Silvouple. Pa met lakizasyon lo bann Manm, ki dan Lasanble ozordi. Ou pe koz lo listwar, ou pe koz lo listwar, i annan en kantite pwen pou kouver dan listwar, nou ava evite fer lakizasyon lo Manm ki la.

HON WAVEL WOODCOCK

Ok Mr Speaker.

MR SPEAKER

Onorab Pillay mersi bokou, pou ou lentervansyon.

HON WAVEL WOODCOCK

Atraver *TRNUC*, ozordi Mr Speaker en kantite dimoun in ganny *closure*. Mr Speaker, mon pa konnen ki obsesyon, ki en Manm i annan avek lesklavaz. Sak fwa nou koz koudeta, li i koz lo lesklavaz.

Wi nou konnen poudir ti annan en bann parey in dir, li menm ti ganny anmare, avek pye dibwa. Me nou konnen osi poudir apre koudeta ti annan en bann ki ti ganny anmare lo bal zonnyon tou Mr Speaker!

En bann keksoz in arive dan zot letan, ki zot pa pe koz lo la. Mwan mon ti a kontan, konnen mon ti a kontan tann

zot Mr Speaker, koz en kou laverite silvouple.

Koz en kou laverite, tou sa bann atosite ki zot Gouvernman in fer. Admet poudir zot Gouvernman in mal fer. I annan en Manm Mr Speaker, atraver ou Onorab Aglae in vini in vin *lecture* nou. In vin *lecture* nou selman ler *TRNUC* ti pe ganny kree, i ti dir poudir tou sa bann atosite ki sa bann Prezidan, dan lepase in fer i bann atosite ki bon ki zis, ki'n anmenn nou pei kot i ete ozordi! Sa bann fot i bann fot ki ti bon!

La ozordi zot pe vin, ti zistifye. La ozordi zot pe vin *lecture* nou akoz nou pe zis ogmant term *TRNUC* pou zis 4 mwan ziska Desanm, pou zot kapab prezant en rapor, akoz sa ta ka ki *TRNUC* pe *deal* avek.

Ti pou napa sa ta ka mon bann frer ek ser, si Albert Rene ansanm ek James Michel avek son bann *goons* pa ti fer sa bann keksoz.!

Mon bann frer ek ser, annou serye nou en pe. Annou les *TRNUC*, fini son travay. I ava prezant en rapor avek Prezidan. I a prezant en rapor avek nou Lasanble, nou ava debat e nou a diskite. E Lepep Seselwa ansanm, nou ava gete ki manner, nou pou met en lafen.

Nou pou ferm sapit dan nou listwar e *move on*.

Me avan ler ki laverite i sorti zanmen nou pou kapab *move on*. Avan ler ki nou admet poudir sa bann keksoz ki'n arive i mal, i pa zistifyab, nou pa pou kapab bouz devan.

Mon bann frer ek ser, an konklizyon Mr Speaker. An konklizyon Mr Speaker, en keksoz ki'n arive dan listwar resaman nou pei, ki in trakas mwan en kantite Mr Speaker, ki'n fer mwan en pe per. Mon bezwen admet mon kontan ki sa laverite in sorti.

I annan ka Mr Speaker aktyelman konsern, zarm ek aminisyon. Kantite zarm, ek aminisyon kot i ti ganny dekouver kot en landrwa kot en dimoun ki'n *sponsor SPUP/SPPF* dan lepase.

Mon ti enn pti pe per Mr Speaker, akoz en kestyon ki bokou Seselwa pe demande ki zot lentansyon, ki zot ti anvi fer, avek sa bann zarm ek sa bann zouti? Eski dan zot lespri *at the back of their mind*, petet zot ti annan lentansyon fer en lot koudeta, Mr Speaker?

Ou konnen tousala i bann kestyon ki pe demande. Me la ozordi, tou sa bann laverite pe sorti. Plizyer ka pe al devan Lakour ki enkli koripsyon, ki enkli posesyon zarm. E menm

bann ka drog, ki petet dan lepase zanmen nou ti pou vwar sa kantite ka, lasezi drog parey nou pe vwar konmela.

Bann dav, drog, kot plizyer bann eskobar parey nou apele. E ankor enn fwa Mr Speaker, i sagrin mwan, i fatig mwan latet ler mon tann en Manm, ki detrwa, enn de lannen pase. Menm dan sizyenm Lasanble kot ti pe defann eskobar, dan Lasanble.

La ozordi i vin koz ankor lo sa menm eskobar, Mr Speaker ki'n ganny deporte dan nou pei! Ki'n montre kot zot priyorite i ete Mr Speaker. Zot napa lentansyon zot pa kontan sa lalit ki nou Gouvernman pe anmennen kont drog.

En lalit asarnen ki pou ganny tou mon sipor Mr Speaker. Akoz anba *watch* sa Gouvernman ozordi ki 6000 nou zenn, i anba fleo drog ki nou pe sey *deal* avek. Sa pwazon ki'n anvair dan nou pei.

Mr Speaker nou Gouvernman pe fer en kantite. Sa travay ki nou bezwen fer, nou pe sey koriz bann fot dan 2an zanmen nou pou fini koriz fot 43an. Me pandan sa 5an sa 3an ki reste nou pou fer nou mye pou ede avans nou pei pli devan.

E dan ankor 5an, 15an, 20an nou pou kontinyen fer sa

travay, pou anmenn nou pei pli devan ki enkli ozordi Mr Speaker. Anmenn sa lamannman pou *extend* term *TRNUC* pou ankor 4mwan. Avek sa de mo mon dir ou mersi Mr Speaker.

MR SPEAKER

Mersi Onorab. Laparol i prezan pou Onorab Flory Larue.

HON FLORY LARUE

Mersi Mr Speaker. Mersi *VP* avek AG. Mr Speaker mwan ti a kontan ki lefe ki mon koleg ki'n koz avan mwan, Onorab Woodcock in tous en pe lo lefe ki annan en Manm ki kontan koz lo lesklavaz.

Nou bezwen koz en pe lo nou listwar koman en pep an 1835 ti annan labolisyon lesklavaz Sesel. E tou bann, bann lesklav Sesel ti ganny libere, sa lepok. Alor i pa ti an 1977 zis avan ki Albert Rene ti liber pep Seselwa *from* lesklavaz. Zis en fe, en fe istorik Mr Speaker.

Mr Speaker nou'n tann dimoun koz lo *TRNUC* kekfwa dan en lot fason letan dimoun in dir, zot letan laverite, zot le tande kwa sa ki'n pase. Zot in akont diferan versyon zot, sa ki zot in tande, ouswa sa ki zot menm zot in pas ladan. E sa bann diferan versyon ti annan

lakoler, ti annan laraz, ti annan bann lanmertim anver kanmarad.

Avek sa formasyon *TRNUC* ki'n reprezant tou sa demann, ki dimoun in fer depi nou Lendependans apre nou'n ganny nou liberasyon, apre liberasyon, nou'n tann tou kalite fot ki'n ganny fer. E sa liberasyon ti en martir pou pep Seselwa.

Sesel in form par enn bann pei ki li menm li zot in kree bann Komisyon Laverite. Nou'n vwar Sidafrik in ganny mansyonnen par Onorab Hoareau. Me solman Mr Speaker fodre nou mazine, ki Sidafrik i annan 60milyon dimoun ozordi koman son popilasyon. Nou'n tann nonm Rwanda, ki li ozordi, i annan 13milyon dimoun.

Me nou letan nou pe konklir avek nou travay, *TRNUC*, nou enn pti pei avek 100mil dimoun. Ozordi, nou annan 100mil dimoun. Me letan sa bann fe ti arive, nou popilasyon ti preske *half* sa grander. E konbyen *case TRNUC* in tande Mr Speaker?

Zot in tann zis anba 400 ka, dan sa dernyen 3an. Pou enn pti popilasyon 43an nou peryod, i en kantite ka Mr Speaker. Me annou pa kit antet

ki se tou ka, sa bann ki nou'n tande lo televizyon.

Sa i bann ki ozordi zot in pran zot kouraz, zot in kapab fer fas avek zot *perpetrator*, zot in mont devan, zot in rakont zot laverite e zot in keksoz zot lekor avek pep Seselwa, atraver nou lekran televizyon.

Wi i annan ki ti plere, i annan ki pa ti le krwar, e parey koleg mon koleg Onorab Naddy Zialor in dir, in ed li vwar sa lot kote *coin*. E ozordi mon le remersi li pou sa zefor ki in fer, pour li dir nou ki i regrete si in zwe en rol dan tou sa bann keksoz. Pa konsyaman, me solman in ganny enfliyanse.

I annan bann Seselwa Mr Speaker, ki zot, zot ti kit Sesel avek egzil volonter, avek tou bann sityasyon ki zot ti pe traverse, zot ti pli fere ale. En kantite zot pa'n vin devan pou akont zot zistwar. Bann ki ti forse al egzile, zot ki ti perdi tou - zot biznes zot lakour, zot fanmir, zot ti bezwen ale. Zot en kantite zot i ankor anmer. E zot in tournen pou akont tou zot zistwar.

Nou bezwen osi mazine Mr Speaker, ki annan bann dimoun ki 43an pase, in eksperyans bokou atosite. Me zot pa vivan ozordi pou akont nou sa laverite. E menm si zot fanmir, i konnen zot napa sa

abilite, pou montre bann fe, pou *prove* ki sa bann keksoz in vremen arive.

Alor Mr Speaker, mon pa krwar ki sa 300ekek ka, ki nou'n tande, i sel ka atosite. Me solman sa i bann dimoun ki'n annan sa kouraz, pou vin devan pou donn nou en *glimpse*, en fason pou vwar en pe kwa ki zot, zot ti pe eksperyanse. E kwa ki ti pe pase dan nou pei.

Mr Speaker nek an 2016 ki nou'n vwar nou koman en pei adres sityasyon, ki'n arive depi 1977. Akoz Mr Speaker? Akoz ki nou'n bezwen esper tou sa letan pou nou kapab fer sa travay? Nou'n tann en Manm dir ki *the healing is not in the telling*.

Mr Speaker *so where is the healing?* Kote nou pou kapab komanse, pou aranz sa bann keksoz ki zot dir bann fot? Bann keksoz ki zot dir ti vo lapenn pou fer. Kote nou komanse pou deside Mr Speaker pou nou fer sa *healing?* Bezwen mazine Mr Speaker ki sa *telling*, sa rakonte, sa vid bann lestoman, i bezwen komans en landrwa.

Sa bann letan dimoun ti annan bokou lafreyer, me nou, nou ti donn zot en platform pou zot kapab anmenn zot pwen devan. Me solman Mr Speaker, nou ti menm vwar ki nou ti

bezwen esper ansyen Prezidan ferm son lizye. Avan ki nou ti komans sa travay.

Sa dan li menm Mr Speaker, i en gro douler pou nou pei realize. Akoz i pa'n kapab ed nou, pou fer sa *healing* e donn nou en pe sa *telling*. Mr Speaker an 2016, nou ti vwar ki *LDS*, nou ti komans sa prosesis pou nou fer, sa *telling* pou fer sa premye pa, pou konkretiz li.

Pou fer ki dimoun i kapab eksprim zot lekor, e *set things straight* konmsi Angle. Sa prosesis *healing* ti komanse, dan en fason konkret atraver *Leader* Lopozisyon ozordi Prezidan Wavel Ramkalawan, kot in persevere par koz avek tou bann *stakeholders*, tou bann *leaders* dan pei sa letan. Pou kapab vin ansanm, pou nou komans sa prosesis. Pou fer sa paz vin prop, pou nou kapab sanz nou fason viv.

Mr Speaker nou'n tande ki koripsyon ti en persepsyon. Nou ti osi tande, ki sa bann laverite, ti en osi en persepsyon. Me letan nou ti tann li ganny dir par bann viktim, direk lo televizyon. Nou tou nou ti bezwen fer fas avek en larealite, nou ti bezwen konnen ki laverite i sorti dan labous bann ki'n pas atraver bann atosite.

Menm si nou'n *deny* ki annan sa, lo nou legzistans dan lepase, nou'n kapab fer li vin en realite atraver bann ki'n kapab rakont nou. Bann ki'n kapab fer *the telling* Mr Speaker, pou nou kapab komans fer sa *healing*.

Sa faz ki nou'n pas ladan nou kapab apel li en faz, enn konkret. En faz pou nou kapab bouz devan, pou nou al anver sa konklizyon ki nou pe rode. Nou'n telman asize pour nou, *deny* laverite pou telman letan, ki nou'n fer en ditor nou pep. Nou'n telman fer ditor en zenerasyon, pa anpese ekout sa laverite ki nou'n *distort*, nou listwar atraver ledikasyon lekol.

I annan en zenerasyon nou zenn ki pa konnen ti annan lendependans ozordi nou pe dir Larenn in mor. I annan en kantite zenn Mr Speaker pa konnen ti annan a lan dan nou listwar, sorti dan letan Angle, zot krwar nou ti al direk dan sa liberasyon Albert Rene.

Zot bliye, ti annan en Gouvernman endependan lib demokratik. Sa nou'n fer Mr Speaker, i en krijote ki nou'n *allow* ki menm dan lekol, nou'n *distort* nou prop listwar. Mr Speaker i annan diferan form lesklavaz, e mon kapab krwar mwan ki koman en Nasyon nou'n toler en lot faz dan nou listwar depi 1977, kot nou fer

nou pa'n *empower* nou pep, ed nou dimoun.

E sa dan li menm i en fason *enslave* nou dimoun. Nou ti en Leta kot nou ti toler nou prosen, ouswa nou *neighbor* pou *spy* lo kanmarad. Pou dir ki pe pase, ki zot pe koze. Nou ti *compensate*, bann dimoun donn zot konpansasyon, si zot vin rakonte si en dimoun i annan en lopinyon diferan avek nou.

Nou ti denigre lezot ki pa ti abor sa bato ki zot, zot ti ladan, ki ti napa menm krwayans avek zot. Sa bann tre ki nou'n enkilke dan nou pep, pandan 43an Mr Speaker, i en form lesklavaz, ki en serten parti politik in anmenn lo Lepep Seselwa.

TRNUC Mr Speaker in enn sa Komisyon ki pe anmenn laverite, e koumsa nou kapab travers sa par nou listwar avek nou lizeye ouver. Pou nou kapab aprann en leson.

Mr Speaker nou'n tann dir ki *TRNUC*, swa in fer son louvraz, swa i pa'n byen fer louvraz, nou'n tann serten Manm *US*, met serten standar dapre zot, mon pa konnen si zot parti in donn zot lotorizasyon. Akoz parey nou'n tande Mr Faure ti form par sa sipor pou kree *TRNUC*.

Zot in dir ki annan ka ki annan merit, i annan ka ki napa merit. Mr Speaker zot pe dir *heal*. Be eski sa kalite koze sorti kot bann *leaders*, i pe ede pou nou fer sa prosesis rekonsilyasyon? Si deza rapor pa ankor konfirman zot ki poudir nou ki standar, ki ka ki vo ki ka ki pa vo. Be sa pa en fason pou bouz devan sa Mr Speaker. Zot bezwen reget zot fason panse.

Mr Speaker nou'n menm tann enn, ki'n konpar sa bann standar avek lefe ki nou'n anmenn Lalwa pour donn en standar *child care* dan nou pei. Kot Minis in nonm, kontrol. Mr Speaker mon krwar i enn bann sekter ki nou bezwen annan *the best controls*.

Ki fer ki nou bann trezor i ganny pli bon servis posib. Me solman ankor dan sa deba, nou'n vwar kot en Manm *US* in pran standar. Son standar pour li, e li enpoz lo pei. E menm dir nou ki nou bann pti trezor pa devret annan standar kot zot ganny veye. Fer lapenn Mr Speaker.

Mr Speaker, zot pa koeran osi lo deba. Nou pe get en *Bill*, ki pe *extend* lavi *TRNUC*. Letan en parti politik, i annan son bann *leaders* i pe dir nou, nou koman *leaders*, nou bezwen fer sa prosesis *to heal*. Me parmi

zot dan sa travay, dan *TRNUC* i annan bann *leaders* tel ki bann o dimoun dan larme, ki ozordi pei i ankor pe pey li pansyon, i dir ou i pa konnen, i pa rapel, i pa konnen, i pa rapel. Ki manner nou pou *heal* Mr Speaker?

I pa okouran sa bann keksoz, ki manner nou pou *heal* si bann ki annan en loportinite, pou li ganny *amnesty*, i pa dan nou sa laverite, i difisil pou nou fer ek sa prosis *TRNUC*, i vin en sikse, si nou pa ganny led par bann ki ti la.

Mr Speaker, i osi dezapwentan, letan en dimoun ki en ansyen Prezidan - Mr Speaker nou'n napa bokou Prezidan ziska prezan nou, nou lo senkyenm - letan enn nou bann Prezidan ki'n antet nou pei, i asiz dan en lot pei pa konnekte li avek *Commission*. I pa kler, i bourye i pa tande, Mr Speaker sa dimoun ki ti asiz o bor per fondater, i ankor la avek nou.

I pa'n eklersi nou laverite, i pou difisil pou nou fer ki nou sa rekonsilyasyon pou nou pei kapab bouz devan. I difisil e i dezapwentan Mr Speaker, letan nou vwar bann keksoz koumsa. Laverite i pa zis en persepsyon, e in ganny *prove* avek nou pep.

Mr Speaker, letan nou kontinyelman krwar ki vol, *rape*, labi tortir, disparisyon i en fot. Nou bezwen met an kestyon, kwa ki nou anmenn devan, dan en deba kot nou pe dir ki nou pe rod *healing*.

Mr Speaker, enn bann standar ki mon'n tande letan mon tann zot in dir, serten keksoz ti en gaspiyaz letan *TRNUC*. E mon pe fer, mon pe mazine kekfwa, zot pe dir sa bann *case* later ki'n ganny anmennen devan *TRNUC*, pa ti *fit in* akoz ti en gaspiyaz letan. Koumsa *TRNUC* ti a ganny plis letan, pou fini zot rapor.

Mr Speaker, Onorab Woodcock pa'n mal dir. Si zot pa ti vole, abize, pran parti pran lo led o sa Leta ki apel Sesel, pa ti pou bezwen gat letan *TRNUC*, Mr Speaker. Ziskan ozordi zot 40 bout later zot pa ankor rann. Zot la, zot pa ankor fer en zefor *to reconcile*. Nou nou'n fer the *telling* zot pa ankor ler pou fer *the healing*?

Mr Speaker tousala i kot zot, zot parti ki zot in form par ladan. Sanz zot non zot, *SPPF* - *SPUP* - Parti Lepep - *United Seychelles*, pa nonmen lot. Zot ankor la Mr Speaker, sa later ankor lo zot non sa. Alor pa dir nou, pa anmenn kot *TRNUC*. Nou koman, mwan koman en Manm *LDS* mon'n anmenn

partou. Ziska *Anti-Corruption Commission* mon'n anmenn kot zot.

Akoz pep Seselwa in ganny vole, par bann *leaders* ki ti la Mr Speaker. Pa en gaspiyaz letan sa. Zot dir nou koumsa ek sa bann keksoz napa nanryen pou fer ek 77, sa ti komans '77. Be depi '77 zika ler nou'n ganny vremen libere an 2016, Mr Speaker zot ki'n la, tou sa vol ki'n pas anba zot, zot ki'n fer!

Alor tou ka ki enkli, zot lanmen sal ladan in ganny anmennen devan *TRNUC* pou Seselwa konpran, kwa ki pe pase.

Mr Speaker nou pa kapab fel, dan sa prosis faz enn kot nou ete, kot nou pe fer *the telling* pour nou kapab *move on* pou fer *the healing*. Nou bezwen ozordi *extend* sa Lalwa, pour ki *TRNUC* koman en Komisyon i kapab fer on travay, pou delivre pep Seselwa pou vre, liber zot avek tou sa bann fo propagann.

Fer sir ki tou dimoun ki'n ganny vikimize, abize dan sa pe wi, i vwar en fason pour li kapab *forgive*. Pou li kapab aksepte, pour li kapab bouz devan e pour nou fer sir koman en pep Mr Speaker, ki sa pa zanmen ariv ankor.

E mon demann tou mon koleg lo lot kote latap, pou pran

sa legzanp ki Onorab Zialor in fer. Kekfwa demann zot *leaders* zot parti pou vini pou fer en *apology*, pou piblik Seselwa;-kekfwa rod zot bann ansyen Prezidan ki'n pli pre avek per fondater, pou vin demann pardon pep Seselwa.

Pour ki letan zot fer *the telling* Mr Speaker, nou a kapab fer *the healing* nou tou ansanm. Mersi Mr Speaker.

MR SPEAKER

Mersi Onorab. Mon a donn laparol Onorab Francois Adelaide.

HON FRANCOIS ADELAIDE

Mersi Mr Speaker. Bonswar *VP* avek *AG*. Mr Speaker, mon pa pou long lo sa deba. Mon'n pran laparol senpleman, aköz mon ti sa pli zenn Manm ki ti lo sa komite, ler nou ti pe fer sa Komite *Truth Reconciliation and National Unity*.

Mr Speaker les mwan dir dabor ki ler nou fer sa komite, ti annan vremen bann dimoun ki ti ase saz eksperyanse, e la mon mazin Onorab ki ti *Leader* Zafer Gouvernman sa letan, Onorab De Commarmond avek, apre ti annan Onorab Gill, Simon Gill, ti annan mwan menm Onorab Ramkalawan, Onorab Georges, Onorab Speaker ki ti Nichola Prea. Wi

sa i ti sa lekip. I ti vreman en lekip, ki ti pe travay dan lentere Sesel. Me ti napa okenn lespri vanzans.

Se pour sa rezon ki ou vwar sa komite ti ganny aksepté e menm Prezidan Faure sa letan, dan tou son laspe, Prezidan ti dakor pour li siny sa *Bill* pour fer li vin Lalwa pour ki sa Komite i komans travay.

Mr Speaker ozordi ler nou pe gete nou pe debat lo sa *Bill*, mon konpran aköz petet Lopoziyon pa pe vreman konpran, ki pe arive e aköz zot pa pe donn sa sipor.

I senp Mr Speaker, se laplipar bann Manm ki laba se bann Manm ki rafal koudeta zot pa ti ankor ne. E zot pa'n zanmen konn zot zistwar, e zot in parey en parti en pye dibwa ki pa konn zot rasin.

E byensir zot pa pou kapab senpatiz avek sa bann dimoun, ki'n pas dan sa bann douler koumsa. Ler koudeta ti arive mon ti annan 2an. Vre mon osi mon pa ti ankor devlope, parey pou vin en manmay ki ti konpran sa sityasyon.

Be atraver bann kominikasyon ki mon'n fer avek bann dimoun, mon'n kapab konstata ki vreman ti annan en keksoz ki pa ti pe mars byen. E sanmenm sa ki ti motiv mwan

pou mwan vin lo sa komite, pou mwan aprann en pe plis.

Mr Speaker, aköz nou'n dir nou ti komans an 1977, nou tou nou konnen 1976 Sesel ti vin en pei endependan. Ti vin en Repiblik e ti annan sa bann tirayman ant Demokratik ek *SPUP* sa letan.

E ler nou ti ganny sa Lendependans nou ti dir, poudir nou pou travay ansanm dan en group Gouvernman koalisyon, pou nou anmenn sa *healing* e kot Seselwa pou kapab ankor reviv ek kanmarad. E zis 1an apenn 1an apre, ki ti annan sa koudeta.

E se sa ki nou ti dir *once* ki nou pei in vin en Repiblik, so annou pran li *from* sa letan, e nou ava kontinyen pour ki nou ava vreman anmenn sa linite anver nou pep.

Mr Speaker o kontrer ki bann Manm lo lot kote latab in dir, ki pa pou zanmen annan linite, pa pou zanmen annan rekonsilyasyon Nasyonal. Mon anvi dir zot ki, swa zot pa pe swiv byen aktyalite, ouswa zot pe viv dan *denial*. I annan dimoun ki pa bezwen okenn ni larzan, pa bezwen nanryen e zot in fini *heal*.

Aköz zot in konn laverite, e sa i deza en gran *step*, e sa i deza en laviktwar pour sa komite. Mr Speaker, sa *Bill* pe

demande ki nou *extend* manda komite pour 3 mwan. Akoz, se pour li fini soumet sa rapor avek Prezidan, pour ki sa lot faz i ava komanse.

Se nou'n komanse fer en travay byen, si zot mank enn pti letan nou pa kapab *rush* en keksoz akoz sa keksoz i sitan enportan. E parey mon'n tann mon bann koleg dir poudir i annan en nouvo, *NGO* parey en *NGO* ki'n komanse sa ki pe get dan bann prosesis *healing*. E mwan mon pa vwar sa i mal.

Zot ki'n soufer, e byensir zot pou pli konnen, ki petet bann rekomandasyon, ouswa bann keksoz ki zot pou bezwen. Be solman nou bezwen donn sa letap, pour ki sa rapor i vreman ganny fer dan son pli bon posibil, pour ki nou ava komans fer en travay ki bon apre larestan i ava swiv. Nou fondasyon i bezwen bon si nou ki lakaz i bon.

Mr Speaker les mwan, permet mwan atraver ou pou koriz Onorab Rocky Uranie. In dir ki i annan bann dimoun ki pou ganny iminite, sepa in ganny iminite, sepa kwa. Mr Speaker sa pa ankor etabli. Si i ti pe swiv byen, i ti a konpran poudir, sa komite la i pou fer bann rekomandasyon.

Me selman pa sa komite, ki pour bezwen annan bann prosesis ki ale, e si ou ekout

byen ler sa komite i koze, ouswa bann lezot devlopman ki annan, ou pou konpran akoz ki sa Komite in formen, e ki son rezondet.

Onorab Loze in dir ki ti annan bann dimoun ti ganny anmare ek pye dibwa. Be i ti annan son sans pour li kapab raporte. Akoz i ti kapab *lodge* son *complain* in, e raporte. E menm li osi ti kapab al lo sa komite, li osi pou li *voice out* son *grievance*.

Me si i pa'n fer komite in donn ase letan, pour nou kapab fer sa bann prosesis, e ankor 3 mwan la i ava fini. E nou ava konnen ki nou pou fer.

Mr Speaker mwan mon'n ganny sans koz avek parey mon'n dir, avek viktim, menm avek *perpetrator*.

Mr Speaker pa zis viktim ki pe rod Rekonsilyasyon Nasyonal. I annan *perpetrator* osi ki son leker i lour, e atraver ler i kapab koze, in vreman kapab ed li pour li sorti dan sa fernwanr ki ti ete. E byento i pou santi son lavi en pe pli mye. Akoz pa zis viktim ki'n soufer ladan *perpetrator* osi.

I annan bann ki pa'n fer sa aksyon, selon son prop konsyans. Me in ganny forse, in ganny *bribed* parey Onorab Zialor, in dir ki li osi ti annan en rafal i pa'n touy dimoun. Me

petet ki mannyer i ti fer, bann keksoz ki'n fer in ede pour fer lavi enn son prosen malere.

E in azir, in azir konsyansye e in rekonnèt, e se pour sa rezon ki'n demann pardon. E parey mon bann koleg in dir, pran sa legzanp. Mon bann koleg lo lot kote latab, Minis atraver ou, nou annan enn ki ansyen ti en Minis, pran sa konsey ki Onorab in donnen. Silvouple demann pardon. Akoz ler ou aksepte en keksoz se la ki ou kapab komanse, pour ou kontinyen avek sa lot prosedir.

Pa zis fer krwar ki in pase, i pa enteres nou, nou santi nou grate nou santi nou soz. Non Mr Speaker, se nou pep ki'n pas atraver sa, e i enn nou frer. Ozordi Sesel, parey Onorab Larue in dir, nou enn pti kominote, 100mil dimoun nou tou nou konn kanmarad. Nou al lanterman, nou al maryaz, nou bat ek bann dimoun ki'n pas atraver sa. Menm nou koz ek zot, so i enportan pou nou fer sa prosesis *healing* pour ki nou a bouz de lavan. E Seselwa enn fwa pour tou, i ava santi li *unite* e nou a viv byen dan nou pei Sesel.

E Mr Speaker avan mon terminen, mon le dir avek tou Seselwa ozordi, leson pe montre, ki tou sa ki ou fer ek ou

zanmi, tou sa ki ou fer avek ou klik, ou responsab. E ozordi nou pe trouve, kot tou sa bann dimoun ki'n fer sa bann swa kriyote, swa petet sa bann pese, ozordi zot tou zot le blanm lo msye Rene.

Be pa msye Rene ki ti fer, petet vre i ti *main culprit* deryer sa, be solman ou ki'n fer sa aksyon. E i en konsey pour tou dimoun ozordi, tou aksyon i annan son reaksyon. E ou responsab pour tou sa ki ou fer, *be it* ou dan pozisyon *Leader*, be it ou dan lezot pozisyon. Ou responsab pou ou aksyon.

Mr Speaker mon pa pou tarde parey mon'n dir, me solman mon ti anvi met keksoz dan son konteks pour ki Seselwa deor ler zot tande poudir i annan sa *Bill*, ki pe demande pou renouvle *at least* 3 mwan.

Se ki nou anvi sa travay ki'n komanse, e i fini lo en bon *note* Seselwa i vwar poudir son larzan pa'n zis ganny pran. E in ganny gaspiye. Me in ganny pran pou en rezon Mr Speaker.

Demokrasi nou tou nou pe kriy demokrasi. Demokrasi i koute, e si ou'n fer keksoz, ou pou bezwen peye. So avek sa Mr Speaker, mwan mon krwar poudir nou bezwen siport, nou bezwen siport sa *Bill*, nou bezwen siport *TRNUC*, nou

bezwen donn zot tou sipor. Akoz sa i pou ede, pou anmenn redres pour en parti nou popilasyon.

E mwan mon krwar ki sa *Bill* i en bon *Bill*, e mwan mon asire ki mwan mon pou donn mon sipor, e mon demann tou lezot dimoun si zot vreman annan Sesel aker; si zot vreman annan tou Seselwa a ker; si zot vreman rekonnèt poudir i annan dimoun ki'n pas atraver en ta matir Mr Speaker, nou bezwen, nou bezwen kapab met nou laprid de kote, annou *behave*, annou vin parey bann Manm Lasanble Nasyonal ki pe defann nou elektora.

Mon asire ki partou dan nou distrik, i annan en Manm ki petet in pas atraver sa bann keksoz. E atraver nou liminite ki nou pou annan, e ki nou kouraz, nou pou vreman fer en diferans pou Sesel, e pour sa bann dimoun an zeneral.

Mr Speaker mon dir *VP* kont lo mwan, mon pou donn ou mon sipor e mon demann nou tou pou nou vote e fer sir ki sa *Bill* i pase. Mersi Mr Speaker.

MR SPEAKER

Mersi Onorab. Onorab ti dir pou ase kourt e i pa'n tro long. Me selman mon mazine poudir bann ki reste pou koze, zot pou bezwen en pe letan. Alor

mon pa pou tro prese. Mon pou *adjourn* deba la.

E nou a kapab kontinyen *demain matin*. Mon annan 3 entervenans lo lalis. Mersi mon a dir mersi pou zot partisipasyon ozordi, Vis-Prezidan e *Attorney General* e osi bann Manm. Nou a *adjourn*. 9er bomaten demen.

(ADJOURNMENT)

